

Ado Mala Hedabi Uluguea Dëdëi Amo Ado Dëdëi Dibe Amoïe Neala Olelo Oboba

Ado Mala Hedabi Uluguea dëdëi dibe gowegida, Isilale udia dolöge, udia dolö odoage, sulubadelaïe damula aulo, Yesu neala säla dëdëla negei dialea. Yesuea ïe hamoi amo mi gäwila hamosalea, ea udia dolöma sähalea, busadäoi nefolalebe amolima Ado Mala Hedabi säla ïmäia, Eleloi Gesamia e memeleila säila dëdëla negei dialea. Ulugu 4.18 bimalo. Dofä gelola. Udia dolö ilia yöi elö elöla hïdo elöi amo gausegi, ea ili ugila nege-molö amoïe Yesuea bobasëi amoïeda, Ulugu beba gowegi Uluguea sedalu säida yafie dialea.

E sosogo amolia Yesuea nelebo hamose amoligi, ema hïdo elöla obeägi. Segeyo Melia e neegela ägüsolo amo galage, udia dolöea obeägi amoda Ulugu 1.42-48ge, 2.10ge bimalo, amase, beba wegi made wagala, Yesu Hebeni fedasolo amo galage, ilia hïdo elöla obeägïmelë. Ulugu 24.52 bimalo.

Nelebo yafie Yesuma hamoi amolige, ado yafie Yesuea säi amolige, Ulugu eamu dëdëla negei dialea. Uluguea säi dibe we gadoida, beba odoagida maade. Uluguea hïdo dëdëi amoligi odoada gowe ili. Yesu neegela ägümolöïe selesaia fiia ado säla ï amoge, sugua sibi sigi aligiloea Yesu neegela ägüi bea asi amoge, Yesuea ado besula Yu dolö idiafa nufi dibegi, Samelia dolö afädëa ugila negei amoge, amase, malö üfi afädë dabadigi nelo amo,

bu eedo neebea obëgëi amoge, Yesuea ado besu odoa säi amolige, Uluguea hïdomu dëdëi. Amase, dagisi muni nelo Sagiasima besela galai amoge, Ulugu bebagimu dëdëi dië bimolömelë.

Beba gogida, Uluguea ado geloi dëdëla negei dibe amolida gowe ili. Godema gelola adomolöëge, Eleloi Gesamia hamoi hamolo amoëge, nilia nafade hamoi amo Godea hëlo neebe amoëge, ado geloi amoli dëdëla negei dialea. Uluguea, dolöeamu made, nelebo udiafalïa hamoi amoge, ado yafie dëdëla negei dialeamelë.

Uluguea säi amoda, beba wegimu wagai made. Yesu e Hebeni fedala asibua, abosolo dolö amolia nelebo hamosa nelo amoge, Ulugu eamu beba elögi dëdëla negei dialeamelë. Abosolo Dolö Amolia Hamoi Amo bimalo.

Beba goweda Uluguea Diofilasama dëdëla ï

¹⁻² Mi gäwila hamoi amo siia bealahilä, ado mala amoë hamoi hamolasilo besela galala nefolalo amolia nilïma säla ï amo gadola, nili neebeawi gausiala digai amoë dolö yafiea dëdëmolö helësësa nelomelë.

³⁻⁴ Amaimo, dafidilo Diofilasa-o, nelebo sulubadela mi gäwila hamoi amo nihï mi fädäla nabaha nelo amea, ado dima olelei amo dia dofä gabula helësëmäiaë, nage dima mogola dëdëla ïmolöla helësëimelë.

**Elisabedea ödägi gelo Yone
neegela ägüi amoëge, Melia Yesu
neegela ägüi amoëge säi dialea
(Ulugu 1.5-2.52)**

*Selesaia fii afädëa Segelaeama ado säla iahalea,
Yone neegela ägümolömelëla säi*

⁵ Heledo e Yudiaie gini nelo amo gaaluda, gobela ilo afädëie ëi Segelaea nelo. Eda gobela ilo Abia ea beaha neloamadi gobela ilo nelo. Ìe udia amoie ëida Elisabede. Eege ìe yaua mäu Alono nelo.

⁶ Eleda Godeie siigi asigi mogoi nelo. Elea amala neada, Dafidilo Geloie ado säla negei dibe amoge, ado malage, elea sulubadela bëgëla hamolo nea, elema asiai maade, hedabi nelo.

⁷ Gasoda, ele malö maade sulo. Mida, Elisabede e malö maade, haua salea, helegela ëdëi sali hamoi sulo.

⁸ Segeyo afädëgi, Abiamadi nefolalo amolia odala i gobela imolö amo galada, Godeie siigi nea, Segelaeaea odala i amo gobela imolö nelo.

⁹ Gobela ilo amolile mala amo bëgëla, Dafidilo Geloie mosö auli dibeami hõba gafisigä hedabi fedamäia gobemolö amo dolö nowëa walebelela sadu hamola beahamelebe, Segelaeaea nogila digala gobela imolö meli.

¹⁰ Hä, e isogi nogila digala gafisigä fedamäia gobese amo gaaluda, udia dolö gegedoi amoli sulubadela mosö amo baagido segea nea, Godema adosa nefolalo.

¹¹ Segelaeaea amala hamosa nebegi, gafisigä fedamäia gobelo auli amoie dafädimadi, Dafidilo Geloie selesaia fii afädë Segelaea neebeeami maala ulufadigila nelo.

¹² Segelaeaea e beala, edefademalä fudugila bedäi.

¹³ Fudugila bedäsebegi, selesaia fii amea ema sähalea, Segelaea-o, dia bedämabu. Dia Godema

adoi amoda Godea hä, nabi. Die udia Elisabedea die dolö malö afädë sogobamolömelë. Malö amoie ëida Yone negemalo.

¹⁴ Die iso asigi ea hedabolasila obeägïlasimolömelë. Udia dolö yafie nefolalebe amoliage, e neegela ägüse amogi obeägïmolömelë.

¹⁵ Mida, Dafidilo Geloïie siigi eda ëi sälo namolö. Eada wani ödäge, gagaolo ödäge molö mademelë. Eda emea made ägüla maala isogi seëgi, ema Eleloi Gesami nobai namolömelë.

¹⁶ Eada Isilale udia dolö yafie asigi besulasila, ilile Dafidilo Geloï Gode mia sigi obëgësa maademolömelë.

¹⁷ Eda malage geloige Elaia nelo amohï gadoi nea, Dafidilo Geloï hobeala misiäia, dafidila awäha namolömelë. Eada eedolali asigi besulasila, eedolalia ilile malësäma helësëlasimäiage, amase, udia dolö ado neadigilo neebe amolige, asigi besulasila asigi gäwi neebe amolia asigi falagasela helësëlo amo gadola helësëmäiage, ea ili helësëlasimolömelë. Dafidilo Geloï misiäia beaha nea, ea udia dolö hamogilahilä dadaiala namialamolömelëla selesaia fii amea säla i.

¹⁸ Amala säsebegi, Segelaeaea selesaia fii amoma nabahalea, Neda ëdëi sali, amase, nïe udiage sesalebe hamoi sebe amo, dia walio ado säi amoda, dofä gabula nada abilia helësëmolödula nabi.

¹⁹ Amala nabasebegi, selesaia fii amea säla obëgësalea, Neda Gabelelo. Gode neebea amimu aligilo. Ado hedabi we dima säla imäia, ea ne fisiga weimele.

²⁰ Ä, dia nabuö. Na ado säi amo dia dofäla made helësëse goeada, walio die nafi dofoga-

hago. Na ado säsebeweda, Godea daiala negei segeyo gausiala digasolo amo gala, gausiala digamolömelë. Dia adola made nea, nelebo Godea hamomolömelëla na dima säla iasewe gausiasolo amo gala, dia adomolömelëla säla i.

²¹ Segelaeaea amala hamosa neebe amo gaalu, udia dolö e beaha nefolalo amolia Godeie mosö isogi sedadeseweda abeahäla hamosadula helësëlahilä, asigiamu hogosa nefolalo.

²² Hobeala, Segelaea e segea doadigila fedalahilä, ilibalä adomolö uli nelo. Adoea sämolö amo uli nea, ea sämolö helësëi amo naaboeamu oodo bibila säla iasebegi, ilia helësësaleada, Godeie mosö isogi idogoi sosoäla awäla meli gabula helësëi.

²³ Holöfalä nelolahilä, ie hamoi hamolo segeyo amoligi hamosa maadela, Segelaea e hi mosöa obëgëi.

²⁴ Hobeala, ie udia Elisabetheie isogi malö fagulo hagui aube bia mosöamu musügä sulo. Amala salea Elisabethea sähalea,

²⁵ Dafidilo Geloia ne ugila negesebe weada, segeyo wegi ea ne helësëla, udia dolöie siigi ne hewalasilo amo haisa maadeila säi.

Selesaia fia, Melima Yesu neegela ägümolömelëla säla i

²⁶ Elisabethe e malö fagulo hagui aube gafe sebegi, Godea selesaia fii Gabeleloma, di Galiliie sege ei Nasalese gaamugi mosalo.

²⁷ E udia dolisä afädë Gini Debidi sosogo nelo amogali säi sebea ami asi. Dolö amoie ëida Yosebe. Dolisä amoie ëida Meli.

²⁸ Amala hamoi sebegi, Gabelelo e dolisä amo sebea ami awälahilä, ea säla olesalea, Udia malö, di go gabio. Dafidilo Geloï e dibalä gedola nea, edefademalä obeägisa namiäia, di neala dofä obeägilasimelëla säi.

²⁹ Ado säi amo Melia nabala edefademalä fudugila bedäla, ea säla olei amoda, abeahäladula asusugala helësësa sulo.

³⁰ Amala helësësa sebegi, selesaia fii amea ema sähalea, Meli-e, dia bedämabu. Godea di helësëla, dimada obeägisa neamelë.

³¹ Dia malö fagulo hagui sulolahilä, dolö malö ägümolömelë. Malö amo ägüsedä, ie ei Yesu nege-malo.

³² Malö amoda, ei sälo namolömelë. Udia dolö sulubadelaea eda Dofä Ilibia Edefade neebe amoie malö neala sämolömelë. Dafidilo Geloï Godea e ie yaua mäu Debidiie beaha aligilo filodaia sami-alamolömelë.

³³ Eda Yeigabaie mosö amoli beaha namolöi namolömelë. Ea Beaha Maadela Sigi Neebe amoda, namolöi namolömelëla säla i.

³⁴ Amalebegi, Melia selesaia fii amoma nabahalea, Neda dolö made fii sebe amo. Walio dia ado säi amoda, abilia hamola hamomolödula nabi.

³⁵ Amala nabasebegi, selesaia fii amea ema säla obëgësalea, Eleloï Gesami dima digalahilä, Dofä Ilibia Edefade neebe amoie geloï dima salugamolömelë. Ameada, dia malö ägümolö amoda, asigi mogoi hedabi negei neëgida, Godeie malö neala säha namolömelë.

³⁶ Di sosogo Elisabededa sesalebe sulo gaso, walio e fagulo hagui sebe ameage dolö malö ägümolömelë. Siiba, odoa ilia ema malö sogobalo

made, hauala sälo amo, walioda e fagulo hagai sebegi, hä, aube gafe saleamelë.

³⁷ Godea nelebo hamomolöi made, uli afädëda maademelëla säla i.

³⁸ Amala säsebegi Melia säla obëgësalea, Neda Dafidilo Geloïie hamoi hamolasilo udia saleawe. Dia säsebegi gadola nema hamosa maademäiamelëla säi. Amala säi amo nabalahilä, e digila selesaia fii e asi.

Meli e Elisabede sebea söfë asi

³⁹ Selesaia fii amo asi baagido, Meli e nowela fodolofali Yudiaie sege gau dibe amo fedala digala digila awäla, gaamu afädë dibeami besela galai.

⁴⁰ Gaamu amogi besela galala Segelaeaië mosöa nogila digalahilä, Elisabede e säla olei.

⁴¹ Melia säla olei amo Elisabede nabi amole, ie isogi malö dubo sulo amea fologolahilä, Elisabedema Eleloi Gesami nobai. Amasebegi,

⁴² Elisabede gelolafali sähalea, Dida udia odoa sebe amoli gadoi made. Godea dima edefademalä obeägilasi gabu. Dia malö ägümolö amomage Godea obeägilasimolömelë.

⁴³ Nada hedabi edo hamoi amoie, nie Dafidilo Geloïie eme di ne sebeawi misi.

⁴⁴ Dia säla olei amo na naba gai amole, malö dubo nie isogi sebe amea obeägisalea fologoimelë.

⁴⁵ Dafidilo Geloia dima hamomolömelëla säla i amo, dia dofä gausiala digamolö gabula helësei ameada, dia dofä obeägisa saleamelëla säla i.

Melia obeägila gë udäi

⁴⁶⁻⁴⁹ Amala säla iasebegi, Melia sähalea, Neda ie hamoi hamolasilo udia iso gäwi made sebegi-iii,

hī ne beala bobasēi amea-aaa,
nīe iso asigia Dafidilo Geloīe ēi gauia adala-
aaa,
nīe gesamia nīe damula aulo Godema
obeāgīsawe-eee.

Gode geloi edefade neebe amea-aaa
ne hīdo elōla ugila negei ameadā-aaa,
segeyo wila nofela walio nefolalebeweage-
eee
hobeala namolō amoliage-eee,
obeāgīlo edefade Godea negali īla sāmōlōmelē-
eee.

Īe ēida dofā eleloifalī nea-aaa.

⁵⁰ Udia dolō walio nefolalebeweage-eee,
hobeala namolō amoliage-eee,
ebalā bedāse amolida-aaa,
ea bobasēmōlōmu gabio-ooo.

⁵¹ Īe naaboea hamoi geloi edefade hamoi-iii.
Asigi dalagala hilile ēi gauia adalo nefolalo
amolida-aaa,
haila dusudasilasimelē-eee.

⁵² Beaha aligilo nefolalo amoli, ea ilile filodaia
amila neala nagadaiahalea-aaa,
nagadaialo nefolalo amolida, obōla neala
gauia adogoimelē-eee.

⁵³ Udia dolō sīdēa baagoi nefolalo amoligali-iii,
ea nelebo hedabi bolela muāia īahalea-aaa,
obōla, udia dolō nelebo yafie negei nefolalo
amolimada-aaa
ilile naabogi nelebo afādē made gaula-aaa,
memalā ili badumu mosalaimelē-eee.

⁵⁴⁻⁵⁵ Ea ĩe hamoi hamolasilo Isilale ili ugila
negesalea-aaa,

ilile mäuma hamomolöla säla negei amo
gadola-aaa,
Abalahamamage-eee,
ïe yaua mäu amolimage-eee,
bobasësa namolöi namolöla helësësamu
neamelë-eeela
Melia säla wagai.

⁵⁶ Meli e Elisabedebalä aube ohodoa gadoi sulolahilä, hï segea obëgëi.

Elisabedea Yone neegela ägüi

⁵⁷ Elisabede e malö ägümolö fu besela galasebegi, olobola sulolahilä, dolö malö neegela ägüi.

⁵⁸ Hä, Elisabedebalä ami sefolalo amoliage, hïle sosogofalï amoliage, Dafidilo Geloia e edefademalä bobasëila säi amo nalahilä, Elisabedela hiligila obeägïsa nefolalo.

⁵⁹ Ägüla misi segeyo gödö besela galasebegi, ilia malö dubo amoïe gafodo damumolö misi. Maalahilä, ilia malö amoïe eedo Segelaeaïe ëi negedelä hamosebegi,

⁶⁰ emea sähalea, Ai, go made. Ìe ëi Yone negemolömelëla säi.

⁶¹ Amala säsebegi, ilia ema säla obëgësalea, Di sosogo neebe amogida, ëi goda maademelëla säi.

⁶² Amala sälahilä, ilia eedoma naaboea oodo bibila nabahalea, Dïe malö goïe ëida nowë negemolö helësësebelä nabi.

⁶³ Amala nabasebegi, ea ilima naaboea oodo bibila, beba neala ïmola sälahilä, ea amogi ïe ëida Yone dëdëi. Amala dëdëi amogi ili sulubadela fudugi.

⁶⁴ Amo gaalu, fodolofali Segelaea e nafi dofogai amo fisila, bu adomolö hamosebegi, ea Godeie ei gauia adala adosa nelo.

⁶⁵ Amala hamoi amogi, udia dolö elebalä nefolalo amoli bedäla fudugi. Amala hamoi amo sulubadela Yudia sege gau dibeamadi sebe amoli sulubadelaea säla daidosa nelo.

⁶⁶ Amala hamoimeläla säi nabi amoli sulubadelaea helësëlahilä nabahalea, Malö go fädäla aligiseda, abodo gadoi hamolo namolödula nabaha difolalo. Mida, Dafidilo Geloie geloida, malö amobalä dofä nelo amogi.

Segelaeaea ado bea säla säi

⁶⁷ Malö amoie eedo Segelaeama, Eleloi Gesami nobai nea, ea bea säla ulufahalea,

⁶⁸ Isilaleie Dafidilo Gelo Gode e maala ie udia dolö neebe amoli sigi obëgei amogi, nilia ie ei gauia adadi.

⁶⁹⁻⁷⁰ Ea ie bea sälo memelela odasisi nefolalo amolimadila hamomolömeläla siiba säla negei amoda gowe.

Ie hamoi hamolasilo Debidie sosogomadila, nilile damula aulo geloi gelola namiäia ea memelei gabuwe.

⁷¹ Nilile ado nii neebe amolile naabogi amilage, nilima bimolö habobaha neebe amolile naabogi amilage, ea nili damula molöie misi.

⁷² Ea nilile mäulali bobasëmolöiege, ea gomalä hamomolömeläla asialo made ado hido elöi hi dafidi säla negei amo helësësamu aligimolöiege amala hamoimelä.

⁷³ Asialo made ado ea nilile māu Abalahamama migalīa diigila ado gelola sālo amo gadola sāla negei amoda gowe.

⁷⁴⁻⁷⁵ Nilile ado nii nefolalebe amolile naabogi amila damula awāla sigi obēgēmōlōmelēla sāla negei. Amase, nili nagadaiawi neebewe bedāla made, segeyo sulubadelagi iē sidaia mala mogoige hedabi eleloige hamosa nea, iē hamoi hamolasisa namiāiaie amala hamomōlōmelēla sāla negei.

⁷⁶ Nīe malō-o, Dafidilo Geloi hobeala misiāia, dida iē idi hahamogila fofodola dafidi awāha namolō amoie, ilia dida hā, Dofā Ilibia Edefade neebe amoie bea sālo afādē nebegola sāmōlōmelē.

⁷⁷ Iē udia dolō amolia helēsēmāia, dia ilima sāla iahaleada, Dilia nafade hamoi amo ea hēsa maadela damula moholōmelēla sāla imōlōmelē.

⁷⁸ Nilile Gode eda hedabi bobasēlo amea amala damula moholōmelē. Ea nili bobasēlo amea, yo edefademalā afādē mudaiala besela galalahilā,

⁷⁹ udia dolō gasimi sagaiage, baagoloie sege augi hawage nefolalebe amolimada, ea yo digalasi-mōlōmelē. Nili dalulasiloie idigi emesala mosāia sigi namolōie, amala yo digalasi-mōlōmelēla Segelaeaea bea sāla negei.

⁸⁰ Hobeala malō amo ēdēla aligilahilā, iē gesamige geloi nelo. Amalahilā, Isilale udia dolō neebe amolia siia bimāia, e ulufadigimolō segeyo amo besela galamāia beaha neada, sege nafade udia dolō aligisia made ami nelo.

2

Melia Yesu neegela ägüi (Madiu 1.18-25)

¹ Segeyo amo gaaluda, Olomo dolö ëi Sisa Ogasadasa ea beaha aligilo gini nea, ea udia dolö beaha neebe amoli sulubadela ëi dëdëmolö di-aleala säla negei.

² Gabenaïe ëi Guliniasaea Bolobinisi Silia beaha neebe amo gaalu, gamane dolö ilia ëi dëdëla negemolöda, amo gala mi gäwila negei.*

³ Amalebe, udia dolö ili sulubadela hilile segea afufula, ëi negemolö afiai.

⁴ Hä, Yosebe eda Galilimadi gaamu afädë dilo amoïe ëi Nasalese amila, Yudiamadi Debidïie gaamu afädëgi asi. Gaamu amoïe ëida Bedeleheme. E Debidïie yaua mäu nelo amea ami asi.

⁵ Melida Yosebe egali säi sulo amo nimolö gaalu ameada, Meli fagulo hagui sulo amola helegela ëi negemolö asi.

⁶ Ele Bedeleheme ami nea, Meli e malö ägümolö fu besela galai.

⁷ Hä, olobola sulolahilä, dolö malö abulümi afädë ägüsebegi, faguloea usulala sugua gao molö nülö falo gadoi amoïe isogi ami negesi. Amala hamoi amoïe mida, udia dolö amala gegedosalea dilo mosö nelo amo negegi dilo amea amai.

Selesaia fii ilia sugua sibi sigi aligilo amolima ado säla i

* **2:2:** Segeyo amo gaalu, gädili Isilaleda, Olomo ilia beaha nelo. Isilale gädilida, bolobinisi edefade Silia amogi nelo. Olomo ilia ilile gini amomada, Sisala sälo.

⁸ Sege amoë yala baagido nea, sugua sibi sigi aligilo odoa nefolalo amolia gasigi ilile sugua sibi sigi nefolalo.

⁹ Amala sigi nefolalebegi, Dafidilo Geloïie selesaia fii afädë maala ulufalahilä, Dafidilo Geloïie yo digalo hïdo elöi ili neebee ami yo digala besela galasebegi, ili edefademalä fudugila bedäi.

¹⁰ Bedäsebegi, selesaia fii amea ilima sähalea, Bedämabu. Nabuö. Na dilima ado hedabi afädë säla imolö misi neawe. Ado hedabi ameada, udia dolö fifi asi sefolalebe amoli sulubadela obeägisa maademolömelë.

¹¹ Segeyo walioda, Debidïie gaamua udia afädëa malö neegela ägüimelë. Malö ameada, dili sulubadela damula moholö. Eda Dafidilo Geloï Gelesomelë.

¹² Ado amo dofä gabula bimäiada, malö dubo amo sugua gao molö nûlo falo gadoi amoë isogi ami faguloea usulala negei dië bimolömelëla säla i.

¹³ Selesaia fii amea ado amo säha maadeia gai amole, selesaia fii yafie Hebenïie ami mafula selesaia fii dafidi maala nelo amobalä fodolofali maala ulufala nelo. Amala nea, ilia Godeïe ëi gauia adogola sähalea,

¹⁴ Gode ilibia neebe amoë ëi gauia adogosawe. Nagadaia udia dolö neebe amolia Gode obeägilasilo nefolalebe amolimada, neala dalulasilo diamiäiamelëla säi.

Sugua sibi sigi aligilo amolia Yesu bea asi

¹⁵ Amala sälahilä, selesaia fii amolia ili dīgila selesaia mosöa obëgëibua, sugua sibi sigi aligilo amolia hilidomu sähalea, Walio Dafidilo Geloia

nilima nelebo besela galaila säi amo bimolöie, Bedeleheme afiadila säi.

¹⁶ Amala sälahilä, ili fodolofali Bedeleheme afiala Meli Yosebelege malöge ili sebe amo beagolei. Malö dubo amoda, sugua gao molö nulo falo gadoi amoie isogi negesi dibe meli.

¹⁷ Malö amo bealahilä, ie ado selesaia fiia ilima säla i amo säla iaha maadesebegi,

¹⁸ ado säi nabi amoli sulubadelaea sugua sibi sigi aligilo amolia ado säla i amogi fudugisa sefolalo.

¹⁹ Amalebe, Meliada, ea nabi amoge, meli amoge, sulubadela ie isogi nea salalahilä, helësésamu sulo.

²⁰ Sugua sibi sigi aligilo amoli obögësalea, ilia meli amo sulubadelagige, nabi amo sulubadelagige, Gode eda ilibia neala säla, ie ei gauia adogola aligi obögei. Ili meli amoge, nabi amoge, sulubadela ilima säi amo gadola gausiala digai.

Yesuie ei negei

²¹ Malö amo ägüla misi segeyo gödö besela galasebegi, ie gafodo damumolö segeyogi, malö amoie ei Yesu negei. Emea malö amo, aso, fagulo made hagula sebegi, selesaia fiia ei Yesu nege-malola säi amo gadola negei.

Simeono Analea Godeie mosöa Yesu meli

²² Mosese nebegi Ado säla negei dibe amo gadola segeyo wagasebegi, ele Godeie siigi nigime baai made namolöie, Yosebe Melilea malö dubo amo Dafidilo Geloigali odala imolöie, Yalusaleme gaula asi.

²³ Dafidilo Geloie Ado säla negei dibe amo gadola, udiaea dolö malö abulümi sogobaseda,

Dafidilo Geloigali odala ïmalola säla negei amo bögëla, amala hamoi.

²⁴ Dafidilo Geloïie Ado säla negei dibe amea sähaleada, Haea maliabu gadoi äudä galëge, haea maliabu gadoi elöie emalö äudä galëge, ïmalola säla negei amo gadola odala ïmolöëge ami asi.

²⁵ Segeyo amo gaalu dolö afädë Yalusaleme ami sulo. Ìe ëida Simeono. Dolö amoda asigi mogoi nea, Godeïe mala nabahamu aligilo. Eada Isilale udia dolö damula moholö amo misiäia beaha nelo. Emada Eleloi Gesami nobai nelo.

²⁶ Eleloi Gesamia Simeonoma sähalea, Di aso, made baagola neëgi wäla, Dafidilo Geloia Geleso moholömelëla säla negei amo misi neëda, dia bimolömelëla säla ï.

²⁷ Eleloi Gesamia Simeono sigi gaula Godeïe mosö amoïe yala isogi digai. Digalahilä beahamelebe, Ado säla negei dibe amo gadola bögëla hamomolöie, eedo emelea Yesu dubo amo gaula misi neebe meli.

²⁸ Bealahilä, Simeonoea malö amo sogobala gaula nea, Godeïe ëi gauia adala sähalea,

²⁹ Dafidilo Geloi-e, dia dafidi ado säla negei dilo amo gadola, dië hamoi hamolasilo gowea, nie hame eegela, ne hä, baagomolö amo dofea.

³⁰ Mida, dia nili damula moholömelëla säi amo nie siia, hä, beahawe.

³¹ Dia daiala negei amoda, udia dolö sulubadelaea bimäia hamoi gabuwe.

³² Eda yo digalo nea, udia dolö fii odoa neebe amoli yo digalasimolöge, dihile Isilale udia dolö neebe amolile ëi gauia adamolöge nebegola

säi.

³³ Malö amoïe ado Simeonoea säi amo nabal-ahilä, ie eedo emelea asigia fudugisa nelo.

³⁴ Hä, Simeonoea Godea ele neala obeägïlasimäiamelëla sälahilä, malö amoïe eme Melima sähalea, Nabuö. Malö goeada, Isilale udia dolö yafie digalasila, yafie nowelasimolöge, amase, e nofe elöi neebe amo bealahilä, e helësëla udia dolö yafiea dofea madela sämolöge, Godea e memelela ifosi gabugo.

³⁵ Ameada, udia dolö yafiea iso asigigi helësëi amo, ea ulufadigisa maademolömelë. Amase, helebe siia dihile bobagi gäwimolömelëla Melima säla i.

³⁶⁻³⁷ Amo gaalu, bea sälo udia afädëge, ëi Ana sulo. Eda Asa sosogo, Fanueleïe idiwi sulo. E dolö fila awäla dolöbalä gäheo i gifalädalïamu sebegi, dolö amo baagolebeda, e didalo salea, ie gäheo i nabülasi gödölasiïe odoai biyidiada, sesalebe hamoi sulo. Godeïe mosö amo fisila made, eada Gode helësëla, molö made naala, yoba gasigige Godema adosamu filo.

³⁸ Simeonoea säla wagai amole, Ana e malö dubo amo mia ga madela salea, ea Godema ne-segei. Amala nesegelahilä, ea Yalusaleme udia dolö Godea sigi obëgëmäia sisiläfüla beaha nefolalo amoli sulubadelama malö amoïe ado säla iaha nelo.

Yosebela ili Nasalese obëgëi

³⁹ Elea Dafidilo Geloia Ado säla negei dibe amo gadola hamosa maadelahilä, Galili segeamadi helele segea Nasalese gaamugi obëgëi.

⁴⁰ Ami awäla nea, malö amo ëdëla aligilahilä, geloi nelo. Ema asigi falagasei nobai nea, Godeïe ugila negelasilo ema negesi nelo.

Malö malibu Yesu e gobela ilo mosöa asi

⁴¹ Gäheo i sulubadelagi Baagila Asi Segeyo amo besela galasegida, Yesuïe eedo emele, Yalusalememu awäha aligilo.*

⁴² Yesu e gäheo i giwilasi baagilahilä, ilia segeyo edefade amoïe molö nullo mala dilo amo gadola bëgëla, hiligila Yalusaleme afiai.

⁴³ Segeyo edefade amo baagisebegi, eedo emele helele segea obëgësa nelo. Malö malibu Yesuda, Yalusaleme ami nebegi gaso, eleada ami neala helësëla made, obëgësa nelo.

⁴⁴ Elea helësësaleada, awäse wegì awäha gabula helësëlahilä, ele obëgësalea segeyo afädë baagi. Made beasebegi awäha nea, mogogi amila ele sosogo amolimage, ele damelë amolimage, dilia melilela naba hogosa nelo.

⁴⁵ Elea hogoi amo hogosa neamu made beagolesebegi, oböla, e Yalusaleme hogola obëgëi.

⁴⁶ Elea hogosa neamu segeyo ohodoa baagilahilä, oböla hobeala beahamelebe, Godeïe mosöa ami säla olelelo amoli mogogi ami salea, ilia säsebe amo nabadigi, ilima ea nabadigisa sebe meli.

⁴⁷ Yesuea ado säse nabaha sefolalo amolia, e dawa edefade gauì amole, ea naba obëgëi amolegi ili fudugisa sefolalo.

* **2:41:** Baagila Asi Segeyola säi amoda, Isilaleïe malö made nufudala, baagila awäla, Isibiïe dolö malö abulümimu nufudaha maadei amoïe helësëla obëgëlo segeyola säi.

⁴⁸ Eedo emelea e beagolela, asigia fudugilahilä, emea ema sähalea, Aea, dia alima amo hamoi amoda, abilia hamosalea amala hamoi. Diado aliada di hogosalea asigi säosäosa nelomelëla säi.

⁴⁹ Amala säsebegi, ea elema säla obëgësalea, Alia ne hogosolo goda edoïe. Ne Naadoïe mosöa samolöi dialeala alia made helësëla dawa made nealela nabi.

⁵⁰ Elema ado amala säi amoda, elea mi fädäla made helësëi.

⁵¹ Hä, e eedo emelebalä hiligila Nasalese obëgëlahilä, eedo emelea hamomola säsebe amo gadola nabala hamosa nelo. Amo gadola hamosebegi, emea, ea nabi amoge meli amoge sulubadela ïe isogi nea salahamu sulo.

⁵² Yesu e ëdësalea, dawa amola fädäsebegi, Godeage udia dolöeage ema boba gosala nelo.

**Yesuea ïe hamoi hamomäiaïe ödägi
gelo Yonea ïe idi fodola daialasi**

3

(Ulugu 3.1-4.13)

*Ödägi gelo Yonea ado mala säla ïaha nelo
(Madiu 3.1-12; Maga 1.2-8; Yone 1.19-28)*

¹ Dabeliasa Sisa e Olomoïe gini beaha nelo amoïe gäheo i mimogogida, Bödiasa Bailadi eada, Disiligi Yudiaïe gamane beaha aligiloge nelo. Amo gala, Heledoeada Disiligi Galiliïe beaha aligiloge nelo. Amase, edoo Filibiada disiligi äudä, Iduleale Dalagonaidisilele beaha aligiloge nea, Ilisaniaeada Disiligi Abiliniïe beaha aligiloge nelo.

² Gobela ïlo busa edefade Anasale Gaiafasale neebe amo gaaluda, Segelaeäïe malö Yone e sege

udia dolö aligilo made dibeami nebegi, Godea ema ado säla ïaha nelo.

³ Amalebegi, Yonea ödä Yodona dibe amo ga mabela sege dibe amo sulubadelagi nawesa nea, udia dolöma ado mala säla ïahalea, Dilia nafade hamoi amo Godea hëmäia, iso asigi besula ödägi gemolö dialeala säla ïaha nelo.

⁴ Amoïe bea sälo Aisaeäie bebagi ado säla dëdëla negei dibe amoda gowe.

Sege nafade udia dolö aligilo made dibeami nea, afädëa uuala wesalea, Dafidilo Geloi misiäia, idi fodola dadaiaha namialo. Ìe idida, mogolafali fodomalo.

⁵ Dogomo dibe amolige, gau dibe amolige, sulubadela abaha maadelahilä, gogoi dibe amoli sulubadelagi föla nobaha maademalo. Idi halowei dibe amo hedabola mogola fodosa maadelahilä, idi fedafu digafui dibe amoli sulubadela abala bobagisa maademalo.

⁶ Udia dolö nagadaia nefolalebe amoli sulubadelaea, Godeïe damula aulo bimolömelëla uuala wesa neala
säi amo dëdëla negei dialea. *Aisaea 40.3-5*

⁷ Udia dolö yafie Yonea ili ödägi gemäia maala gegedoi nebegi, Yonea ilima sähalea, Dilida säiabëie malö gadoi nebego. Godea së ïmolö amogi fisäla doadigila moholömelëla dilima nowëa säla ïasio.

⁸ Dilia nafade hamosa nelo amo fisila asigi besui nebegoïe gägä negela ulufaha namialo. Dilia dihilimu sähaleada, Nilile naadoda Abalahama nelola sämolöi mademelë. Na dilima ado afädë sähago. Godea igi difolalebe gowe neawelahilä, Abalahamaïe malölali hamomolöi

neamelëla sähago.

⁹ I nefolalebe amoli abulöie i mia gabi bogi dialea. I gägä hedabi made negelo nefolalebe amoli sulubadela abaha maadelahilä, nulogi gob-emolömelëla säi.

¹⁰ Amala säi amo nabalahilä, udia dolö gegedoi nefolalo amolia Yonema nabahalea, Amai nilia edo hamomolödula nabi.

¹¹ Amala nabasebegi, ea säla obëgësalea, Afädëa fagulo äudä dibe ameadä, elö fagulo maade amogali imalo. Amase, afädë molö galebe ameadä, amo gadola wäla hamomalola säla i.

¹² Dolö odoa dagisi muni nelo nefolalo amolige Yonea ili ödägi gemäia misi nefolalo. Iliä ema nabahalea, Säla Olelelo-o, nilia edo hamomolödula nabi.

¹³ Amala nabasebegi, ea ilima säla obëgësalea, Dilia dagisi muni neahalea, gamanea säi amo gadolamu nimalo. Odoa baala nimabiola säla i.

¹⁴ Amo gadola wäla, ami dolö odoaea Yonema nabahalea, Nilia edo hamomolödula nabi. Amalebe, Yonea ilima säla obëgësalea, Udia dolöma muni neahalea, nolealela egedidigila säla nimabio. Amase, odoaie muni nimolöie gudisalea wäfalä säsäla gudimabio. Ami ilia bidi iasebe amoda, dofeala helësëmolö dialeala säi.

¹⁵ Udia dolö asigia sisiläfüla beaha nefolalo amolia asigia, Yone eda Gelesoledula helësëi.

¹⁶ Amala helësësebegi, Yonea ili sulubadelama sähalea, Nada dili ödäea gesa neawemelë. Be, hobeala afädë moholö neebe amoda, nïe geloi amo baagila awäla, eda geloi edefade neebe amo moholömelë. Neda hedabi made ameadä, ie emo

usili fisigämolö amo dofea made neawe. Eada dili Eleloi Gesamilea nulo söalea gemolömelë.

¹⁷ Eada eladi gadoi ëi widi dobi amoïe isole giwile gasala sadia adogola mogeloïe nama gadoi gaula nea. Ea mogela iso amo mosö afädëgi negesilahilä, ïe widi dobilo sege amo gëgelë doala digila, giwi amo nulo usilo made, wisamu neebee ami gobemolömelëla säla ï.

¹⁸ Udia dolö amolile isogi gäwilasila, Yonea ado yafie odoa säla ïalahilä, Ado Mala Hedabi säla ïaha nelo.

Heledoea Yone galabaia negei

¹⁹ Ilile gamane beaha aligilo Heledoea ïe edoo Filibïe udia Helodiasa fedela nii amogige, mala nafade odoa hamoi amogige, Yonea Heledoma nemoi.

²⁰ Amala nemosebegi, Heledoea ïe nafade hamoi amolidaia baala edela, oböla Yone galabaia negei.

Yonea Yesu ödägi gei

(Madiu 3.13-17; Maga 1.9-11)

²¹ Yonea udia dolö sulubadela ödägi gesalea, Yesuge ödägi gei. Amala gesebegi, Yesuea Godebalä adoi amole, mu dusuia gala

²² Eleloi Gesami haea maliabu gadoi Yesudaia digala fii. Amala hamose amo gaalu, selesaia mosöala ado afädë säia idogosalea, Dida nïe malö. Na di boba hamosa neawe. Dima edefademalä obeägïsa neawela säi.

Yesuïe yaua mäula ilile ëi

(Madiu 1.1-17)

²³ Yesuea hä, ie hamoi mi gäwila hamosa nelo amoda, gäheo i nabülasi ohodoa gadoi nea hamosa nelo. Udia dolö nefolalo amoliada, eda Yosebeie malö neala helësësa nefolalo.

Yosebe eda, Hilaiie malö nelo.

²⁴ Hilai eda, Madadaie malö.

Madada eda, Ilibaiie malö.

Ilibai eda, Maligiie malö.

Maligi eda, Yanaiie malö.

Yanai eda, Yosebe edaioie malö.

²⁵ Yosebe edaioda, Madadiasaie malö.

Madadiasa eda, Amosiie malö.

Amosi eda, Nahumuie malö.

Nahumu eda, Eseliie malö.

Eseli eda, Nagaiie malö.

²⁶ Nagai eda, Madaie malö.

Mada eda, Madadiasa elöie malö.

Madadiasa eda, Semeniiie malö.

Semeni eda, Yosegeie malö.

Yosege eda, Yodaie malö nelo.

²⁷ Yoda eda, Yoananaie malö.

Yoanana eda, Elesaiie malö.

Elesa eda, Selubabeleie malö.

Selubabele eda, Sealadieleie malö.

Sealadiele eda, Neliie malö.

²⁸ Neli eda, Melegiie malö.

Melegi eda, Adiie malö.

Adi eda, Gosamaie malö.

Gosama eda, Elemadamaie malö.

Elemadama eda, Eliie malö.

²⁹ Eli eda, Yasuaiie malö.

Yasua eda, Elieseie malö.

Eliese eda, Yolimiiie malö.

Yolimi eda, Madadaie malö.

Madada eda, Ilibaiie malö.

³⁰ Ilibai eda, Simeonoïe malö.
Simeono eda, Yudaïe malö.
Yuda eda, Yosebeïe malö.
Yosebe eda, Yonamaïe malö.
Yonama eda, Eliagimiïe malö.
³¹ Eliagimi eda, Meleaïe malö.
Melea eda, Menaïe malö.
Mena eda, Madadaïe malö.
Madada eda, Nadanaïe malö.
Nadana eda, Debidiïe malö.
³² Debidi eda, Yesiïe malö.
Yesi eda, Obediïe malö.
Obedi eda, Boasaïe malö.
Boasa eda, Salomonoïe malö.
Salomono eda, Nasonoïe malö.
³³ Nasono eda, Aminadabaïe malö.
Aminadaba eda, Adaminiïe malö.
Adamini eda, Alaniïe malö.
Alani eda, Hesolonoïe malö.
Hesolono eda, Feleseïe malö.
Felese eda, Yudaïe malö.
³⁴ Yuda eda, Yeigabaïe malö.
Yeigaba eda, Aisagaïe malö.
Aisaga eda, Abalahamaïe malö.
Abalahama eda, Delaïe malö.
Dela eda, Neholoïe malö.
³⁵ Neholo eda, Seluguïe malö.
Selugu eda, Eleuïe malö.
Eleu eda, Felegeïe malö.
Felege eda, Ebeliïe malö.
Ebeli eda, Selaïe malö.
³⁶ Sela eda, Gainanaïe malö.
Gainana eda, Alabagasadaïe malö.
Alabagasada eda, Semeïe malö.

Seme eda, Noaie malö.
Noa eda, Elamegeie malö nelo.
³⁷ Elamege eda, Meduselaie malö.
Medusela eda, Inogie malö.
Inogo eda, Yaledenie malö.
Yaledene eda, Mahalaleleie malö.
Mahalalele eda, Genanaie malö.
³⁸ Genana eda, Enosie malö.
Enoso eda, Sedeie malö.
Sede eda, Adamaie malö.
Adama eda, Godeie malö nelo.

4

Mugabe busaea Yesu fedogola meli (Madiu 4.1-11; Maga 1.12-13)

¹ Eleloi Gesami Yesuma nobasebegi, e ödä Yodonagila obëgei. Amasebegi, Gesamia e sege nafade udia dolö aligisia made ami sigi awäla ifosi.

² Ami nebegi, mugabe busaea segeyo nabülasi biyidiagi Yesuea nafade hamomabelela fedogola beaha nelo. Amala fedogola beaha nebegi, Yesu e molö made naala neamu, segeyo amo gadola baagisebegi, Yesu e hä, sädä baagoi nelo.

³ Amala hamoi neebe amo bealahilä, mugabe busaea Yesuma sähalea, Di Godeie malö nea galëda, igi gowema wahalo hamomalamola säi.

⁴ Amala säsebegi, Yesuea säla obëgesalea, Ado säla dädëla negei dibe amea sähaleada, Udia dolögali namolö ilo amoda, wahalo nase ameamu ilo mademelëla säla dädëla negei dialeala säi.

⁵ Amala säsebegi, mugabe busaea segebi ilibia neebedaia ami Yesu sigi fedalahilä, gädili

sulubadela dibe amoli ema fodolofali si hamo dagabolo wäla dagabola olesa maadei.

⁶ Amala olelahilä sähalea, Gädili dibe egowe sulubadela sigi namiäiaie geloige, ëi edefadege negali iaha maadei ameada, na imolö helësëse amogali imolöi ameada, hä, digali imolömelë.

⁷ Dia nïe emo mia gumusulahilä, nïe ëi gauia adaseda, digali iaha maademolömelëla säi.

⁸ Yesuea ema säla obëgësalea, Ado säi dibe amea sähaleada, Dafidilo Geloï, dïe Gode neebe amo, dia ië ëi gauia adamalolage, amase, iëmu hamoi hamomalolage, säla dëdëla negei dialeala säi.

⁹ Amala säsebegi, mugabe busaea Yesu Yalusaleme sigi awäla, Godeie mosöa ilibiafali gadogo ifosilahilä sähalea, Di Godeie malö nea galëda, hä, di dihi guila nila sadia idogomo.

¹⁰ Amoie mida, dafidi dëdëla negei dibe amea sähaleada, Ea ië selesaia fii amolima di hedabola sigi namolö mosalola säsegi,

¹¹ igia dïe emo daualoea, ilile naaboea di sogobala gauia adogomolömelëla säla dëdëla negei dialeala säi.

¹² Amala säsebegi, Yesuea säla obëgësalea, Gomälä säi dialea. Dafidilo Geloï dïe Gode neebe amo fedogola bimabiola säla dëdëla negei dialeala säi.

¹³ Mugabe busaea, Yesu fedogola beaha maadelahilä, hobe bu obëgemolöie, fu hogodeläla helësëlahilä, Yesu dïgila asi.

**Yesu e Galili awäla Eleloi Gesamïe
geloigi nea, hamoi mi gäwila
hamosa nelo**

(Ulugu 4.14-9.50)

*Yesuea Galili hamoi mi gäwila hamoi
(Madiu 4.12-17; Maga 1.14-15)*

¹⁴ Gesamia Yesu neala gelolasisebegi, e Galili obëgëi. Udia dolö amodi nefolalo amoli sulubade-laea Yesuea hamoi amoëe ado säi amo nabala dai-dosa maadei.

¹⁵ Ea ilile gedolo mosö nefolalo amoligi nea säla olelesebegi, udia dolö nefolalo amoli sulubade-laea ie ëi gauia adaha nelo.

*Nasalese udia dolö ilia Yesu hamei made nelo
(Madiu 13.53-58; Maga 6.1-6)*

¹⁶ Yesu hï e Nasalese ëdëia ami awäla nea, ea segeyo Sabadagi hï hamolo amo gadola hamo-molöie, e gedolo mosöa ami awäla nogila digai. Digalahilä, beba nidemolöie nowela aligisebegi,

¹⁷ ilia bea sälo Aisaeaie beba gali dilo amo ema neala i. Amasebegi, Yesuea beba amo bobagia gala, ado afädë dëdëla negei dilo amo beagole-lahilä, nidesa nelo amoda gowe.

¹⁸ Dafidilo Geloïie Gesami e nema nea. Mida, na udia dolö busadäoi nefolalebe amolima Ado Mala Hedabi säla imäia, ea nie busagia weli söga negelahilä, ea ne memelei. Udia dolö gide begela nafodoi nefolalo amolima dili fisigälasimolömelëlage, si golai nefolalebe amolima dili bu hedabola bimolömelëlage säla imäia, ne fisiga wei. Amase, dolö odoaea udia dolö daiasala gadiabosa nefolalebe amoli haila digila sigi obëgëmäiage,

¹⁹ Dafidilo Geloia udia dolö obeägilasimolö fu walio dialeala säla imäiage, amala hamomolö mosalola säila

säi.

Aisaea 61.1-2

²⁰ Amala nidesa maadelahilä, Yesuea beba amo galila beba beaha aligilo amo hîma îalahilä, e fila digai. Amala hamosebegi, udia dolö gedolo mosöa sefolalo amoli sulubadelaea ema sisila sefolalo.

²¹ Amala sefolalebegi, ea ilima sähalea, Ado bebagi dëdëla negei nidesebegi, dilia nabaha sefolalo amoda, walio wegi wäla, hä, gausiaha gomelelä säi.

²² Amala säi amo nabalahilä, udia dolö sefolalo amoli sulubadelaea îe ëi gauia adogola, ado hedabi hîdo elöi îe nafigila säi nabi amogi asigigi fudugilahilä sähalea, Egoweda Yosebeie malö madelela säi.

²³ Yesuea ilima sähalea, Udia dolöea ado besula säse go gadola, dilia oböla, nema sähalea, Alögoda-o, dihi wahimalola säla, Gabaniama nea mala hamosa nelo nilia nabi amoda, wige dihi segea nea hamolo amo gadola wäla hamomalola sämolöledu.*

²⁴ Na dilima dofä sähago. Bea sälo neebe amoda hîle segeafalî, udia dolö nefolalebe amolia säla olela gausialo mademelë.

²⁵ Elaia nelo amo gaalu, gäheo i ohodoaie aube gafeia sege made digala mu gala digila esoi dibegi, sege amo sulubadelagi sîdë i edefade dilo. Segeyo amo gaalu, Isilale segea ami dofä udia didalo yafie sefolalo

* **4:23:** Alögoda ea hîle domalo wahimalola säi amoie mida gomälä. Dolö afädëa sähalea, Hamoi elöi afädë hamomolöla säse, ilia ea säse amo dofä gabula helësëmäiada, udia dolöie siigi hamomolö dialea. Damo 18gige 19gige Yesuea säi amoda Godea hamoi edefade ema i amoie säi dialea. Yesuea helësësaleada, udia dolö iliada ea dolöea melëlo made gadoige, hamolo made gadoige dafidi hamoseda, asigi afädë negemolöla sämolö gabula helësëla säi.

²⁶ gaso, Godea Elaiama ili sefolalebea ami mosa-lola made säla, Saidono segeie Salebada gaamugi udia didalo afädë sebea amimu mosaloi.

²⁷ Hä, amo gadola wäla, bea sälo Elaisa neebe amo gaaluge, Isilale segea udia dolö gudubu hamoi yafie sefolalo gaso, amoligi afädë made wahila, gädili Silia fii Naimono afädë emu wahimelëla säi.

²⁸ Udia dolö gedolo mosöa sefolalo amolia amala säi amo nabalahlä edefademalä mihaläi.

²⁹ Ilile gaamu amoda segebidaia dilo. Hä, ili now-elahlä, Yesu naabogi gaula iluala didigila gaamu yala baagido segea asi. E amala sigi awälahilä, däeo bidigi amila bobala saledelä hamosebegi

³⁰ gaso, ili mogogi amila doadigila moholöi asi.

*Yesuea dolö afädëma mugabe fedai nesila digi
(Maga 1.21-28)*

³¹ Amalebe Yesu e awäla Disiligi Galiliie gaamu Gabaniama ami digai. Ami awälahilä, segeyo Sabadagi udia dolö nefolalo amolima säla olelesa nelo.

³² Ea geloi gaulahlä geloi hido elöi olelei amogi, udia dolö ea säla olelese nabaha sefolalo amoli asigigi fudugisa sefolalo.

³³ Gedolo mosöa amida dolö afädëma mugabe nafade afädë fedai sulo. Amea gelola üalala digila sähalea,

³⁴ Wae! Nasalese fii Yesu-o, nili neebeawi dia edo hamomolöie misi. Amai dia nili nufulöie misile. Dida na dawa. Dida mogoi hedabifali, Gode neebeala misimelëla säi.

³⁵ Amala säsebegi, Yesuea nemosalea, Adomabu! Dolö go digila doadigila mosöla säi. Amala säsebegi,

mugabe amea dolö amo udia dolöie sidaia nagadaia nidala awälahilä, neala nafadela made, geleä doadigila asi.

³⁶ Udia dolö nefolalo amoli sulubadela iso asigigi fudugilahilä, hilidomu säla didigahalea, Wae! Ado amoda edo gadoi adodu. Mugabe iliada ea doadigila mosöla säse amo gadola mosäia, mosöla säloie geloi hïdo elöi gaula neebemelëla säi.

³⁷ Disiligi amogi Yesuea hamoi amoie ado säi amo nabala daidosa maadei.

Yesuea Fidaie esöa wahilasi
(Madiu 8.14-15; Maga 1.29-31)

³⁸ Yesu e gedolo mosöa amila Saimonoea mosöa asi. Saimonoie esöa hëgi olo edefademalä oloi dilo amo, Yesuea wahimäia, ilia ema säla i.

³⁹ Amalebe, Yesu e awäla udia amo mia ga madela nea, hëgi olo amoma nemosebegi, hëgila oloi amo damui. Amala säi amole, udia amea nowelahilä, ili molö muäia neala i.

Yesuea udia dolö oloi yafie wahi
(Madiu 8.16-17; Maga 1.32-34)

⁴⁰ Deadi eso digase amo gaalu, udia dolö ilia oloi elö elöla difolalo amoli sulubadela Yesu neebee gaula mofiai. Amalebe, Yesuea ili afädë afädëlama naaboea diigisebegi, ili wahisa maadei.

⁴¹ Amase, ea udia dolö yafiema mugabe fedai nelo amoge sulubadela nesila digisa maadesebegi, mugabe amoli doadigila awähalea, gelola üalala didigala sähalea, Dida Godeie malömelëla säla didigai. Amalebe, Godea Afädë Memelei molömelëla säla negei amo e gabula dawadigisebegi, ea ilima nemosalea adomabula säi.

*Yesu e gaamu odoagi nawesa nelo
(Maga 1.35-39)*

⁴² Yosefalī nowela Yesuea gaamu amo dīgīla, sege udia dolō aligilo made dibeā ami asi. Udia dolō yafie nefolalo amolia hobeala e hogogola awāla e beagolelahilā, di made moholōmelēla sāla, ilia e gauia idogoi.

⁴³ Gauia idogosebegi, Yesuea ilima sähalea, Gaamu odoa difolalebe amoligi, Godea Beaha Maadela Sigi Neebe amoie Ado Mala Hedabi sāla imāia, Godea ne fisiga weimelēla sāla i.

⁴⁴ Hä, Yesu e Disiligi Yudiamadi nawesa nea, gedolo mosō difolalebe amoligi ado mala sāla iia nawesa nelo.

5

*Yesuea ado sāi amo gadola hamosebegi, Saimono Fidaea seme malei nii
(Madiu 4.18-22; Maga 1.16-20)*

¹ Segeyo afädēgi Yesu e oeabo Genesaledi agesua ami nebegi, udia dolō yafie mafula gegedola, Godeie ado mala nabulöie, e neebe amo amalela digilahilā, negegi nelo.*

² Amala hamosebegi, Yesuea du äudā ödā agesua gaula misi dibe meli. Seme digilo dolō amolia du äudā amo negesiā, seme digilo selēgē amoli nigime hēsa nefolalo.

³ Yesu e ödā du afädēdaia fedala nelo. Amoda Saimonoie du. Ea Saimonoma sähalea, Ödā agesu-ala du holöbö eegela fisiga gamola sāi. Saimonoea

* **5:1:** Oeabo Genesaledila sāi amoie ei elöda Galili.

amala hamosebegi, Yesu e du amodaia salea, udia dolö gegedoi amolima säla olelesa sulo.

⁴ Ea ilima säla olelela wagalahilä, Saimonoma sähalea, Du ödä momogolumadi fulula awälahilä, dilia seme nimolöie selögë sadia idogomalola säi.

⁵ Amala säsebegi, Saimonoea säla obögësalea, Dafidilo-o, nilia gasi sedade digisa nea, häuala baagi sësa nelo gaso, dofä isoie afädëge made nii. Gaso, dia säse goeada, na selögë we sadia idogosamelëla säi.

⁶ Amala sälahilä, ilia amala hamosebegi, seme yafie digai amea selögë nulimolöi hamoi.

⁷ Amalebegi, ilia ili gaalu hamolo odoa du elö amogi sefolalebe amolia ili ugila negemolö misiäia, naabo hähawela wei. Ili maala hiligila gauia adogola du äudä amoledaia negesebegi, helegela nobalahilä ödägi usabodelä hamoi.

⁸ Amala hamose amo bealahilä, Saimono Fidaea Yesuie emo mia emo gumusula dia digalahilä sähalea, Dafidilo-o, neda nafade hamolo neawe. Ne dögila di mosalola säi.

⁹ Mida, Fidage odoa ebalä seme digisa nefolalo amoliage, seme yafie nii amo beala fudugi.

¹⁰ Saimonobalä hamoi gaalu hamolo äudä Sebediie malö Yone Yamese eleage amo gadola wäla fudugi. Amala hamosebegi, Yesuea Saimonoma sähalea, Bedämabu. Segeyo walio wila nofela, dia dolö nelo namolömelëla säi.

¹¹ Amalahilä, ilia du dusugala gaula agesua awäla, nelebo sulubadela dögila, ili Yesu bögëla afiai.

Yesuea dolö gudubu hamoi afädë wahi
(Madiu 8.1-4; Maga 1.40-45)

¹² Yesu e gaamu afädëgi nebegi, dolö domalo gudubu hamosa maadei afädë maala, Yesu beala, e mia gumusula dia digalahilä, ema egedigila sähalea, Dafidilo-o, dia ne wahimäiala asigiseda, wahilasimolöi nebegola säi.*

¹³ Yesuea ië naabo mogodigia galahilä, dolö amo diigisa nea sähalea, Na amala asigisa. Di wahimola säi. Amala säia gai amole, dolö amoie gudubu amo fodolofali hogosa helesa maadei.

¹⁴ Amala hamosebegi, Yesuea dolö amoma sähalea, Dofä elöma asiala säloeo. Gobela ilo dolö neebee ami, di siia bimäia olemolö mosalo. Amalahilä, di wahi go udia dolöma olemolöie, di hëmäia Mosesea nelebo odala imalola säla negei dibe amo gadola, odala imalola säla i.

¹⁵ Amala säi gasoda, ea hamoi amoie ado säi amo nabala didigai ameadä, udia dolö yafiea ea ado säse amo nabulöge, ili oloi amoli wahilasimäiage afiala gegedoi.

¹⁶ Amala hamosebegi, Yesuea segeyo yafiegi ili digila udia dolö aligilo made dibeä ami aliga galahilä, Godema adosa nelo.

Yesuea dolö fii si afädë wahi
(Madiu 9.1-8; Maga 2.1-12)

¹⁷ Segeyo afädëgi, Yesuea ado mala olelesa nebegi, Felesi dolö odoage, mala säla negei amo olelelo odoage, misi sulo. Amolida Disiligi Galiliie gaamu dibe sulubadela amilage, Yudialage, amase, gaamu Yalusalemelage mofiai sefolalo.

* **5:12:** Ado Madiu 8.2gi dibe amoge bimalo.

Oloi difolalebe amoli wahimäia, Dafidilo Geloïie geloi Yesubalä maala nelo.

¹⁸ Amala nebegi, dolö odoaea dolö afädë fii si sulo amo dafudaia gaula maalahilä, mosö Yesu neebe amogi gaula digala negedeläie, fu hogosa nelo.

¹⁹ Gasoda, udia dolö yafie gegedoi amolia negegi amea, ilia mumusogi gaula digamolö amo fu maade gabugi, dolö amo gaula mosö figidaia fedalahilä, Yesu neebe amo gaalula mosö figi dusuia gala, Yesuie odagi gaalu dafu amola, udia dolö mogogi ami fisiga idogoi.

²⁰ Ilile asigi afädë negei amo bealahilä, Yesuea dolö amoma sähalea, Ne damelë-e, dia nafade hamoi amo hësa maadeimelëla säi.

²¹ Amala säi amo nalahilä, mala dawadigi amoliage, Felesi dolö amoliage, asigiamu helësësalea, dolö Gode gagadesa neebe goweda nowëdu. Godeamu udia dolöea nafade hamoi amo hëlo nea madelela helësësa sefolalo.

²² Ilia amala helësësa sefolalebe amo bealahilä, Yesuea ilima sähalea, Dilia iso asigigi go helësësa sefolalebegoda, mi edoie.

²³ Dia nafade hamoi amoli hësa maadeila sämolöle, ma, nowela nawesa namiëla sämolöle. Ado aabeida abodo.

²⁴ Amaimo, Dolöie Malö ameada nagadaiawi nea, udia dolö ilia nafade hamoi amoli hëla digimolöie geloi gaula neebela dilia helësëmäiamelëla säi. Amala sälahilä, ea dolö fii si amoma sähalea, Dima sähago. Di nowela, die fëo go neala gaula, hä, dihi mosöa mosalola säi.

²⁵ Amala säi amole dolö amea ilile sidaia fodolofali nowelahilä, fëo e föla adi amo neala gaula, hi

mosöa awähalea, Godeïe ëi gauia adala aligi asi.

²⁶ Amala hamosebegi, udia dolö amoli sulubadela fudugila bedälahilä, Godeïe ëi gauia adala sähalea, Nelebo hïdo elöi melëlo made gadoi, walio nilia beasebemelëla säi.

Yesuea Ilibai wei

(Madiu 9.9-13; Maga 2.13-17)

²⁷ Amo hamosa maadelahilä, Yesu e awäha nea beahamelebe, dagisi muni nelo afädë ëida, Ilibai, e dagisi muni nelo mosöa ami sebe meli. Bealahilä, Yesuea ema sähalea, Ne bögëla misiëla säsebegi,

²⁸ Ilibai e nowela nelebo sulubadela digila, Yesu bögëla asi.*

²⁹ Amalahilä, Yesubalä molö molöie Ilibaia dolö yafie misialola welahilä, ea mosöa molö edefade giai. Dagisi muni nelo yafiege dolö odoage elebalä gegedola molö naha sulo.

³⁰ Amai gaso, Felesi dolö odoaeage, ili sosogo mala dawadigi nefolalo amoliage, Yesuie bögëla aulo nefolalo amolima gögëla sähalea, Dilida dagisi muni nelo nefolalebe amolibaläge, nafade hamolo amolibaläge, molö ödäle naha sebegoda, edoïela säi.*

³¹ Amala säi amo nabalalahilä, Yesuea ilima säla obögësalea, Udia dolö oloi made neebe amolida, alögoda neebea aulo made. Oloi neebe amolimu aulomelë.

³² Ne misiweda, asigi mogoi nefolalebe amoli made, nafade hamolo nefolalebe amoli asigi besumäia wemolö misimelëla säi.

* **5:28:** Ilibaïe ëi elöda, Madiula sälo. Madiu 9.9 bimalo. * **5:30:** Madiu 9.11gi dibe amo bimalo.

*Yesuea molö made naala aligiloie ado säi
(Madiu 9.14-17; Maga 2.18-22)*

³³ Udia dolö nefolalo amolia Yesuma sähalea, Yoneie bégëla aulo nefolalo amoliage, Felesi dolöie bégëla aulo nefolalo amoliage, segeyo yafiegi Godema adosalea molö made naala aligilo amogi, oböla, die bégëla aulo nefolalebe golia molö ödäle nahamu neebela säi.

³⁴ Amala säsebegi, Yesuea säla obëgësalea, Dolö afädëa udia neahalea, udia dolö gegedoi amolia, udia nelo dolö amobalä gedola salea, dilida molö made molömelëla sämolöi gabule.

³⁵ Amaimo, ili neebëa amila odoaea udia nelo amo sigi moholö segeyo fu besela galamolömelë. Segeyo amogida, ili molö made naala namolömelëla säi.

³⁶ Amala sälahilä, Yesuea ado besula sähalea, Afädëa fagulo gähe gadelala neala, fagulo goofogi baala asogelo mademelë. Amala asogeseda, fagulo gähe amo nulilahilä, fagulo gähea fagulo goofogi baala asogei amo afädëdi made bi-molömelë.

³⁷ Amo gadoi elöda, afädëa wani ödä gähe dibe amo, ödä i sugua meme gafodoea hamoi goofogi söga salelo mademelë. Amala hamoseda, wani ödä gähe amëa meme gafodoea hamoi gofo amo dusulahilä, wani ödä amo awäha maadela, meme gafodoea hamoi i amoge nafademolöi nafademolömelë.

³⁸ Amaloea, wani ödä gähe dibe amoda, ödä i meme gafodoea hamoi gähegi söga salimolö d-alea.*

* 5:38: Madiu 9.17gi dibe amo bimalo.

39 Amase elöda, afädëa wani ödä siiba usi amo nalahilä, wani ödä gähe amo molö made halämolömelë. Mida, ea wani ödä siiba usi amo hedabila sämolömelëla säi.

6

Segeyo Sabadagi hamoi made hamola aialo negei

(Madiu 12.1-8; Maga 2.23-28)

¹ Segeyo Sabada afädëgi, Yesu e eladi gadoi ëi widi sagai mogo amogi awäha nelo. Awäha nea, ië bögëla aulo amolia widi amoïe gägä amo faila, naaboea nologela iso hedefala nana awäha nelo.

² Felesi dolö nefolalo amolia nabahalea, Segeyo Sabada gafegi made hamolo negei amo, oböla, dilia hamosebegoda edoïela nabi.*

³ Amala nabasebegi, Yesuea ilima säla obögësalea, Debidige, ebalä aulo amolige, ili sidëa baagosalea, Debidia hamoi dëdëla negei dibe amo dilia made nidei neale.

⁴ Ea Godeïe mosöa nogila digala, beledi Godegali odala i dilo amogi, gobela ilo neebe amoliamu nulo dilo amo nealahilä, odoa hi nahalea, odoa ebalä aulo amoli muäia neala ila säi.

⁵ Yesuea säla wagala sähalea, Dolöïe Malö neebe amoda, segeyo Sabadaïe Dafidilo neala säi.

Segeyo Sabadagi Yesuea dolö naabo baagoi wahi

(Madiu 12.9-14; Maga 3.1-6)

* 6:2: Madiu 12.2gi dibe amo bimalo.

⁶ Segeyo Sabada elögi, Yesu e gedolo mosöa nogila digalahilä, udia dolöma ado mala säla olelesa sulo. Amida dolö afädë naabo dafädi amo baagoi sulo.

⁷ Felesi dolö nefolalo amoliage, mala dawadigi nefolalo amoliage, Yesuma dia nafade hamoimelëla sädelälahilä, ea segeyo Sabadagi oloi afädë wahisebelela bimolöie, ili ga madele nea, sisila beaha nefolalo.

⁸ Amai gaso, ilia helësësa sebe amo dawadigilahilä, Yesuea dolö naabo baagoi sebe amoma sähalea, Di nowela mogogi namolö misiëla säi. Amalebe, dolö amo nowela fedala nelo.

⁹ Amala nowela nebegi, Yesuea ilima naba-halea, Segeyo Sabadagi nilia hamomolö dofeada abodo. Hedabi hamomolö dialeale, ma, nafade hamomolö dialeale. Udia dolö hedabomäia ugila negemolö dialeale, ma, baagomäia nufulö dialealela nabi.

¹⁰ Amala nabalahlä, Yesuea udia dolö sefolalebe amoli sidawewela bealahilä, dolö amoma sähalea, Die naabo mogodigimola säi. Amala säi amo gadola hamosebegi, bu hedabola obëgëi.

¹¹ Amala hamosebegi, ilia edefademalä habobalahilä, hilidomu säla didigahalea, nilia Yesuma abilia hamomolödula säha dilo.

*Yesuea abosolo giwilasi memelei
(Madiu 10.1-4; Maga 3.13-19)*

¹² Segeyo amo gala, Yesu e Godema adomolöie, segebi afädëgi fedalahilä, gasi sedade Godema adosamu salea, segeyo sagai.

¹³ Segeyo sagasebegi, ea ie bëgëla aulo amoli e neebee ami misiäia wei. Ili mofiasebegi, ea

ili nafolala giwilasi memelei. Amalahilä, ilile ëi abosolo negei.

¹⁴ Afädëie ëi Saimono, Yesuea e bu oböla Fida negei amoge, ie edoo Äduluge, Yamesege, Yonege, Filibige, Badolomiuge,

¹⁵ Madiuge, Domasage, Alibiasaie malö Yamesege, Saimono, ilia ema Selodola sälo amoge,

¹⁶ Yameseie malö Yudasage, Yudasa Isagaliada, hobeala Yesu hololömolö amoge, amoli Yesuea memelei.

Yesuea udia dolö oloi yafie wahi
(Madiu 4.24-25; Maga 3.7-12)

¹⁷ Yesula dolö amolali segebidaia amila digafula, sege hedabi fufuia asi dibeami nefolalo. E bögëla aulo yafie odoa amola hiligila ami nebegi, udia dolö yafie Disiligi Yudiaie sege dibeamo sulubadelagilage, gaamu Yalusalemelage, Daia gaamule Saidono gaamule duhulu ga madela dibeamilage, mafula gegedola negeginelo.

¹⁸ Amoli mofiai amoda, Yesuea säseamo nabadigi, ea oloi amoli wahila digimäiage mofiai. Amase, mugabe fedai mafui amoli Yesuea nesiladigisebegi, wahisa maadei.

¹⁹ Geloi ema dibeamea udia dolö amoli sulubadela ea wahisa maadese amogi, udia dolö sulubadelaea Yesuma diigimolöila helësëi.

Yesuea gumusui nefolalebe amolia obeägisa neamelëla säi
(Madiu 5.1-12)

²⁰ Yesuea ie bögëla aulo amolima siila neasähalea,

Gumusui nefolalebe dilida, obeägisa nea. Mida, Godea Beaha Maadela Sigi Neebe amoda, dilile dibe amogi.

²¹ Walio sîdêa baagosa nefolalebe dilida, obeägisa nea. Mida, hobeala dili molö bolela molö amogi.

Walio diisa nefolalebe dilida, obeägisa nea. Mida, hobeala dilia ösa namolö amogi.

²² Dili Dolöie Malö amoie neëgi, udia dolö odoaea dilima bimolö habobasege, nesila digisege, ado nafadela säsege, dilile ëi gagadela säsege, amo gadola hamose amo sulubadelagi, dilida obeägisa nea.

²³ Ilia dilima mala amo gadoi hamoseda, segeyo amo gala dilia hîdo elöla helëla obeägisa namialo. Nabuö. Dilile bidi edefade Hebeni mumului di-alea. Mida, siiba ilile mâu nefolalo amoliage bea sälo nefolalo amolibalä amo gadola wäla hamosa nelomelë.

²⁴ Amaï gaso, walio nelegei yafie negelo dafidilo dolö nefolalebe dili, asigii gabu. Mida, dili namolö aabei hedabi amo neaha maadesalea, elö nimolö made amogi.

²⁵ Walio molö bolela nûlo sefolalebe dili, asigii gabu. Mida, hobeala dili sîdêa baagomolö amogi.

Walio ösa nefolalebe dili, asigii gabu. Mida, hobeala dili gualösa nea, diisa namolö amogi.

²⁶ Udia dolö sulubadelaea dilile ëi gauia adogosebe dili, asigii gabu. Mida, siiba ilile yauaalali dafidi nefolalo amoliage wäfalî bea sälo nefolalo amolibalä amo gadola wäla hamosa nelomelë.

*Ado nii boba hamomolö mala**(Madiu 5.38-48)*

²⁷ Yesuea ado aso, sähamu nea sähalea, Na ado säse nabase dilima sähago. Dilibalä ado nii nefolalebe amoli boba hamosa namialo. Dilima bimolö habobaha nefolalebe amolima dilia hedabi hamomalo.

²⁸ Odoaea Godea dili neala nafademäiala säsege, Godea ili ugila negela hedabolasimäia sämallo. Dilima nafade hamosege, diliada ilile Godema adolasisa namialo.

²⁹ Amase, afädëa dïe ba näiädo go nufudaseda, ba näiädo goge ema besula olemalo. Afädëa dïe gögï fagulo neala gaula awälahilä, bu elö neasege beasimalo.

³⁰ Udia dolö sulubadelaea dima nelebo afädë imola ëdëgësedä, imalo. Amase, afädëa dïe nelebo afädë neala gaula awäsedä, ia obëgëmolä egedigila sämabio.

³¹ Odoaea dilima mala hamomäiala hamelo amo gadola, diliage ilima amo gadola wäla hamomalo.

³² Dili boba hamolo amoli boba hamosedä, dili udia dolö hedabi neebela nowëa helësëmolödu. Nafade hamolo nefolalebe amoliage, ili boba hamolo neebe amoli boba hamolo nea.

³³ Amalahilä, dilima hedabi hamolo neebe amolima hedabi hamola obëgësedä, dili udia dolö hedabi neebela nowëa helësëmolödu. Nafade hamolo neebe amoliage amo gadola wäla hamolo nea.

³⁴ Dilia nelebo afädë iahalea, dabe imäiala iäsedä, dili udia dolö hedabi neebela nowëa helësëmolödu. Nafade hamolo neebe amoliage nafade hamolo odoaea ili dabe imäialahilä ilo nea.

³⁵ Gasoda, dilibalä ado nii neebe amoli boba hamosa namialo. Ilima hedabi hamosa neada,

nelebo afädë ilima ïahalea, hobeala dabe ïmäiala ïmabio. Amala hamoseda, dilia bidi edefade amo gaula, Dofä Ilibia Edefade neebe amoïe malö namolömelë. Mida, ema nesegele made neebe amolimage, nafade hamolo neebe amolimage, mala hedabi hamolo nea.

³⁶ Dilile Diado neebe amea ugila negelo neebe amo gadola, diliage ugila negesa namialo.

Dilia udia dolö odoaea hamosebe amo mogemabiola säi

(Madiu 7.1-5)

³⁷ Yesuea ado aso, sähamu nea sähalea, Dilia odoaea hamose amo made mogemalo. Amala hamoseda, dilimage made mogemolömelë. Odoama asiala hamoi gabumelëla made sämalö. Amala hamoseda, dilimage asiala hamoi gabumelëla made sämolömelë. Amase, dilia odoaea nafade hamoi amo hëla fisimalo. Amala hamoseda, dilia nafade hamoi amoge hëla fisimolömelë.

³⁸ Dilia nelebo odoagali ïmalö. Amala ïaseda, diligalige ïmolömelë. Diligali ïmolö amoda, holöfali made. Baala ïasegi, adugi eegela salala nobala adugai ïmolömelë. Mida, dilia odoagali mogela ïase amo gadola, diligalige amo gadola wäla mogela ïmolömelë.

³⁹ Amala sälahilä, Yesuea ilima ado besula säi. Dolö si golai elöea si golai elö amo naabogi gaula sigi aulole. Sigi awäsedä, helegela balagula döögögi digalo madele.

⁴⁰ Ema olelesebe amo gadola bögëla hamolo neebe ameada, ïe olelelo neebe amo baagilo mademelë. Gaso, ea oodo bibila hamola

dawadigisa maadelahilä, olelelo amohi gadoi aligilomelë.

⁴¹ Amaimo, dia die didooie sihidoa gëgelë holöbö diëda melëlo amo, amai dihile sihidoa i gai gadoi dibe amo helësëlo made amoda, edoie.

⁴² Dia dihile sihidoa i gai gadoi dibe amo fädäla made beala, didooma sähalea, Nedoo, die sihidoa gëgelë digai dibe alogo neahagola abilia sämolö gabu. Asigi fea negelo, dihile sihidoa i gai gadoi difolalebe amodale neadigilahilä, hobeala die didooie gëgelë dibe amo hedabola beala neadigimolöi bimolömelëla säi.

I neebe amea gägä negelo
(Madiu 7.16-20; 12.33-35)

⁴³ Yesuea ado aso, sähamu nea sähalea, I hedabi neebe ameada, gägä nafade negelo made. Amase, i nafade neebe ameada, gägä hedabi negelo mademelë.

⁴⁴ I neebe amolia gägä negesebe amo bealahilä, i gowe gadoi neebela helësëlomelë. I äyo gägäi neebea ami awälahilä, dolöea äfäeo gägä gabula failo made. Amase, buudi äyo gägäi neebea ami awälahilä, dolöea gelebi gägä gabula failo made nea.

⁴⁵ Afädë hedabi neebe ameage, hile iso asigigila hedabi dibe amo gadoi ulufadigilo nea. Amase, nafade neebe ameage, hile iso asigigila nafade dibe amo gadoi ulufadigilo nea. Helësëlo isogi nobala adugai dibe amo gadoida, adoea ulufadigilo neala säi.

Dolö äudäea mosö ulila säi
(Madiu 7.24-27)

⁴⁶ Yesuea ado aso, sähamu nea sähalea, Na ado säsebewe dilia made bēgēla hamosalea, nema, Dafidilo Geloi-e, Dafidilo Geloi-ela säha nebegoda edoie.

⁴⁷ Afädē ne mia maalahilä, na ado säsebewe nabala bēgēla hamoseda, na dilima eda dolö gowe gadoi neala säla ulufadigisagomelē.

⁴⁸ Dolö amoda, afädēa mosö olelo amo gadoi nea. Dafidi ea igidaia dögöla, igi bobogamu salalahilä, mosö uli nebegi, hobeala sege digala ödä bëi edefade asi amea, mosö amo nufi gaso, fogomolöi made nelo. Mida, dolö amea mosö geloi hedabi uli amea.

⁴⁹ Amaï gaso, afädēa nīe ado nabala, made bēgēla hamolo neebe amoda, dolö afädēa mosö nagadaia igau hedabola sagala made uli amo gadoi nea. Ödä bëi edefade asi amea mosö amo fogoi amole fodolofalī dagabola digala, nafademolöi nafadeila säi.

7

Yesuea ami beaha aligiloie hamoi hamolasilo afädē wahilasi

(Madiu 8.5-13)

¹ Yesuea ado amo udia dolöma säla iäha maade-lahilä, e Gabaniama awäla besela galai.

² Amida, ami hädali afädē beaha aligilo nelo amoie hamoi hamolasilo afädē, ea edefademalä boba hamoi nelo amo, oloi baagomolöfalī dilo.

³ Amala dibegi, odoaea Yesu neala säi amo nabalahilä, beaha aligilo amea Yu udia dolö ilile asigi gäwi dafidilo amolima sähalea, Yesu maala,

ie hamoi hamolasilo oloi amo wahimäia, ema säla imolö mosaloi.

⁴⁻⁵ Ili awäla, Yesuma gelola sähalea, Dolö beaha aligilo ameadä, Yuda nili boba hamolahilä, nilile gedolo mosö ea olasi ameadä, dia e ugila negeomöda, dofea galea. Eda hedabimelëla säi.

⁶ Amala säsebegi, Yesu e, hä, ilibalä asi. Awäla hä, mosö ga madela suägila nebegi, beaha aligilo amea e damelë odoa amolima ado säsisalea, Yesu gagai awäla ema gomalä säla imalo. Dafidilo-o, dida na mosöa baagi sëla moholö gabu. Nafade ne gadoia mosöa di nogila digamolö amoda, dofea made gabumelë.

⁷ Ne dofea madela helësëse weada, nihï di neebea maala säla moholö amoge dofea made gabumelë. Dia adoeamu säsimäia. Säседа, nie hamoi hamolasilo amo wahimolö.

⁸ Na säsebe amoie mida, gomalä. Nage ami beahamu aligilo geloi nefolalebe amoli hawa aligilo. Amase, ami dolö odoa nefolalebe amoliage, ne hawa aligilomelë. Na afädëma mosöla säседа, e aulomelë. Amase, elöma misiëla säседа, e mulomelë. Na nie galabaia hamoi gadoi hamolasiloma gowe hamomola säседа, amo gadola hamolomelëla säila säla imalola säi.

⁹ Amala sämalola säla i amo nabalahilä, Yesu e, ea säi amogi edefademalä fudugilahilä, besuia imogola nea, udia dolö yafie e bögëla mofiasëbe amolima sähalea, Na dilima säla iahago. Afädëa asigi afädë go gadola negei neebe, na made meli. Isilale udia dolö hili iligige, egowe gadola negei neebe, na made melimelëla säi.

¹⁰ Amala säsebegi, dolö mosaloi amoli mosöa obögëlahilä beahamelebe, hamoi hamolasilo amo,

hä, wahi sebe meli.

Yesuea udia didalo afädëe malö nowelasi

¹¹ Holöbö nelolahilä, Yesu e Naina gaamugi molö awäsebegi, ie bégëla aulo amolige, udia dolö yafie odoage gedola ebalä afiai.

¹² E awäla, gaamu yala amalei amoie idi nogila digalo mia besela galaha nebegi, dolö odoaea baagoi afädë baumolöie, yala baagido gaula mofiaha dibegi, gausiala digai. Baagoi amoie emeada, dolö malö afädë amomu sogobai sulo. Eme amoda, didalo sulo. Gaamugi ami fii udia dolö odoa yafiege ebalä mofiaha dilo.

¹³ Dafidilo Geloia udia didalo amo beala, edefademalä bobasëlahilä, ema sähalea, Diimabula säi.

¹⁴ Amala sälahilä, Yesu e iwasala gaui amo ga madela ami awäla nea, iwasala gaui dafu amogi diigi. Amalebe, iwasala gaulo dolö amoli nefolalo. Yesuea sähalea, Malö malisä, na dima säha. Nowemola säi.

¹⁵ Amala säsebegi, malö baagoi amo nowela galala adoi. Adosebegi, Yesuea malö amoie eme amo hïma i.

¹⁶ Udia dolö nefolalo amoli sulubadela fudugila bedälahilä, Godeie ei gauia adogola sähalea, Bea sälo edefade afädë nili neebeawi maala, ulufadigila besela galalahilä, Godea ie udia dolö ugila negeomolö misi gabula säi.

¹⁷ Yesuea amala hamoi amo udia dolö amolia gaula afufula, Disiligi Yudiamadige, sege odoa ga madela dibe amoli sulubadelamadige, säla daidosa maadei.

Ödägi gelo Yonea ie bögëla aulo äudä Yesu neebee mosalo

(Madiu 11.2-19)

¹⁸ Yoneie bögëla aulo amolia Yesuea nelebo hamoi amo ema säla i. Amala säla iasebegi, Yonea ie bögëla aulo äudä amole misialolahilä

¹⁹ elema sähalea, Alia Dafidilo Geloima gomalä nabulö mosalo. Afädë moholömelëla säi amoda, dile, ma, nilia elö beaha namolöledula nabualola säla i.

²⁰ Amala säsebegi, ele awälahilä Yesuma sähalea, Alida ödägi gelo Yonea di neebee misialosebegi misimelë. Ea dima gomalä nabualola säσιο. Afädë moholömelëla säi amoda, dile, ma, nilia elö beaha namolöledula nabulö mosalola säsebegi misimelëla säi.

²¹ Amo galada, Yesuea udia dolö olo elö elöla oloi difolalo amoli wahila digi, mugabe nafade fedai difolalo amoli nesila digila digi, si golai difolalo amoli siia bimäia, wahila digisa nelo.

²² Hä, Yesuea dolö äudä amolema säla obögësalea, Ali Yone neebee obögëla awälahilä, gomalä säla imalo. Alia walio nelebo hamose meli amoge, nabi amoge, ema säla iahaleada, Si golai nefolalo amolige, siia beaha maadela, emo nafadei sefolalo amolige, emesala nawela, gudubu hamoi sefolalo amolige, wahisa maadela, amase, gëhe gai sefolalo amolige, nabaha maadela, baagoi difolalo amolige, nowelasisa maadela, busadäoi nefolalebe amolima Ado Mala Hedabi säla iaha neebee-ola sämalö.

²³ Afädëa ne beala ie asigi afädë negei amo made digase amoda, obeägisa neamelëlage, säla imolö

mosalola säla i.*

²⁴ Malö äudä Yoneie ado gaula mosalalo amole obөгëibua, Yesuea udia dolö gegecola nefolalo amolima, Yoneie helësëla sähalea, Sege nafadeia udia dolö aligilo made dibeami afiai amoda, dilia edo bimolö afiai. Dili afiai amoda, giisi sedade foea auai dibe amo bimolö afiaile.

²⁵ Amai made galëda, dili afiai amoda, edo bimolö afiai. Dolö afädëa fagulo hedabifalimu salugai neebe amo bimolö afiaile. Nabuö. Fagulo hido elöi salugaloge, domaloie molöge, nelegeige, yafie negelo amolida, ginia mosöa dilo neamelë.

²⁶ Gaso, dili afiai amoda, edo bimolö afiai. Bea sälo afädë neebe amo bimolö afiaile. Ä, amomelë. Amai galëda, na hä, dilima sähago. Bea sälo ameada, bea sälo odo baagila asi neamelë.

²⁷ Ie helësëla, gomalä dëdëla negei dialea. Nabuö. Nie ado säla ilo amo, die dafidila mosalamolömelë. Di e baagia emesala nawemolöie, ea die idi fodolasimolömelëla säla dëdëla negei dialea.

²⁸ Na dilima säla iahago. Udiaea neegela ägüi sulubadela amoligida, afädëa Yone made baagila asi nea. Gaso, Godea Beaha Maadela Sigi Neebea ami ei maade, holöbö gidogofali ameada, Yone baagila asi neamelëla säi.

²⁹ Udia dolö amoli sulubadelaeage, dagisi muni nelo amoliage, Yesuea säi amo nabalahlä sähalea, Godea mala hamosebe amoda, sulubadela mogoimu hamolo dialeala säi. Amala säi amoie mida, Yonea ödägi gesa nelo amogi ilige gei nefolalo.

* **7:23:** Madiu 11.5gi säi dibe amo bimalo.

³⁰ Gasoda, Felesi dolö amoliage, mala säla negei amo olelelo dolö amoliage, Yonea ili ödägi gemäia hamei made nelo amea, Godea hamei dibe ilima olei amo baagi i.

³¹ Yesuea ado aso, sähamu nea sähalea, Udia dolö walio neebe gowe ili ado abodo gadoima, oodo beala sämolödu. Ilida edo gadoi neadu.

³² Ilida malësäea magaia gaamugi salea, malësä odoama uuala säia gala sähalea, Nilia dilile bäidama dülasilebeda, dilia gosala made aligisio. Amase, nilia oböla, dilile bobasëi gë udäi amogige, dilia bobasëla diila made nelomelëla sälo amo gadoida ili nea.

³³ Mida, ödägi gelo Yone e maala neada, beledige wani ödäge made naala nebegi, dilia sähaleada, E mugabe fedai neala sälomelë.

³⁴ Amase, Dolöie Malö maala neada, molö ödäge naala nebegi, dilia sähalea, Wae! Dolö goweada, molö memelela made, badoia nüloge, wani ödäge edefade naala gagaolo dolö gabu. Goda, dagisi muni neloge, nafade hamologe nefolalebe amolile damelë go beasebelela sälomelë.

³⁵ Amala sälo gaso, Godeie asigi falagasei amoda mogoimu dialeala ie malö neebe amolia ulufadig-ilola säi.

Udia afädëa Yesuie emogi weli söga negei

³⁶ Felesi dolö afädëa Yesu e ea mosöa molö molö misialola säsebegi, e ami awäla molö naha sulo.

³⁷ Nafade hamolo udia afädëge gaamu amogi sulo. Udia amea nabelebe, Yesu maala, Felesi dolö amea mosöa molö naha saleala säi amo nabalahilä, weli hedabi gafisigäi hido elöi ödä i igia hamoigi usi dilo amo gaula misi.

³⁸ E hä, Yesu baagido ga madela maala nea, diisa nelo. Siaholö amea, Yesuie emodaia dögi. Siaholöea nahi amo, udia amo hile busa hilia dogä digilahilä, Yesuie emogi gaula mimisa sulo. Amalahilä, weli gafisigäi usi gaui amo, Yesuie emodaia ami söga negei.

³⁹ Amala hamosebegi, e misialola sälo Felesi dolö amea hïdomu helësësälea, dolö gowe bea sälo galebeda, udia ema diigisebe goweda gowe gadoi, ea nafade hamosamu filola dawadigilabio gabula helësëi.

⁴⁰ Yesuea ema sähalea, Saimono-o, na dima ado afädë sämolö helësësebe amo sähagola säi. Amala säsebegi, Saimonoea sähalea, Säla Olelelo-o, sämola säi.

⁴¹ Amala säsebegi, Yesuea sähalea, Dolö äudäea muni gaui dolö afädëma muni bidi negela nelo. Elö ameada, giwi siliba hädali bia bidi negei. Amase, elö ameada, giwi siliba nabülasi bia bidi negei.*

⁴² Elea muni beselala ia obëgëmolö amo maade gabugi, muni eedo amea elema sähalea, Gamelä. Fisisagola säi. Hä, dia helësëseda, muni gaui dolö amoma edefademalä boba hamomolö amoda, abodoea gabula nabi.

⁴³ Amala nabasebegi, Saimonoea sähalea, Muni edefade bidi negei fisi amealedula säi. Amala säsebegi, Yesuea sähalea, Dia hedabola helësëi gabula säi.

⁴⁴ Amala sälahilä, e besuia imogola udia amoma siila nea, Saimonoma sähalea, Dia udia gowe

* **7:41:** Muni giwi silibala säi amoda, dolö afädëa segeyo afädëgi hamoi hamola muni bidi nelo amo gadoi. Giligi adoeada, *denaliusala* sälo.

beasebele. Ne dīe mosōa maasebegi, nīe emo nigime hēmāia, dia ne ödā osala made iasio. Gaso, udia goweie siaholō nīe emodaia dōgi amo, obōla, hīle busa hīlīa dogasisio.

⁴⁵ Ne maasebegi, dia ne gaula made mimisio. Gaso, ne dafidi misia amila udia goweia, fisila made, nīe emogi gaula mimisio.

⁴⁶ Dia nīe busagia weli made hēi, gaso udia goweia weli gafisigāi gaula maalahilā, nīe emogi hēsio.

⁴⁷ Amaimo, na dima sāla iahago. Ea ne ede-fademalā boba hamolahilā hamoi ameada, ea nafade yafie hamosa sulo amoda, Godea hēsa maadeimelēla ulufala oleimelē. Amaimo, dolō afādēa nafade holōfalī hamoi amo hēi ameada, holōfalī boba hamolomelēla sāi.

⁴⁸ Amala sālahilā, Yesuea udia amoma sāhalea, Dia nafade hamoi amoda, na hēsa maadeimelēla sāi.

⁴⁹ Amala sāi amo nabalahlilā, molō naha sefolalo odoa amolia hilidomu didiāhalea, nafade hamoi hēlo neebe egoweda, nowēdula didiāha dilo.

⁵⁰ Amala didiāha dibegi, Yesuea udia amoma sāhalea, Dihī Godema asigi afādē negei amea, di damula asimelē. Dalulo salugala mosalola sāi.

8

Udia odoaea Yesu bēgēla asi

¹ Holōfalī nelolahilā, Yesu e gaamu sulubadelagige, sege sulubadelagige, nawesa neada, udia dolōma Godea Beaha Maadela Sigi Neebe amoie Ado Mala Hedabi sāla iia asi. E awāse amo gadola giwilasi amolige,

² udia odoa mugabe nafade fedaige, oloige sefolalebegi, Yesuea dafidi nesila digila wahi sefolalo amolige, ebalä asi. Gaamu Magadala udia ëi Meli negei sulo amoma, dafidi mugabe gifalädalä fedai sebegi, Yesuea nesila digi amoge,

³ udia elö Yoanage, eda Gusaie udia sulo. Egoa ameada gini Heledoie mosö sigi aligilo nelo. Amase, Susanage, udia yafie odoage ebalä asi. Udia amoliada, ilile nelebo gaui amea, Yesuge, giwilasi amolige, ugila nelegela awäha nelo.

*Yesuea ado besula, molö gägä fëfëila säi
(Madiu 13.1-9; Maga 4.1-9)*

⁴ Gaamu dilo amoli sulubadelagila udia dolö yafie Yesu nebea ami mafula gegedoi dibegi, Yesuea ado besula säla iahalea,

⁵ Dolö afädëa molö gägä sagaido fëfëla aligi asimelë. Ea fëfëla aligi awäha nebegi, gägä odoa idiafa daala negei amo, udia dolöie emoea emesala dagui dibegi, haea maala neala naha maadei.

⁶ Gägä odoada, igi naga abelëidaia daala negelahilä, duulu fedala bäui gaso, ödä maadesalea bausoi.

⁷ Amase, gägä odoada, ëfë äyo gägäi nebea daala negelahilä, ëfë äyo gägäi amola gedola fedala, yau hai nelo.

⁸ Gägä odoa naga hedabi dibeä daala negei ameada, baulahilä i afädë afädëlaea gägä hädali afädë afädëla negeimelëla säi.

Yesuea ado besula säha maadelahilä gelolafali sähalea, Afädëa gëhea nabulöi galëda, hä, nabualola säi.

*Yesuea ado besula sāmölö mi dibegi sāi
(Madiu 13.10-17; Maga 4.10-12)*

⁹ İe bēgēla aulo amolia ado besula sāi amoïe, ema mi fädäla nabi.

¹⁰ Amala nabasebegi, Yesuea sāla obēgēsalea, Godea Beaha Maadela Sigi Neebe amoïe helēsēmolöda dafidi, odoa ulufadigi made, musügä negei dilo amo, diliamu mi dawadigimäia imelē. Amaimo, udia dolö odoa ilima ado besulamu sāla ilo amoda,

ilia beaha gaso, galone gowe gabula made bi-molömelē. Amase, ilia ado nabaha gaso, asigia fädäla made helēsēmolömelēla

sāi.

Aisaea 6.9

*Ado besula sāi amoïe mi fädäla sāi
(Madiu 13.18-23; Maga 4.13-20)*

¹¹ Yesuea ado aso, sāhamu nea sāhalea, Ado besula sāi amoïe mida gowe. Gägä gadoida, Godeïe ado malamelē.

¹² Udia dolö odoaea ado mala nabase amolida, gägä fēfēi idiafa digai amo gadoi nea. Ilia nabala asigi afädē negesegi, Godea ili damula auloea, mugabe busaea hobeala maalahilä, ado mala nabi isogi dibe amo neala gaula aulo neamelē.

¹³ Molö gägä igi naga abelēidaia daala negei amo gadoida, udia dolö odoaea ado mala nabala, obeägila, aabela neala gaulo. Gaso, ili asigi afädē negei amo, difi made awäla, fedogola melēlo segeyogi, digila aulomelē.

¹⁴ Molö gägä ēfē äyo gägäi neebee daala negei amoda gowe gadoi. Udia dolöea ado mala nabelo nea gaso, ili awäla nagadaia namolöïe nelebo odoagi asigia säosäologe, nelegei negelo namolöge,

amase, domaloea gelola hameloge, amala helësëse ameada, ado mala nabi amo dedelela yau hahalea, gägä negei amo hedabola bëlo made neamelë.

¹⁵ Molö gägä naga hedabia daala negei amo gadoida, udia dolöea iso asigi mogoi hedabi negei neebe amolimelë. Ilia ado mala nabala, fisila made, aso maadela, gelola aligilo amea, gägä yafie negelo neamelëla säi.

*Gamali wai musügä made negeloie säi
(Maga 4.21-25)*

¹⁶ Yesuea ado aso, sähamu nea sähalea, Afädëa gamali wala sagaseda, faloea made dabelo. Imidi hawage made negelomelë. Amala made. Ea walahilä, udia dolö mumusogi maase amolia yo amo bimäia, aulidaia negelo nea.

¹⁷ Nelebo sulubadela musügä negei dibe amoda, ulufadigisa maademolömelë. Amase, dabela negei dibe amoge dawadigisa maadela, ulufadigisa maademolömelë.

¹⁸ Amaimo, dilia ado nabahalea, hedabola helësëla nabualo. Afädëa nelebo gaula neebe amomada, odoa baala imolömelë. Afädëa nelebo afädë gaui made nea gaso, holöfalä gaula neebe amo dofea gaula neala helësësa neebe amoda, fedela nimolömelë.

*Yesuie edoo emelalida nowë
(Madiu 12.46-50; Maga 3.31-35)*

¹⁹ Segeyo amo gala, Yesuie eme edoolali e nee-bea ami misi. Gasoda, udia dolö yafie gege-dola negegi dilo amea, ili e nee-bea ami nogila digamolö fu made meli.

²⁰ Amalebeda, ili ifo baagido nefolalebegi, afädëa ema sähalea, Dibalä adomolöie dieme didoolali ifo baagido misi neebela säla i.

²¹ Amala säsebegi, Yesuea sähalea, Godeie ado nabala bögëla hamosa neebe amolida, nïe neme nedoolalida, amolimelëla säi.

*Yesuea fo ödälema säi
(Madiu 8.23-27; Maga 4.35-41)*

²² Segeyo afädëgi, Yesula ie bögëla aulo amolali dudaia fedala fifigilahilä, Yesuea ilima sähalea, Nili oeabo dögëla näiado alogodigogi afiadila sälahilä afiai.

²³ Dudaia fifigila afiai gaso, Yesu eda adi dilo. Amala adi dibegi, fo edefade gelola guula maasebe amea, ödä aidagula dudaia häila fedalahilä, ili ödäea nudulä hamoi.

²⁴ Amala hamosebegi, ie bögëla aulo amolia Yesu dibeä ami awälahilä, e didiigisalea sähalea, Dafidilo-o, Dafidilo-o, nili ödäea nudulä hamosebela säi. Amala säsebegi, Yesu e nowela fedalahilä, fo guula maase amomage, ödä aidagula fedasebe amomage nemosebegi, fo guula misi amoge boogelega, ödä aidagula fedai amoge aumalasi.

²⁵ Amala hamolahilä ilima sähalea, Dilia asigi afädë negei amoda, abidi dialeala nabi. Amala nabasebegi, ili fudugila bedälahilä, hilidomu didiähalea, Dolö goweda nowëdu. Fole ödälema nemosegi, eleada, ie ado nabelo gabula säla didiäi.

*Yesuea dolö afädëma mugabe fedai nesila digi
(Madiu 8.28-34; Maga 5.1-20)*

²⁶ Amala hamolahilä, ili afiala sege Gelasa fii mosöa besela galai. Sege amoda Galilä oeoabo amo dögëla alömodi dilo.

²⁷ Yesu e dudaiala agesua daala aligisebegi, dolö afädë gaamugi ami fii mugabe odo a fedai nelo amo maaha nebegi gausiala digai. Dolö amoda, siibafalä fagulo made gäla nelo amo neada, mosöa made diala, igi äbä baagoi giwi gasa dibe a amimu diaha aligilo nelo.

²⁸ Dolö amea Yesu beala gelola üalalahilä, Yesuie emo mia gumusula dia digala gelolafalä sähalea, Yesu, Gode Dofä Ilibia Edefade neebe amoie Malö, dia nema edo hamomolö. Dia ne së imabiola fudugila gelola säi.

²⁹ Yesuea mugabe nafade amoma dolö amo digila mosaloi amea amala säi. Ilia ie naabo emoge igi ëfëa nafodola negela sigi aligisamu nelo gaso, segeyo yafiegi ema mugabe fedala, igi ëfë hësäla sadia gahamu aligilo. Mugabe amea e yamu galahilä, sege udia dolö aligilo made dibe a ami nawelasisamu aligilo.

³⁰ Hä, Yesuea ema, Dë ëida nowëla nabi. Amala nabasebegi, ea säla obëgësalea, Maleimelëla säi. Mida, ema mugabe yafie fedai amea, amala säi.

³¹ Amala sälahilä, mugabe fedai amolia Yesuma gelolafalä sähalea, Dia nili sege uli nafade, mia made dibe a ami mosölada, sämabiola säi.

³² Amo gaalu sugua yafie gau ga madela nea, moosa nefolalo. Mugabe amolia Yesuma gelolafalä sähalea, Dia nilida sugua egowelima nogila fedamolö mosöla sämola säi. Amalebe, Yesuea ilima, Ü, amamalola säi.

³³ Amala säsebegi, mugabe amolia dolö amo

dīgīla awāla, sugua amolima nogila fedai. Amalebegi, sugua amoli gau domaladi baluluia digafula oeaba nogila digala, ödäea naha maadei.

³⁴ Amala hamose amo bealahilä, sugua sigi aligilo amoli baluluia afufulahilä, gaamu dibe amige, mosö gägäwila asi dibe amige, säla iaha maadei.

³⁵ Amala säi amo nabalahlä, udia dolö amolia abilia hamoi walebelela, fädäla bea afiai. Ili afiala Yesu nebea beahamelebe, dolö dafidi mugabe fedai nelo amo fagulo salugala, asigi hedabi negela obögēlahilä, Yesuie emo mia sebe amo beala, ili bedäi.

³⁶ Meli amolia udia dolö mofiai nefolalebe amolia nabuäia, dolö mugabe fedai nelo amo Yesuea gomälä hamola nesila digisebegi, wahimelēla säla i.

³⁷ Amasebegi, udia dolö Gelasa segeamadi sefolalebe amoli sulubadela edefademälä fudugila bedälahlä, Yesuma sähalea, Dida wi namolö made. Mosalola säi. Amala säsebegi, Yesu e hä, dudaia fila bu obögēsebegi,

³⁸ dolö dafidi mugabe yafie fedai nebegi nesila digi amea, Yesuma gelolafalä, Ne dibalä mudulela nabi. Amala nabasebegi, Yesuea obögēmalolahilä, ema sähalea,

³⁹ Di dihi segea obögēlahilä, Godea dima hamoi amo säla imolö mosalola säi. Amala säsebegi, dolö amea hile gaamu dibe sulubadelamadi, Yesuea ema hamoi amo säla iia awäha nelo.

Yalusüe idiwige, udia Yesuie fagulogi diigi amoge

(Madiu 9.18-26; Maga 5.21-43)

⁴⁰ Yesu e dudaia fila oeabo amo agesu năiado alömodi bu obëgësebegi, udia dolö gegedoi amolia, e maase amogi obeägila, e säla olei. Mida, sulubadelaea e misiäiala beaha sefolalo amea.

⁴¹ Dolö afädë misi amoie ëida Yalusi. Eda gedolo mosö beaha aligilo nelo. Ea Yesuie emo mia emo gumusula dia digalahilä, ema gelola egedigila sähalea, Na mosöa awähadula säi.

⁴² Mida, ie idiwi afädëfalï amomu, ie gäheo i giwilasi gadoi gasoda, baagomolö ga madefalï dilo.

Amalahilä, Yesu e awäse amo gadola, udia dolö yafie negegila aligi afiaha dilo.

⁴³ Amase, udia afädë gäheo i giwilasigi heale olo olosamu aligilo amoge asi. Dolö afädëa ie olo amo wahilasimolöi made nelo.*

⁴⁴ Udia amo Yesuie baagido ga madela maala nea, fagulo sedade didigala gäi amoie bidigi digisebegi, heale olo awäha nelo amo fodolofalï hogosa helei.

⁴⁵ Amala hamosebegi, Yesuea nabahalea, Nema diigise nowëala nabi. Amala nabasebegi, ili sulubadelaea, na made, na madela säla didigasebegi, Fidaea sähalea, Dafidilo-o, dibalä udia dolö yafie negegila aligi afiaha dialea madelela säi.

⁴⁶ Amala säsebegi, Yesuea sähalea, Afädëa nema diigimelë. Diigisebegi, na helësësalea, geloi nema dibe amogi doadigila asila helësësamelëla säi.

⁴⁷ Amala säsebegi, udia amea, e musügä made gabula helësëla, emo gigisëlahilä maala, Yesuie

* **8:43:** Dawadigi dolö odoa ilia helësësalea, ado goweie säida, damo gowe hawa dialeala helësëi. Amoda gowe, [E hä, wahimabelela ie muni amoda, alögoda dolöma memalä sauaha nelo.]

emo mia gumusula dia digai. Udia dolö sulubadela amolile sidaia salea, ea Yesu diigi amoë mi fädäla sälahilä, ne fodolofalī wahimelēla säi.

⁴⁸ Amala säsebegi, Yesuea ema sähalea, Nidiwi-e, dihi asigi afädē negei amea, di wahigomelē. Dalulo salugala mosalola säi.

⁴⁹ Yesuea amala säha nebegi wäla, gedolo mosö beaha aligilo Yalusi amoë mosöala, dolö afädē maala ema sähalea, Die didiwi hä, baagoi dialeamelē. Säla Olelelo gomada, halasala sämabiola säi.

⁵⁰ Amala säi amo nabalahlä, Yesuea Yalusima sähalea, Bedämabu. Dia asigi afädē negemalo. Amala hamoseda, e wahimolömelēla säi.

⁵¹ Amala sälahilä, Yesu e mosöa ami besela galalahilä, odoa ebalä nogila digamäiala fu made iala, Fida, Yone, Yamese, eedo emela, ilmu nogila digai.

⁵² Digahamelebe, mumusogi ami udia dolö amoli sulubadelaäa didigaola gualösa dibegi, Yesuea ilima sähalea, Didigaomabu. Malö goda baagoi made. Adi dialeamelēla säi.

⁵³ Amala säsebegi, ilia malö amoda, hä, baagoi amodala helēsēsalea, ebalä öi.

⁵⁴ Amala hamosebegi, Yesuea udia malö amoë naabogi gaula nea, Udia malö, di nowemola säi.

⁵⁵ Amala säia gai amole, udia malö amo hame fisigila besela galalahilä, fodolofalī nowei. Nowesebegi, Yesuea ilima sähalea, E molö muäia imalola säi.

⁵⁶ Amala hamoi amogi, malö amoë eedole emelele asigigi edefademalä fudugisebegi, Yesuea elema gelola sähalea, Walio hamoi amoda, afädēma

säla ïmabiola säi.

9

*Yesuea abosolo giwilasi amolima hamoi ï
(Madiu 10.5-15; Maga 6.7-13)*

¹ Yesuea abosolo giwilasi amoli misialolahilä, ilia mugabe fedai nefolalebe amoli nesila digimäiage, olo elö elöla oloi difolalebe amoli wahimäiage, ilima geloige, beaha aligilo geloige ï.

² Amalahilä, Godea Beaha Maadela Sigi Neebe amoïe ado mala säla ïïa afiahaleada, oloi difolalebe amoli wahila aligi afiamalola säi.

³ Ea ilima sähalea, Dili afiahaleada, nelebo gaula made mosalo. Galiamoge, aduge, molöge, munige, fagulo äudäge, gaula mosabiola säi.

⁴ Hä, dili afiala sege afädëgi besela galala, mosö afädëgi nogila digase amogimu diaha nelolahilä, giso näiadodi afiahalea, mosö amo digïla mosalo.

⁵ Dili afiahalea, udia dolö gaamu afädëgi sefolalebe amolia, dili sigi awäla mosöa diahadula made säседа, gaamu amo digïla awäsolo amo gala, nilia asiala hamoi amea gabula helësëmäia, dilile emogi gulu dao baai amo fëfëla salalahilä, afiamalola säi.

⁶ Amala säsebegi, ili afufulahilä, udia dolö nefolalebeadi ado mala säla ïadigi, sege sulubadelagi oloi difolalo amoli wahila digila nawesa nelo.

Heledoea Yesu nowëdula helësëla, asigia säösäosa nelo

(Madiu 14.1-2; Maga 6.14-16)

⁷⁻⁸ Gamane dafidilo Heledoea, Yesuea nelebo hamosa neala säi amo nabi. Nabahaleada, odoaea

sähalea, Ödägi gelo Yone baagoi amo nowela misi neala säla digi. Odoaea sähalea, Elaia ulufadigila misi neala säla digi. Amase, odoaea sähalea, Goda bea sälo dafidi nelo amoligi, afädë nowela misi neala säla digisa dibe amogi, Heledo e asigia säosäosa nelo.

⁹ Amalebe, Heledoea sähalea, Yoneda na muugi damumalasebegi damui amo, walio nelebo elö elöla hamosa neala udia dolöea säseweda, dolö nowëa hamosa neadula säi. Amalahilä, ea Yesu bimolöie, fu hogosa nelo.

Yesuea dolö dausini biagali molö i

(Madiu 14.13-21; Maga 6.30-44; Yone 6.1-13)

¹⁰ Abosolo amoli obëgëlahilä, ilia hamoi amo Yesuma säla iaha maadei. Amalebegi, Yesuea ili sigi gaula, hilidomu gaamu ëi Bedesaida moholö afiai.

¹¹ Udia dolö yafie gegedoi amolia Yesu asi gabula helësëlahilä, e bëgëla afiai. Ili maala besela galasebegi, Yesuea obeägila säla olelahilä, ilima Godea Beaha Maadela Sigi Neebe amoie ado mala säla iadigi, oloi mofiai amoli wahila didigisa nelo.

¹² Hä, deadisebegi, giwilasi amolia e neebee awälahilä, ema sähalea, Udia dolö gegedoi nefolalebeweli, udia dolö aligisia made weada, molö naala midilö maade gabugi, gaamu holöfalä dibebe amige, sagai mosö dibebe amige, hogogola mosäia afiamalamola säi.

¹³ Amala säsebegi, Yesuea ie bëgëla aulo amolima sähalea, Ili molö muäia, dilia imalola säi. Amalebegi, ilia sähalea, Nilia beledi bia, seme äudäla amolemu galea. Amai diada, nilia udia dolö yafie nefolalebe egowelile molö bidia nea mosäia helësësebelela säi.

¹⁴ Dolö yafie dausini bia gadoi amoli nefolalo. Yesuea ie bēgēla aulo amolima sähalea, Dilia ili nabūlasi bia biala fifigimalola sāmola sāi.

¹⁵ Bēgēla aulo amolia ea sāi amo gadola sāsebegi, ili hä, amo gadola fifigi.

¹⁶ Amala sefolalebegi, Yesuea beledi bia amoge, seme āudā amoge, gauia adala mudaia sida adogola nea, Godema nesegelahilä, beledi amoge, seme amoge, dagabodasi. Amala hamola, ie bēgēla aulo amolima iasebegi, ilia udia dolö sefolalo amoligali sogoi.

¹⁷ Amala sogoi amo, ili sefolalo amoli sulubadela naala bolesalea, odoa fea digai amo, bēgēla aulo amolia gegedola, adu giwilasi salala nobala negei.

*Fidaea Afädē Memelei amoda, dimelēla sāi
(Madiu 16.13-19; Maga 8.27-29)*

¹⁸ Segeyo afädēgi, Yesula ie bēgēla aulo amolali sefolalea, Yesu e hīdo Godema adosa sulo. Amala adolahilä, Yesuea ilima nabahalea, Udia dolö nefolalebe amoliada, ne nowē neala sāha difolalebela nabi.

¹⁹ Amala nabasebegi, ilia sāla obēgēsalea, Odoaeada, ödägi gelo Yone gabula sāla digi. Odoaeada, Elaia gabula sāla digi. Amase, odoaeada, bea sālo dafidi nelo amoligi, afädē nowela misi gabula sāla digisa dialeamelēla sāi.

²⁰ Amala sāsebegi, ea ilima nabahalea, Amai dil-iada, ne nowē neala sähala nabi. Amala nabasebegi, Fidaea sāla obēgēsalea, Godea Afädē Memelei amoda, dimelēla sāi.

*Yesu e sē naala baagolahilä, bu nowemolö amoëe
säi*

(Madiu 16.20-28; Maga 8.30-9.1)

²¹ Amala säsebegi, Yesuea ilima gelolafalī sähalea, Neda gowe gabiola afädēma säla imabiola säi.

²² Ea amala sälahilä sähalea, Dolöie Malö amo sē edefade molö dialeamelē. Asigi gäwi dafidilo nefolalebe amoliage, gobela ilo busa nefolalebe amoliage, mala dawadigi nefolalebe amoliage, ema bimolö habobalahilä, e baagomäia nufulömelē. Amala hamoseda, segeyo äudä nelolahilä, osodagi e nowemolömelēla säi.

²³ Amala sälahilä, ea ili sulubadelama sähalea, Afädēa ne bēgēla moholö helēsēseda, hī hamea hamela helēsēlo amo fisila, segeyo sulubadelagi hile i fūgäi gaula, ne bēgēla moholö dialea.

²⁴ Mida, afädēa hile namolö amo gaula fēdöla aligimolö helēsēseda, ie namolö amo hogosa helemolömelē. Gaso, afädēa hile namolö amo ne helēsēla fisiseda, ea ie namolö amo gaula namolömelē.

²⁵ Afädēa nagadaia nelegei sulubadela neala gaula neēgi, hī e hogosa heleseda, nagadaia nelegei amea, e abeahäla ugila negemolödu.

²⁶ Afädēa nīe ēige, nīe adoge sāmölö hewaseda, Dolöie Malö maasolo amo gala, ie yo digalo hīdo elöibaläge, Eedoie yo digalo hīdo elöibaläge, sele-saia fii hedabifalī amolile yo digalo hīdo elöibaläge, maasolo amo gala, eege amobalä hewamolömelē.

²⁷ Na dilima dofä sähago. Dolö odoa walio wi nefolalebeweli, made baagola, neēgi wäla, Godea Beaha Maadela Sigi Neebe amo bimolömelēla säi.

*Yesuie domalo bedefala elöi
(Madiu 17.1-13; Maga 9.2-13)*

²⁸ Yesuea ado amo säha maadela, segeyo gödölasi gadoi nelolahilä, ea Fida Yone Yamesela ili sigi gaula segebidaia Godema adomolö fedai.

²⁹ Fedala, ea Godema adosa nebegi, Yesuie odagi bedefala, ie fagulo gäi amo falela, yo digai hido elöi eleloi neebe meli.

³⁰ Amo gaalu, dolö äudä ebalä adosa nelo. Amoleda, Mosese Elaiale.

³¹ Eleda, yo digalo hido elöibalä maalahilä, Yesu e naga föi we digila moholö ga maadese amoie, ebalä ado adosa nelo. Amoda, Yalusaleme ami hamomolö amoie säi.

³² Fidage ebalä misi amolege, si gafodo gadugisalea süwia adidi difolalo. Ili adidi difolalo amo nowelahilä beahamelebe, Yesuie yo digalo hido elöige, dolö äudä ebalä neebe amolege meli.*

³³ Dolö äudä amolea Yesu digila, hä, awäse amo gaalu, Fidaea Yesuma sähalea, Dafidilo-o, nili wi neebeweda hedabi gabu. Nilia sege mosö ohodoa, afädë digali, afädë Mosesegali, afädë Elaiagalila oledulela nabi. Fidaea amala säi amoda, eada gowe sähala helësëla made säi.

³⁴ Fidaea ado säha neebe amo gaalu, gelë häu maala, ili neebe amo dabei. Dabesebegi, ili bedäi.

³⁵ Gelë iso amogila ado afädë säia idogosalea, Egoweda nïe malö. Nihï memelei nelo amoda gomele. Dilia ie ado nabualola säi.

³⁶ Ado säi amo wagaia gase amo gaalu beahamelebe, Yesu e hïdomu neebe meli. Bëgëla aulo

* **9:32:** Nelebo egoweda, gasigi besela galai gadoi galea.

amolia nelebo hamose meli amoda, segeyo amo gala odoama made säla äla, musüga negei.

*Yesuea maalibu afädëma mugabe fedai nesila digi
(Madiu 17.14-21; Maga 9.14-29)*

³⁷ Amo aiyo amogi, ili gau amo digafula daala aligisamelebe, udia dolö yafie Yesu idiafa gausi-amolöie mofiai nefolalebe meli.

³⁸ Ili gedoia amila dolö afädëa uuala sähalea, Säla Olelelo-o, na dima gelola nabasebeweda, nie dolö malö afädëfali wemu gabugi, dia bimo.

³⁹ Mugabe fedalahilä, fodolofali uuaha aligilo nea, mugabea amulämelasilahilä, nafiadi dibu besigaha aligilo. Amea fodolo made doadigila awäla, domalo nafadesebemelë.

⁴⁰ Na die bögëla aulo golima nesila digimola gelola säi gaso, ilia nesila digimolöi made. Uli gabiola säi.

⁴¹ Amala säsebegi, Yesuea säla obögësalea, Udia dolö asigi afädë made negela, asiala hamolo walio nefolalebela dili-e, na dilile yöi gaula nea, dilibalä segeyo aboläia namolödu. Die malö go sigi misiëla säi.

⁴² Malö amo, hä, sigi gaula, Yesu neebee maaha nebegi, mugabe amea malö amo nagadaia nidala awälahilä, amulämelasi. Amala hamosebegi, Yesuea mugabe amoma nemolahilä, malö amo wahila, eedo amoie naabogi gausi.

⁴³ Udia dolö ami nefolalo amolia Godeie geloi edefade amo bealahilä, ili edefademalä fudugi.

*Yesu e baagomolömelëla bu agedu säi
(Madiu 17.22-23; Maga 9.30-32)*

Udia dolö nefolalo amolia Yesuea hamoi amogi, aso, fudugisamu dibegi, ea ie bēgēla aulo amolima sähalea,

⁴⁴ Ado säsewe dilia hedabola nabualo. Dolöie Malö amoda, ilia odoaie naabogi gausimolömelëla säi.

⁴⁵ Amala säi gasoda, ilia goweie säsebelä mi fädäla dawadigi made nelo. Iliä helësëmäia säla äla made, musügä negela aligisebegi, ilia ema naba obēgmolö amo bedäi nelo.

*Baagila asi neebe amoda, nowëla nabi
(Madiu 18.1-5; Maga 9.33-37)*

⁴⁶ Hä, ie bēgēla aulo amolia hilidomu sähalea, Niligi baagila awäla dafidilo neebe amo eda nowë neala säla gēgësa dilo.

⁴⁷ Yesuea ilile asigigi helësëi nefolalebe amo bealahilä, malö holöbö afädë naabogi nabelela gaula maala, hi e mia ami ifosi.

⁴⁸ Ifosilahilä, ie bēgēla aulo amolima sähalea, Afädëa nie ëigi, malö holöbö gowema haligila namolö misiëla säsedä, amoda ne namolö misiëla sähagomelë. Amase, afädëa ne namolö misiëla säsedä, amoda ne fisiga welo amo namolö misiëla sähagomelë. Mida, dolö ëi maade, holöbö gidogofali afädë dili neebe sulubadela mogogi neebe amoda, baagila asi neamelëla säi.

*Dilibalä ado nii made neebe amoda, dili sosogo
neala säi
(Maga 9.38-40)*

⁴⁹ Amala säsebegi, Yonea sähalea, Dafidilo-o, afädëa dië ëigila mugabe fedai nesisä neebe amo

nilia bealahilä, dolö amo nilibalä nawelo made beala, Dia amamabiola säimelëla säi.

⁵⁰ Amala säsebegi, Yesuea säla obëgësalea, Amamabiola sämabio. Dolö dilibalä ado nii made neebe amoda, dili sosogo neamelëla säi.

**Yesu e Yalusaleme awähalea, ie
bëgëla aulo amolige, hiligila afiai**
(Ulugu 9.51-19.28)

Samelia udia dolöea Yesu misiäia hamei made nelo

⁵¹ E selesaia mosöa gaula fedamolö segeyo amo ga madesebegi, Yesu e Yalusaleme moholö gelola helësëlahilä, awäha nelo.

⁵² Awäha nea, ea dolö odoama dafidi afiamalola säsebegi, ilia Samelia segeie gaamu afädë dibeami, ie nelebo daiamolö asi.

⁵³ Gaso, Yesu e Yalusaleme moholö awäse ameada, udia dolö ami nefolalo amolia, e made säla olela gausiai.*

⁵⁴ Amala hamosebe amo bealahilä, bëgëla aulo äudä Yamese Yonelea sähalea, Dafidilo Geloi-e, udia dolö gowe ili nuloea naha maademäia, alia selesaia mosöala nulo fisiga idogomola sädulela nabi.

⁵⁵ Amala nabasebegi, Yesuea besuia imogola elema nemolahilä,

⁵⁶ ili sege elögi afiai.

* **9:53:** Samelia udia dolö ilida, segebi Gelisimi bia amimu gegedolahilä, gobela imolöge, Godeie ëi gauia adamolöge, amimu dilo. Amase, Yu iliada, Yalusaleme amimu amala hamolo negei. Yone 4.20 bimalo. Samelia ilia helësësalea, Yu iliada, mogola made hamolo neala helësëlo. Segeyo amo gala, Yesu säla olela made gausiai amoda, amala helësëlo amea.

Yesuea e bēgēla moholōie ado sāi
(Madiu 8.19-22)

⁵⁷ Yesula iē bēgēla aulolali idiafa afiaha dibegi, dolō afādēa Yesuma sähalea, Di awāsebe go gadola, ne bēgēla maahagola sāi.

⁵⁸ Amala sāsebegi, Yesuea ema sähalea, Ilua ügūlo sefolalebe amolida, naga hagali hawa dilo galea. Amase, haea sefolalebe amolige, dilo mosō galea. Amalo gaso, Dolōie Malō eda, busa fugulo negela dilo mosōda, maademelēla sāi.

⁵⁹ Amala sālähilä, Yesuea dolō elōma sähalea, Ne awāsewe gadola bēgēla misiēla sāi. Amala sāsebegi, dolō amea nabahalea, Dafidilo-o, nīe naadodale baula obēgēmalamolō dofealela nabi.

⁶⁰ Amala nabasebegi, Yesuea ema sāla obēgēsalea, Baagoi difolalebe amoliada, hilile baagoi amo baumāia. Diada Godea Beaha Maadela Sigi Neebe amoīe ado mala sāla imolō mosalola sāi.

⁶¹ Amase, elōea nabahalea, Dafidilo-o, na di bēgēla moholō gaso, ne sosogoma dafidi dili hawio, namialola sāmalamolō dofealela nabi.

⁶² Amala sāsebegi, Yesuea ema sāla obēgēsalea, Dolō sagai sagalo neebe amea, noo gāwila bu-ugila sagahalea, baagido besula beaha nea sagalo ameada, Godea Beaha Maadela Sigi Neebe amoīe hamoi hamomolōda, ulīmelēla sāi.

10

Yesuea dolō nabūlasi gifalādaliāie odoai āudā mosaloi

¹ Hobeala, Dafidilo Geloia dolō nabūlasi gifalādaliāie odoai āudā memelelahilä, ili dafidila

mosäia, ea äüdä äüdäla sege dibeamadige, gaamu dibeamadige, e moholöido amogi dafidi afiamaloi.

² Ea ilima sähalea, Sagaia molö bëi yafie difolalea gaso, hëhela gegedola negelasimolöie, hamoi hamolo amolida, ede made gabumelë. Amai gabugi, sagai eedoea ie sagaia hamoi hamomolöie, hamoi hamolo hï fisiga gamäia, ema adosa nami-alo.

³ Dili hä, mosäia. Gaso, nabuö. Sugua sibi malö gadoi ilua ügülo nefolalebea ami, na dili fisiga gahagomelë.

⁴ Dili afiahaleada, muni saleloge, aduge, emo usililoge, gaula made mosalo. Idiafa udia dolö beaseda, gausiala made, baagimalo.

⁵ Dili afiala mosö afädëgi nogila digalahilä, dafidi gowedale sämalö. Dalulo mosö wegi sebe dilibalä namiäiala sämalö.

⁶ Amala sälahilä, mosöa ami sefolalebe amoligi, afädëa dalulo hamei seëda, dilile dalulo amo dolö amea gaula namolömelë. Be, ami sefolalebe amoligi, afädëa dalulo amogi hamei made seëda, dilile dalulo amo dihilima obëgëmolömelë.

⁷ Amase, mosö dili aligise afädë amogimu diaha namialo. Dili molö molöge, ödä molöge, ilia äase amo naha namialo. Mida, hamoi hamolo neebe amolida, bidi nimolö dialea. Mosö odoagi, made fifi nawemalo.

⁸ Gaamu afädëgi besela galasegi, ami fii amolia säla olela, mosöa mofiamola säsedä, ami awälahilä, molö ilia äase amo mualo.

⁹ Gaamugi ami oloi difolalebe amoli wahila-sisaleada, ilima Godea Beaha Maadela Sigi Neebe amo, ga made misi dialeamelëla sämalö.

¹⁰ Gaso, dili awäla gaamu afädëgi besela galasegi, dili säla olela, mosöa mofiamola made säседа, mosö baagila, idi dibe amogi awähalea, gomalä sämalö.

¹¹ Dilile gaamu goweie gulu dao nilile emogi baai goweda, dilia asiala hamoi amo olesalea, fëfëla salala awähamelë. Godea Beaha Maadela Sigi Neebe amo ga made misi dibe amo hedabola helësëmalola sämalö.

¹² Na dilima sähago. Memelela gudimolö segeyo besela galasolo amo gala, Sodomö ilibalä memelela gudimolö amo gadola made, dofä baagila awäla, gaamu amogi nefolalebe amolibalä, gelolafali memelela gudimolömelëla säi.

Udia dolö asigi made besusebe amoli asigiise-bela säi

(Madiu 11.20-24)

¹³ Yesuea ado aso, sähamu nea sähalea, Gaamu Golasini udia dolö dili, asigii gabu. Amase, Bede-saida udia dolö dilige, asigii gabu. Mida, dili nefolalebea ami geloi melëlo made gadoi hamoi amo gadola, gaamu Daia Saidonolemadi dafidi hamoi galebeda, ilia siiba asigi besula, nafade edefade hamoi amoie ulufala, hewai fagulo salugalahilä, nisibu uii filabio.

¹⁴ Memelela gudimolö segeyo besela galasolo amo gala, Daia ilibaläge, Saidono ilibaläge, memelela gudimolö amo gadola made, dofä baagila awäla, dilibalä memelela gudimolö amoda, gelolafali memelela gudimolömelë.

¹⁵ Amase, Gabaniama dilige, Godea dili gauia adogola selesaia mosöa fedamolöla helësësale. Ai. Dilida heli segea nedala digamolömelë.

¹⁶ Afädëa dilile ado nabaseda, nïe adoge naba-hagomelë. Afädëa dilima bimolö habobaseda, nemage bimolö habobahagomelë. Gaso, afädëa nema bimolö habobaseda, ne fisiga welo amomage, bimolö habobahagomelëla säi.

Dolö nabülasi gifalädaliaïe odoai äudä asi amoli obëgëi

¹⁷ Dolö nabülasi gifalädaliaïe odoai äudä afiai amoli obëgësalea, obeägïla aligi obëgëi. Obëgëlahilä, ilia sähalea, Dafidilo Geloi-e, nilïa dië ëi säsebegi, mugabe fedai nefolalo amoliage, nilile ado nabala bëgësiola säi.

¹⁸ Amala säsebegi, Yesuea ilima säla obëgësalea, Na beaha nebegi, mugabe Saidani sege yabagelelo wäla, mudaiala digala aligise melïmelë.

¹⁹ Hä, nabuö. Dilia baagolo nubage, hamabuluge diëgi daiasala mosäiage, ado nii mugabe Saidaniïe geloi baagila mosäiage, geloi amo gaula namiäia, na dilima i amomelë. Afädëa dili made neala nafademolömelë.

²⁰ Amaimo, mugabe amolia dilia säse nabase amogida, obeägïla made, Godea dilile ëi selesaia mosöa dëdëla negei dibe amogi, obeägïsa nami-alola säi.

*Yesuea Eedoma obeägïla nesegei
(Madiu 11.25-27; 13.16-17)*

²¹ Segeyo amo gala, Eleloi Gesamia Yesuïe isogi obeägïlasisebegi, Yesuea sähalea, Mudaiaïege nagadaiaïege Dafidilo Geloi Naado-o, na dië ëi gauia

adaha. Mida, asigi falagasei nefolalebe amolim-age, nagadaia mala dawadigi nefolalebe amolim-age, dia musügä negelahilä, oböla, malësä gadoi nefolalebe amolima, nelebo amoli ulufala olei amogi. Ae, nïe Naado. Dihï hamomolö helësëi amo gadola, amala hamoi gabumelë.

²² Nïe Naadoea nelebo sulubadela nema gausimelë. Afädëa Malö eda gowe neala dawa mademelë. Naadoea hïdomu dawadigi nea. Amase, afädëa Naado eda gowe neala dawa mademelë. Malöea hïdomu dawadigi nea. Amase, Malöea ïe Eedo olemolö helësëse amolima olesegi, iliage e gowe gabula dawadigisa neamelëla säi.

²³ Amala sälahilä, Yesuea ïe bëgëla aulo amolima besuia imogola, ilimamu sähalea, Dilida obeägïsa nea, nelebo hamose dilile siia bease gogi.

²⁴ Na dilima säla ïahago. Bea sälo yafieage, gini yafieage, nelebo hamose dilia bease go gadola wäla, bimolöila helësëi gaso, made meli nefolalomelë. Amase, ado mala dilia nabase go gadola wälage, nabolöila helësëi gaso, made nabi nefolalomelëla säi.

Yesuea ado besula, Samelia dolö afädëa Yu dolö ugila negeila säi

²⁵ Segeyo afädëgi, mala säla negei amo olelelo afädëa Yesu fedogola bimolöïe nowela aligilahilä, ema nabahalea, Säla Olelelo-o, ne namolöi namolö neala gaumolöïe, abilia hamomolödula nabi.

²⁶ Amala nabasebegi, Yesuea ema säla obëgësalea, Ado säla negei dibe amogida, edo säla dëdëla negei dibeo. Dia beala, abilia helësëila nabi.

²⁷ Amala nabasebegi, dolö amea säla obëgësalea, Dafidilo Geloi dië Gode neebe amo dië bobaeage, iso asigiage, geloiage, helësëloeage, boba hamosa namialo. Amase, dihidi boba hamolo amo gadola, odoa dibalä nefolalebe amoli, boba hamosa namialola säla negei dibeola säi.

²⁸ Amala säsebegi, Yesuea säla obëgësalea, Dia mogolafali säimelë. Amo gadola hamosa aligiseda, namolöi namolö gaula namolömelëla säi.

²⁹ Amala säsebegi, dolö amea, ea hamoi amo hedabola hamoila sämolöie, Yesuma nabahalea, Odoa nebalä nefolalebeda nowëdula nabi.

³⁰ Amala nabasebegi, Yesuea säla obëgësalea, Segeyo afädëgi, dolö afädë Yalusalemela Yaligo moholö digala asi. Awäha nebegi, fa nelo dolö odoaea, e idiafa idia negela gaulahilä, ea nelebo gäi amo sulubadela giila neaha maadela, hi eda nufudala ialalela, baagomolöi gadoi negesiä asi.

³¹ Segeyo amo galamu, gobela ilo dolö afädë idi amogimu digala moholö awähaleamelebe, dolö amo bealahilä, e idi agesugi sisigala awäla baagila asi.

³² Amo gadolamu, Ilibai dolö afädëge amogi awähalea, dolö dibe amo bealahilä, eege idi agesugi sisigala awäla baagila asi.

³³ Amai gaso, Samelia dolö afädëge awähalea, dolö dibe ami besela galala, dolö amo bealahilä, ie asigigi edefademalä bobasëi.

³⁴ E dolö dibe ami awälahilä, welige wani ödäge söga negela, nufi amo usulaha maadei. Amalahilä, dolö amo hile sugua dögidaia ami negesilahilä, gedola dilo mosöa ami gaula awäla, negesiä sigi nelo.

³⁵ Amalahilä, amo aiyo amogi, Samelia dolö amea muni giwi siliba äudä gaula awälahilä, gedola dilo mosö beaha aligilo amoma iahalea, Dia dolö gowe hedabola beaha namialo. Dia e sigi nea, dñe muni odoa fisiga gase amoñeda, ne obögëla maala, na beselala ïmolömelëla säi.

³⁶ Hä, fa neloea dolö amo nufudala ïalalei dibegi, diada, dolö ohodoa amoligi, dolö abodoea hamoi amea damelë hamoi gabula helësësebelä nabi.

³⁷ Ea säla obögësalea, Dolö e bobasëi ameala säi. Yesuea säla obögësalea, Amo hamoi amo gadola, di awäla amala hamomolö mosalola säi.

Yesu e Mada Melilea mosöa asi

³⁸ Yesula ïe bögëla aulolali afiala, sege afädëgi besela galai. Amida udia afädë sulo. ïe ëida Mada. Amea Yesu sigi gaula ea mosöa asi.

³⁹ Amida Madaïe emelë sulo. Amoïe ëida Meli. Amea Dafidilo Geloïïe emo mia ga madela maala salea, ea ado säsebe amo nabaha sulo.

⁴⁰ Sebegi, Madaea molö molö amo hïdomu da-iaha nea, asigia yöia idogolahilä, Yesu sebea ami awäla sähalea, Dafidilo-o, nïe namelëada, na hamosewegi, haligïla hamosalea made. Na nihïdomu hamosebewe, dia made beasebele. Ema ne ugila negela mosöla sämola säi.

⁴¹ Gaso, Dafidilo Geloia säla obögësalea, Mada-o, Mada-o, nelebo yafie dibe amoïe asigia säosäolahilä, asusuga asusugai neago

⁴² gaso, nelebo afädëmu hamomolö dibego. Melia nelebo memelela nease goweda, afädëa fedela made nimolöla säi.

11

Yesuea Godema adolo mala olelei (Madiu 6.9-15; 7.7-11)

¹ Segeyo afädëgi, Yesu e sege afädëgi Godebalä adosa sulo. Ea Godema adola wagasebegi, ie bëgëla aulo afädëa ema sähalea, Dafidilo Geloi-e, Yonea ie bëgëla aulo amolima Godema adomäia olelei amo gadola, niliäge Godema adomolöie, dia nilima olelemäiamelëla säi.

² Amala säsebegi, Yesuea ilima sähalea, Dilia Godema adosalea gomalä sāmalo.

Nilile Naado, dïe ëi amo eleloifalï hïdo elöi namiäia hamesa neawe. Dïe Beaha Maadela Sigi Neebe amo misiäiäge hamesa neawe.

³ Segeyo sulubadelaïe molö molö amo, segeyo amogi ïmalo.

⁴ Odoa ilia nilima asiala hamosegi, sulubadela fisilo ameada, diage nilia nafade hamoi amoli fisimalo. Nili neebeawi fedogola bimolö made negesimalo.

⁵⁻⁶ Amala sāmālahilä, Yesuea aso, ilima säla ïahalea, Dili nebegogi afädëa, gasi mogogifalï ie damelëa mosöa awālahilä ema sähalea, Ne damelë-e, nïe damelë afädë sege wagadi madela, ne molö maade sebegi, na mosöa misi salea. Hobeä bedefala iduläie, dia ne beledi iso ohodoa ïmola säsegi,

⁷ oböla, ie damelë mumusogi dilo amea säla obëgësalea, Idi galahilä, nïe malöla nilida hä, gedola diasia adidi dialeamelë. Dia nema halasala sāmabio. Ne nowela digali nelebo neala ïmolö uli gabumelëla säsedä, abilia hamomolö gabu.

⁸ Na dilima säla ïahago. Mosö eedo amea, dolö egedigila misi amoda, ie damelë helësëla, made

nowela ïalabio gaso, e damelëa bolowela egedigi ameada, ea nowelahilä, ïmose amo gadoi neala ïmolömelëla säi.

⁹ Amaimo, na dilima säla ïahago. ïmola ëdëgësa namialo. ïmola ëdëgësedä, diligali ïmolömelë. Hogosa namialo. Hogosa aligisedä, dilia beagolemömelë. Idi gai dugimola säha namialo. Idi gai dugimola säha aligisedä, dili digamäia, idi gai dogä negesimömelë.

¹⁰ Mida, udia dolö sulubadeläea ïmola ëdëgësa neebe amolia nimömelë. Hogosa neebe amea beagolemömelë. Idi gai dugimola säha neebe amoma, idi gai dogä negesimömelë.

¹¹ Malö eedo nefolalebego, dilile malöea seme ïmola säsedä, dili afädëa waadima neala ïmolöle.

¹² Amai, dilile malöea häa iso ïmola säsedä, ham-abulu neala ïmolöle.

¹³ Amai, dihili dili nafade hamolo nea gaso, dilile malöma nelebo hedabi ïlo amoda, dilia dawa. Amo gadola made, dofä baagila awäla, dilile Diado selesäia mosöa neebe amea, Eleloi Gesami ïmola ëdëgësa neebe amomada ïmolömelëla säi.

Ilia Yesu eda mugabe Belesabulubälä nea hamosebela säi

(Madiu 12.22-30; Maga 3.20-27)

¹⁴ Dolö afädëma mugabe fedalahilä, adomolö uli nelo amo Yesuea nesila digisebegi, dolö ado maade amea hä, ado adoi. Amala hamosebegi, udia dolö yafie gegedoi nefolalo amoli fudugisa nefolalo.

¹⁵ Amai gaso, odoaea sähalea, Goda mugabe neebe amolile dafidilo ëi Belesabuluea geloi

ïasebegi, mugabe neebe amoli ea nesila digisa neamelëla sai.

¹⁶ Amase, odoa nefolalo amolia Yesu fedogola bimolöie ema sähalea, Dolöea hamomolöi made gadoi afädë selesaia mosöala misi, dia nilima hamola olemola sai.

¹⁷ Amala säsebegi, Yesuea ilile asigigi helësëi dibe amo dawadigilahilä, ilima sähalea, Gädili afädë hilimu moge mogela nuduseda, gädili amo nafademolömelë. Amo gadolamu, mosö afädëgi fii hilimu moge mogela nuduseda, fii amoda mugulumolömelë.

¹⁸ Amaimo, Saidania sigi neebea ami moge mogela hilimu nuduseda, ea beaha maadela sigi neebe amo abeahäla namolödu. Na ado säsebeweda, dilia nema Belesabuluea geloi ïasebegi, mugabe neebe amoli dia nesila digisa neamelëla sai amoie sähamelë.

¹⁹ Gaso, na Belesabuluie geloia mugabe fedai nesila digilo galëda, dilile malö neebe amolia nesila digilo amoda, nowëie geloia nesila digilo. Ameada, ilia dilile gudi mogelo namolömelë.

²⁰ Gasoda, na Godeie naabo geloia mugabe fedai nesila digisa galëda, Godea Beaha Maadela Sigi Neebe amo, hä, dili neebea gui misi dialea gomele.

²¹ Amaimo, dolö geloi afädëa helebe dadifulo hulu sulubadela gaulahilä, hile mosö idihë aligiseda, ie nelegei dibe amoli hedabi dië bimolömelë.

²² Ea helebe dadifulo gaulahilä, neda dofea neala helësëi. Amai gaso, dolö geloi afädë, elö amoie geloi baagila asi amo maala, ea nudula salolela baagila awäla, ie helebe, dadile fedela

gaulahilä, ië nelegei amo dolö odoagali mogela sogomolömelë.

²³ Afädë e nebalä made nea galëda, hï nebalä ado nii nea. Amase, afädëa nebalä made gedolasiseda, ea dusula afiaha maademäia nesila digisamelëla säi.

Mugabe bu obëgëi
(Madiu 12.43-45)

²⁴ Yesuea ado aso, sähamu nea sähalea, Dolö afädëma mugabe fedai amo doadigila awäседа, mugabe amo sege falaia awälahilä, e hele fimolöie sege hogosa nea, afädë made beagolelomele. Made beagolesegi, hïdo sähalea, Mosö digila misia ami bu obëgëmolöla sälomele.

²⁵ Awäla mosöa besela galala beahamelebe, gëgelë doala, nelebo sulubadela hedabola negesi diëgi beagolelomele.

²⁶ Bea negesiä, bu doadigila awälahilä, hï eda holöbö hedabilahilä, mugabe gifalädaläa nafade-falä nafade nefolalo amoli sigi obëgëla awäla nogila digalahilä, mosö amogi aligilo. Amaimo, dolö amo dafidi nafade nelo amo baagila, hobeal-ada, nafadeifalä aligilomelela säi.

Obeägimolö amoda, udia dolö abodo gadoia

²⁷ Yesuea ado amo säha nebegi, udia dolö gege-doi nefolalebe amoligi, udia afädëa gelola säia adogosalea, Udia di neegela ägüla dodo ilo sebe ameada, obeägisa neala säi.

²⁸ Amala säsebegi Yesuea sähalea, Amai gaso, udia dolö Godeie ado nabala bëgëla hamosa neebe amoliada, edefademalä obeägisa neamelëla säi.

Dolö odoaea Yesuma dolöea hamomolöi made gadoi hamomola säi

(Madiu 12.38-42; Maga 8.12)

²⁹ Udia dolö yafie maahamu nebegi, Yesuea sähalea, Udia dolö walio nefolalebe welia nafademu hamosa neebe go. Ilia dolöea hamomolöi made gadoi hamomola sälo. Gaso, hamomolöi made gadoi afädë ilia bimäia made olela, Yonama hamoi amomu olemolömelë.

³⁰ Siiba, Yonada nofe elöi Godea Niniba udia dolöma olei. Amo gadola wäla, Dolöie Malöda, nofe elöi Godea udia dolö walio nefolalebe welima olesamelë.

³¹ Memelela gudisolo amo gala, gädili Siba udia dolö beaha aligilo gini udia ameada, walio udia dolö nefolalebe welibalä nowela aligilahilä, ilima dofea made hamoimelëla sämolömelë. Mida, udia amea Solomono asigi falagasei neebe amoie ado nabulöie, wagadi made hile segeala naba mis-imelë. Gaso, nabuö. Afädë walio gui nebegeo eda, Solomono nelo amo gadoi made, baagila asi neamelë.

³² Memelela gudisolo amo gala, Niniba udia dolöea walio nefolalebe welibalä nowela nea, ilima dofea made hamoimelëla sämolömelë. Mida, ilia Yonaea Godeie ado mala säla i amo nabalahlä, asigi besusa maadei amea. Gaso, afädë walio gui nebegeo eda, Yona nelo amo gadoi made, baagila asi neamelëla säi.

Domaloie yo digalo

(Madiu 5.15; 6.22-23)

³³ Yesuea ado aso, sähamu nea sähalea, Afädëa gamali yola musügä negelo made, falo hawage

negelo made. Ea yolahilä, udia dolö mumusogi maase amolia yo amo bimäia, aulidaia sagalo nea.

³⁴ Siida domaloie yo digalo gamali gadoi nea. Dïe si hedabi neëda, dïe domalo sulubadelagi yo digaha maadei nea. Be, dïe si nafadeseda, dïe domalo gasimi sagai nea.

³⁵ Amaimo, dia hedabola idihë namialo. Dima yo digalo neebe amo usilahilä, asiala gasimi sagaloea.

³⁶ Amai gabugi, dïe domalo go sulubadelagi yo digaha maadelahilä, fu afädëgi gasimi sagalo afädë maade galëda, gamali yoi amo gadoia dihidi yo digaha maadei namolömelë.

*Yesuea Felesi dolöge, mala säla negei amo olelele-
oge nefolalo amolima asiala hamosebela säi*

(Madiu 23.1-36; Maga 12.38-40; Ulugu 20.45-47)

³⁷ Yesuea ado amo hä, säha maadesebegi, Felesi dolö afädëa, ea mosöa molö molö misiëla säsebegi, e awäla ea mosöa ami molö naha sulo.

³⁸ Yesuea naabo nigime hëla made, molö naha sebe amo bealahilä, Felesi dolö amo fudugisa sulo.

³⁹ Amala fudugisa sebegi gaso, Dafidilo Geloia ema sähalea, Felesi dolö nefolalebela dilia gaaboge, faloge, gafodo baagidomu nigime hësalea, dilile iso asigiada, gesami awäla fa neloge, nafadege, nobai nebego.

⁴⁰ Asigi maade dili, daia go hamosaleada, isoge hamoi madele.

⁴¹ Amaimo, nelebo falodaia dibe amoge, gobo isogi dibe amoge, dolö busadäoi neebe amoligali imalo. Amala hamoseda, dilile nelebo amo sulubadelada, dofä nigime hësa maadei diamolömelë.

- ⁴² Felesi dolö dili, asigii gabu. Dilia molö hädälo fogomo gadoi elö elöla sagai dibe amogi, nabülasi mogelahilä, nabü afädë neala Godegali ilo, gaso mogola hamomolö amoge, Gode boba hamomolö amoge, made hamola buludola fisilo goea. Dafidi säi amo made fisisaleada, dilia ado edefade gowele hamamosa namolö dialea.
- ⁴³ Felesi dolö dili, asigii gabu. Dilia gedolo mosöa dafidilo filo dibeami fimolömu hamelo goea. Amase, magaia gaamugi udia dolö nefolalebe amolia, di go gabiola sämäia hamelo goea.
- ⁴⁴ Dili asigii gabu. Dilida udia dolöea baagoi dögöla negei dibe amo made beala, fuduia asiala aulo amo gadoi goea.
- ⁴⁵ Amala säi amo nabalahlä, mala säla negei amo olelelo afädëa Yesuma säla obögësälea sähalea, Säla Olelelo-o, dia ado säi ameada, nilige gagadesebegola säi.
- ⁴⁶ Amala säsebegi, Yesuea säla obögësälea, Mala säla negei amo olelelo nefolalebe dilige, asigii gabu. Dilia nelebo yöi häuäla gaulo amo udia dolöea gaumäia negesilahilä, naabogumu fufuia adogola ugila negelo made goea.
- ⁴⁷ Dili asigii gabu. Dilile mäu nefolalo amolia bea sälo nufi amolile baui mosö, dilia olelo goea.
- ⁴⁸ Amala hamolo ameada, dilile mäu nefolalo amolia hamoi amoda, dilia hedabola hamoila helësëse amo ulufala olelo. Ila bea sälo nefolalo amoli nufudasebegi, dilia ili bauia amida, mosö olasilo gabugo.
- ⁴⁹ Mi amoie, Godeie asigi falagasei amea sähalea,

Na ili neebee bea säloge, abosologe, fisiga we-molö gasoda, odoada ilia baagomäia nufudadigi, odoada ilia sēlasisa namolömelēla säi.

⁵⁰⁻⁵¹ Amaimo, dafidi sege föi dibe sulubadela mi gäwila hamoia amila, bea sälo nefolalo nufi amoli, dafidi Aibeledale heale digaia amila awäla, Segelaeage, dolö amolia gobela ilo mosöle aulile mogogi ami nufi amoie heale digaia ami awäla, sulubadelaie heale digai ameada, udia dolö walio nefolalebe weli sē molömelē. Na dilima dofä säla iahago. Amo sulubadela amoieda, udia dolö walio nefolalebe weli sē molömelē.

⁵² Mala säla negei amo olelelo nefolalebe dili, asigii gabu. Mala amo dawadigimolöie mosö isogi nogila digamäia, idi gai dogelo gii amo dilia neala musügä negelo goea. Dihili dilida, nogila digahalea made, udia dolö odoa nogila digadelä hamosegida, made nogila digamäia, dilia dofogai gabu.

⁵³ Yesuea amo sälahilä awäsebegi, segeyo amila Felesi dolö amoliage, mala dawadigi amoliage, ema gelola gagadela, elö elöla naba obögē obögēsalea,

⁵⁴ e dahila nimolöi walebelela bimolöie, fedogola bease amogi abeahäla ado säsebelela beahanelo.

12

Felesi dolöie asigi musügä negela sälo mala amo idihē namialola säi
(Madiu 10.26-27)

¹ Udia dolö dausini yafie gegedoi amea negegila, emoea odoa emesala dedabelesebegi, dafidi

Yesuea ie bēgēla aulo amolima sāla iāhalea, Felesi dolō ilile beledi edelo yidi idihē nea, hedabola beaha namialo. Na sāseweda, ilile asigi musügā negela sālo mala dibe amoie sāhamelē.

² Nelebo sulubadela dabela negei difolalebe amolida, ulufadigisa maademolōmelē. Amase, nelebo sulubadela musügā negei difolalebe amolige, dawadigisa maademolōmelē.

³ Gasimi sagaia nea, ado dilia sāi amoda, eso neē dibeami nabulōmelē. Mumusogi geleā sēdāwala sāi amoda, mosō daiowa fedalahilā, udia dolōma uuala sāha namolōmelēla sāi.

Godebalāmu bedāmolō dialea
(Madiu 10.28-31)

⁴ Yesuea ado aso, sāhamu nea sāhalea, Ne damelēla dili-e, na dilima sāhago. Domalo baagomāia nufudalahilā, hobeala elō hamomolōi made neebe amolibalā bedāmabio.

⁵ Na dili gowebalā bedāmolō dialeala sāha. Afādēa dolō baagomāia nufudalahilā, hobeala heli segea nufuda salimolōie geloi neebe amobalā bedāmalo. Dofā, ebalāmu bedāmalola sāhago.

⁶ Haea nelēsa gigiso gadoi biada, bidi holōfalī muni giwi āudā gadoia nelo madele. Amai gaso, Godea haea amoli gadoigi, isoie afādē elabolo made neamelē.

⁷ Ea aso, dilile busagia busa hilī nebego sulubadela nidesa maadei neamelē. Haea gigiso gadoi sefolalebe amolida, holōbō gidogolahilā, dilida, abulūmi hamoi nebego. Dilia bedāmabiola sāi.

Hewala made, ne Yesuie neawela sāmōlōge, Gelesoma baagi imōlōge
(Madiu 10.32-33; 12.32; 10.19-20)

⁸ Yesuea ado aso, sähamu nea sähalea, Na dil-ima sähago. Afädëa udia dolö sefolalebe amolile sidaia, neda Gelesoie neawela säla ulufadigiseda, Dolöie Malö ameage, Godeie selesaia fii nefolalebe amolile sidaia, dolö egoweda nïemelëla säla ulu-famolömelë.

⁹ Gaso, afädëa udia dolö sefolalebe amolile sidaia, neda e sosogo mademelëla säsedä, Godeie selesaia fii nefolalebe amolile sidaia, dolö amoge ne sosogo mademelëla sämolömelë.

¹⁰ Afädëa Dolöie Malö ema ado nafadela säsedä, amo hëla fisimolömelë. Gasoda, afädëa Eleloi Gesami e gadadela säsedä, made hëla fisimolömelë.

¹¹ Amaimo, ilia gedolo mosöage, gamane beaha aligilo nefolalebea amige, busa dolö odoa nefolalebea amige, dilibalä gudimolöie sigi awäsegi, nilia ado abilia säla obëgëmolödu, ado edo sämolödula asigia säosäola helësëmabio.

¹² Mida, segeyo amo gala ado sämolö amoda, Eleloi Gesamia dilia sämolö dibe amo olemolömelëla säi.

Nelegei yafie negelo dafidilo afädë gagaoi gadoi nelo amoie ado säi

¹³ Dolö afädë udia dolö sefolalo amoli mogogi ami salea, Yesuma sähalea, Säla Olelelo-o, naado baagoi amoie, nalä negei dibe amogi, nedooea ne mogela imäia, dia ema säla imola säi.

¹⁴ Amala säsebegi, Yesuea ema naba obëgësalea, Dolö, edoeaha. Na ali mogelasilo nea, nelebo go mogemäia, ne nowëa memelela ifosisiola nabi.

¹⁵ Amala nabalahlä, ea aso, udia dolö nefe-lalo amolima sähalea, Nelebo sulubadela dofea dialeala helësëla made, na edefade negemolöila

helësëla, asiala gesami auloea, dilia hedabola idihë namialo. Dilile namolö amoda, nelegei yafie difolalebe amoligida, maademelëla säi.

¹⁶ Amala sälahilä, Yesuea ilima ado besu gowe säla i. Nelegei yafie negelo dafidilo dolö afädëa sagaia molö mumului yafie dilo.

¹⁷ Hä, dolö amea helësësalea, abilia hamomolödu. Nie molö we nea negemolö mosö maade gabula helësëi.

¹⁸ Oböla, hïdo sähalea, Amaseda, na gomalä hamodelä. Na molö negelo mosö uli amoli hailahilä, bu edefade odoa oledelä. Amalahilä, amoligi nie eladi gadoi widi dibe amoge, nie nelebo odoage, mosö amoligi nidila negedelä.

¹⁹ Amalahilä, na nihïdo sähalea, Neda nelebo yafie hedabi negei diëgi, gäheo i yafiegi hele salea, molö amo gadoida, negei dialea. Amalahilä, neda memalä saleada, ödä nadigi, molö nadigila hedabi samolö wedala hïdo amala säi.

²⁰ Ea hïdomu amala sälahilä sebegi, gaso Godea ema sähalea, Dolö gagaoi gadoi di. Dida walio gasigi baagomolömelë. Amasegi, dië nalä negei dibede amoda, nowëa nimolö gabula säi.

²¹ Yesuea säla wagahalea, Afädëa hile nelebo dagulula negesalea, Godemadi nelegei made negelo amoma, amo gadola hamomolömelëla säi.

Asigia säosäoloie säi

(Madiu 6.25-34)

²² Amala sälahilä, Yesuea ie bëgëla aulo amolima sähalea, Amoïeda, na dilima säla iahago. Molö edo molödula säla, dili namolö goie asigia säosäola helësëmabio. Amase, fagulo edo salugamolödula säla, domaloïege asigia säosäola helësëmabio.

²³ Molö aso, nigia galahilä, udia dolö namolö amoda, dafidilo neamelë. Amase, faguloge aso, nigia galahilä, domaloda, dafidilo neamelë.

²⁴ Dilia haea sefolalebe amoli helësëmo. Ila sagai sagala molö hëhela faila gechedola negelo made, amase, negelo mosöge maade, gaso ili muäia Godea ilomelë. Haea amoli holöbö gidogolahilä, udia dolö dilida, dafidilo nea madele.

²⁵ Dili neebe gogi nowëa asigia säosäose ameadä, hile nagadaia namolö amo fu holöfalä baalasi-molödu.

²⁶ Dilia holöfalä amo gadoi hamomolöi made galëda, nelebo odoa dibe amogi asigia säosäosa nebegoda, edoie.

²⁷ Dilia mama amoli memalä bäulahilä, abeahäla fedaha aligilodula helësëmo. Ila hamoige made hamolo, amase, faguloge made hamolo neamelë. Amai gaso, na dilima säla iahago. Solomonoea fagulo hido elöi salugalo amoda, mama ilile momadoi hido elöi amo gadoi made nelo.

²⁸ Giisi mamala memalä bäui walio nefolalebe amolida, aiyo dolöea damula nulogi gobelo neamelë. Asigi afädë holöfalä negei nefolalebela dili, Godea giisi mama nefolalebe amolida, memalä momadolasilö. Amo gadola made, dofä baagila awäla, dili nefolalebegoge fagulo gämäia imolö madele.

²⁹ Amase, dilia molö ödäge, edo naha namolödula, asigi amogi amogila nea salala helësëmabio. Amo gadola säosäomolöda, dofea mademelë.

³⁰ Udia dolö Gode helësëlo made amolia, nelebo amoli gadoi helësësamu aligilo nea. Amalo gaso,

dilile Diadoea dili nefolalebegoa nelebo amoli nimolöi dibe amoda, dawadigi neamelë.

³¹ Amaimo, dilia ie Beaha Maadela Sigi Neebe amo helësëla, hogosa aligiseda, ea nelebo amoli sulubadela dilima baala ïmolömelëla säi.

Nelegei hedabi selesaia mosöa gafedela nege-molö dialea
(Madiu 6.19-21)

³² Yesuea aso, sähamu nea sähalea, Sugua sibi sosogo nahui nefolalebela dili-e, bedämabio. Mida, dilile Diadoea ie Beaha Maadela Sigi Neebe amo diligali ïmolöie obeägisa neamelë.

³³ Dilile nelebo difolalebe amo odoama bidi neaha maadelahilä, muni neasebe amoda, udia dolö busadäoi nefolalebe amoligali ïmalo. Amalahilä, dilile muni salelo gäalimulo made amo nealahilä, selesaia mosöa amimu dilile nelebo daiala negesa namialo. Nelebo hedabi amo made maadesia ami negemalo. Amida, fa neloea ga madela made muloge, amase, gasiämoea made damuloge dialea.

³⁴ Amala säse amoie mida, sege dilile nelegei hedabi dibe amida, dilile bobahëla asigilo amoda, amimu diamolömelëla säi.

Hamoi hamolasilo hedabia hedabola beaha namolö dialea
(Madiu 24.42-44)

³⁵ Yesuea aso, sähamu nea sähalea, Dilia daia fagulo salugalahilä, gamali wala gaula, daiala nefolamialo.

³⁶ Hamoi hamolasilo dolöea, ilile dafidilo amo, dolö afädëa udia nease amoie molö nasebea asi amo obëgëmäia, daiala beaha aligilo amo gadola,

ilile dafidilo amo maalahilä, idi gai dugimola säседа, ilia e nogila digamäia, idi gai aabela dugimolöi bimolömelë.

³⁷ Dafidilo amo maala, ie hamoi hamolasilo amoli, süwia diala made, e beaha neëgi maaseda, ilia obeägisa namolömelë. Na dilima dofä säla iahago. Dolö dafidilo amea hamoi hamosalea gälo fagulo gälahilä, ilima sähalea, Dili molö muäia idulä, fifigimalola sälahilä, ilima molö mogela imolömelë.

³⁸ E gasi mogogi maasege, sege yose gaalu maasege, ilia daiai diëgi, e maala beaseda, ilia edefademalä obeägimolömelë.

³⁹ Amase, dilia afädë gowe helësëmäia sähago. Mosö eedoea fa nelo gowe gala moholöla helësëi galebeda, fa neloea ie mosö dagabola digamäia, fu made ialabiomelë.

⁴⁰ Dolöie Malö moholö amoda, dilia gowe gala moholö gabula helësëi made neëgi, e moholö ameada, diliage daiaha namolö dialeala säi.

Ado besula hamoi hamolasilo hedabüege, nafadeiege säi

(Madiu 24.45-51)

⁴¹ Amala säsebegi, Fidaea nabahalea, Dafidilo Gelo-i-e, dia ado besu säsegoda nilimamu sähale, ma, sulubadelama sähalela nabi.

⁴² Amala nabasebegi, Dafidilo Geloia säla obëgësalea, Amai galëda, sigi aligilo asigi falagaseige, nulügäige neebe ameada, ie dafidiloea ie hamoi hamolasilo odoa sigi namiäia, ilile molö ilo amo gadola, segeyo hi daiala negeifaligi, mogela imäiala memeloloda, nowëdu.

⁴³ Ie dafidilo amo maalahilä beahalea, hamoi hamolasilo amea, hamoi amo gadola wäla hamosa

neë beaseda, hamoi hamolasilo amo obeägisa namolömelë.

⁴⁴ Na dilima dofä sähago. Dafidilo amea hamoi hamolasilo amoma, ie nelegei amo sulubadela sigi namialamolömelë.

⁴⁵ Amaimo, hamoi hamolasilo amea asigiamu helësësalea, nïe dafidiloda, fodolo made moholö gabula helësëlahilä, ea udia dolö hamoi hamolasilo odoa nefolalebe amoli nufudadigi, molö ödäle naadigi, gagaolo ödäge nalahilä, gagaosa aligiseda,

⁴⁶ ie dafidilo segeyo gowegi, aoa gowegi moholöla helësëi made neëgi, e moholömelë. Maalahilä, ea hamoi hamolasilo amo neala nafademolöi nafadelasila, ado neadigilo neebe amolibalä namialamolömelë.

⁴⁷ Hamoi hamolasilo amea, ie dafidiloea gowe gadoi hamomalaila helësëlahilä gaso, oböla, säi amo gadola made daiala, made hamola neëgi, ie dafidiloea e baialaea gelolafalä nufudala ialalemolömelë.

⁴⁸ Amase, hamoi hamolasiloea, ie dafidilo amea hamomalai amo dawa made neebe amea, baialaea nufuäiala hamosa aligiseda, ie dafidiloea e, aso, geleä nufulömelë. Amaimo, sulubadelaesa yafie nii gaula neebe amolima, bu yafie obëgëla imalamolömelë. Amase, afädëie naabogi yafie gausi amoma, dofä yafie baala ia obëgëmalamolömelëla säi.

*Yesuea udia dolö mogelasimolö misi
(Madiu 10.34-36)*

⁴⁹ Yesuea ado aso, sähamu nea sähalea, Na naga föiwe gobemolö misi amo, hä, aabela söa fedala gobemäiala hamesamelë.

⁵⁰ Amai gaso, ne hä, ödägi gemolö afädë galea. Amo aso, made hamola neada, nïe iso asigigi yöi neawe.

⁵¹ Diliada, na nagadaïawi dalulasimolö gaula misi gabula helësësale. Na dilima säla ïahago. Amala made. Udia dolö neala mogelasimolö misimelë.

⁵² Amaimo, walio wila asogodi gogi, eme afädë sosogo bia mosö afädëgi salea, oböla, amoli äudä eamu, ohodoa eamula hilimu mogelahilä, ohodoa amolia äudä amolebalä ado neala, amase, äudä amoleage ohodoa amolibalä ado nealalahilä, moge mogela namolömelë.

⁵³ Amalahilä, eedoea efegebalä ado neadigi, efegeage eedobalä ado neadigisa namolömelë. Amase, emeage idiwibalä ado neadigi, idiwage emebalä ado neadigi, amase, emea efege udiabalä ado neadigi, efege udiage egoamebalä ado neadigisa namolömelëla Yesuea säi.

*Nelebo besela galamolö amoli, mi gowe gadoila
udia dolöea dawa madela säi*

(Madiu 16.2-3)

⁵⁴ Amala sälahilä, Yesuea udia dolö gegedoi nefolalo amolima bu sähalea, Eso digasebeamadila mu baidili maase amo bealahilä, walio sege digamolö gabula aabela säha neëgi, sege hä, dofä digalomelë.

⁵⁵ Amase, eso maasido amoïe dafädimadila fo maasada, hä, eso neëa hëgimolö gabula säha neëgi, hä, dofä hëgilomelë.

⁵⁶ Asigi musügä negelola dili, mudaiage, nagadaiage, gomalä hamosebela melëlo amo dawadigi nea. Gaso, walio nebegoië hamosebe amo, mi goweie hamosebela, made dawa nefolalebegoda, edoiëla säi.

*Dibalä ado nii neebe amobalä aeamaloi dialea
(Madiu 5.25-26)*

⁵⁷ Yesuea ado aso, sähamu nea sähalea, Dilia mogoi hedabi dibe amo hamomolöie, dihili made memeselegoda edoië.

⁵⁸ Afädëa dibalä gudimolömelëla säla, di sigi gaula awäsedä, gudilo mosöa ami, aso, made besela galala, idiafa awäha nea, ebalä ado adola aeala hamogimolödäle helësëmalo. Amala made hamosedä, ea di gudi mogelo dolö neebea ami dusugala gaula awäla, gudi mogelo dolö amea, di dadi gaui dolö amolima gausila, dadi gaui dolö amolia, di galabaia mosöa ami ifosimolömelë.

⁵⁹ Na dima sähago. Dia nafade hamoi amoie, ilia dima muni hamomalai amo gadoi, bidi neaha maademäia, galabaia mosöa ifosi neamu, made moholömelëla säi.

13

Së nüloea, asigi besumolö dialea

¹ Segeyo amo gala, dolö odoa Yesuea säsebea ami nefolalo amolia, Galili fii dolö odoäie ema säla i. Galili dolö amolia Godegali odala i gobela iäha nebegi, Gabena Bailadia ië ami dolö nefolalo amolima nufualoi. Nufi amolile heale odala iie healebalä gegoai amoie, ilia Yesuma säla i.

² Amala säla iäsebegi, Yesuea säla obëgësalea, Galili dolö amoli amo gadola së mai amoda,

dilia helësësalea, ilia nafade hamoi amea, Galili udia dolö odoa amoli sulubadela baagila asila helësësale.

³ Ai, amala mademelë. Na dilima säla iahago. Dilia asigi made besuseda, dili sulubadelage amo gadola baagomolömelë.

⁴ Amaimo, Sailoama mosö sedade olola fedai amo dagabola digahalea, nabülasi afädëie odoai gödölasi nufudala baagoi amolia, nafade hamoi amea, udia dolö odoa Yalusaleme neebe amoli sulubadela baagila asila helësësalela nabi.

⁵ Ai, amala mademelë. Na dilima säla iahago. Dilia asigi made besuseda, dili sulubadelage amo gadola baagomolömelëla säi.

Ado besula äfäeo gägä made negeloie säi

⁶ Amalahilä, Yesuea ado besula sähalea, Dolö afädëa ie gelebi hawa sagaia ami äfäeo hawa afädë sagasi nelo. Ea äfäeo amo gägä negei dibebele bea awähamelebe, gägä made negei meli.

⁷ Amai gabugi, ea sagaia hamoi hamolasilo amoma sähalea, Nabuö. Na gäheo i ohodoagi, äfäeo i wagadi egowea gägä negei walebelele bea maahamu nelo amo, walioge bea misi gaso, hä, gägä made negei gabumelë. Amai gabugi, dia i go abadigimalo. Mi edoie ea memalä naga goie säfe go nali naha namolöla säi.

⁸ Amala säsebegi, dolö amea säla obëgësalea, Dafidilo, e aso, gäheo i afädë namiäia fisigisimo. Na goie mia naga go dagabola digilahilä, sugua gao gaisa negedelämelë.

⁹ Gäheo i namolömadi gogi, hä, gägä negeseda, amo dofea. Gägä made negeseda, dia hä, abadigimäiamelëla säi.

Segeyo Sabada gafegi, Yesuea udia afädë wahi-lasi

¹⁰ Segeyo Sabada gafegi, Yesu e gedolo mosö afädëgi nogila digalahilä, säla olelesa nelo.

¹¹ Udia afädëma mugabe nafadea ololasi amea, gäheo i nabülasi afädëie odoai gödölasi, ie domalo mogola aligimolö uli sulo amo, gedolo mosöa ami sulo. Udia amo baagi gugi amea, e dofä mogola aligimolöi made sulo.

¹² Yesuea udia amo beala e misialalahilä, ema sähalea, Udia-o, di oloi amoda, na hä, fisigäimelëla säi.

¹³ Amala sälahilä, ie naaboea udia amoma diigi. Amala diigi amole, udia amo hä, mogola aligilahilä, Godeie ëi gauia adaha nelo.

¹⁴ Amala hamosebegi, gedolo mosö beaha aligilo dolö amea, segeyo Sabada gafegi Yesuea udia amo wahi gabula habobalahilä, udia dolö sefolalo amolima sähalea, Segeyo gafeia dibe amoligida, hamoi hamolo. Segeyo amoligi nea, oloi difolalebe amoli wahimäia moholö dialea. Segeyo Sabada gafegi wahimäia, moholöi mademelëla säi.

¹⁵ Amala säsebegi, Dafidilo Geloia ema säla obëgësalea, Asigi musügä negelola dili, segeyo Sabada gafegida, dili sulubadelaea sugua gao mosöa awälahilä, dilile sugua gao galëge, sugua dögi galëge, gide begela negei dibe amo fisigäla, ödä muäia sigi gaula awäla, ifosilo madele.

¹⁶ Amaimo, udia goweda, Abalahamaie idiwi afädë amo, Saidania e gäheo i nabülasi afädëie odoai gödölasi nafodoi sulo. Na e nafodoi amo, segeyo Sabada gafegi, fisigämolö dialea madelela säi.

¹⁷ Ea amala säla obëgësebegi, ebalä ado nii nefolalo amoli nafadela hewai. Amai gaso, udia dolö nefolalo amolia, ea nelebo hedabi hamose amo sulubadelagi, obeägisa nelo.

Ado besula masada gägäie säi
(Madiu 13.31-32; Maga 4.30-32)

¹⁸ Amasebegi, Yesuea sähalea, Godea Beaha Maadela Sigi Neebe amo gowe gadoimelëla, na abodo gadoima oodo beala sämolödu.

¹⁹ Amoda masada gägä gadoi dialeamelë. Dolö afädëa masada gägä afädë gaula awälahilä, ea sagaia ami sagai. Masada amoda bäulahilä, i gadoi neëgi, haea sefolalebe amolia adomo amogi, gilifa hamola dilola säi.

Ado besula yidiie säi
(Madiu 13.33)

²⁰ Yesuea ado aso, sähamu nea, bu elö nabahalea, Godea Beaha Maadela Sigi Neebe amoda, na abodo gadoima oodo beala sämolödu.

²¹ Amoda beledi edelo yidi gadoi dialeamelë. Udia afädëa falodaia balawa edefade besigala salala, beledi edelo yidi amola gegoala naabolahilä, beledi sulubadela edela bolela fedalola säi.

Dilida idi doge negei dedeleigi digamalola säi
(Madiu 7.13-14, 21-23)

²² Yesu e Yalusaleme aulo idi amogi awäha nea, gaamu dibeamadige, sege dibeamadige, säla olelesa nelo.

²³ Dolö afädëa ema nabahalea, Dafidilo-o, Godeada dolö afädë afädëla damula moholölela nabi. Yesuea ilima säla obëgësalea,

²⁴ Idi doga negei dedelei holöfalä amogi nogila digamolöie, dilia gelola elälisa namialo. Amoie mida, na dilima säla iahago. Udia dolö maleia nogila digamolöila asigila, nogila digaha gaso, ulimolömelë.

²⁵ Hobeala, mosö eedo amo nowela fedalahilä, mosö idi gaseda, dili maala, ifo baagido segea nea, idi galogi nufigisa nea, uuala sähalea, Dafidilo, nili mudulä, idi gai dugimola sämolömelë. Gaso, ea dilima säla obögësalea, Na dili dawa made. Dili guwila misilage, na dawa made neamelëla sämolömelë.

²⁶ Amala säsegi, dilia säla obögësalea, Niläda dibalä molö ödäge naha aligilo amo, amase, diada nilile idiafa nea, säla olelelommelëla sämolömelë.

²⁷ Amala säsegi, ea bu elö sähalea, Na dili dawa made. Dili guwila misilage, na dawa made neamelë. Mala nafademu hamolo neebe dili sulubadela, nie odagia namolö made. Moholöi mosöla sämolömelë.

²⁸ Amala säsegi, dilia Abalahamage, Aisagage, Yeigabage, bea sälo ili sulubadelage, Godea Beaha Maadela Sigi Neebea ami neebe amo bealahilä, dili segea sogobala sadia gai nea, dilia diisalea, bese ali nalëgësa namolömelë.

²⁹ Amaimo, udia dolö eso maasidolage, eso digasidolage, agesu näiadodilage näiadodilage, mafula gegedolahilä, Godea Beaha Maadela Sigi Neebea ami molö naha samolömelë.

³⁰ Nabuö. Walio udia dolö odoa hobeala nefolalebe amolida, oböla, dafidisalea, amase, dafidila nefolalebe amolida, hobeamolömelëla säi.

*Yesuea Yalusaleme bobasëi
(Madiu 23.37-39)*

³¹ Amala säha neebe amo gaalu, Felesi dolö odoa Yesu neebea maalahilä sähalea, Dida segewe digila, sege odoadi mosalo. Mida, Heledoea di nufulö helësësa nea wabu.

³² Amala säsebegi, Yesuea säla obëgësalea, Dili awälahilä, ilua ügülo goma gomalä säla imalo. Nabuö. Walio aiyo namolö amogida, neda mugabe fedai nefolalebe amoli nesila digi, oloi difolalebe amoli wahila digisa namolömelë. Amalahilä, segeyo osodagida, na hamoi hamoi amo, hä, wagamolömelë.

³³ Amase, walio aiyo gahadala amogida, ne molö dialea. Mida, bea sälo neebe amoda, sege odoadi nufudala made baagola, ilia e Yalusaleme amimu neëgi, nufudala baagomolö dialea.

³⁴ Yalusaleme-e, Yalusaleme-e, bea sälo nefolalo amoli nufudala baagologe di. Amase, dolö digali fisiga wei amoli igia nufidologe di. Haea gagalu-goea ie malö augia hawa neala gafedela, musügä negelo amo gadola, segeyo aboläiagi gadola, na dïe malö goli neala gegedolasideläi gaso, dihili habosio.

³⁵ Nabuö. Godea dilile mosö digila awäsegi, mosö amo memalä diamolömelë. Na dilima sähago. Dilia ne bu elö made beala nelolahilä, dilia sähalea, Dafidilo Geloïie ëigila maahago, Godea e neala obeägïlasimäiala säsolo amo gala, dilia ne bimolömelëla Yesuea säi.

14

Yesuea dolö domalo gagalui wahi

¹ Segeyo Sabada afädëgi, Yesu e Felesi ilile busa dolö afädëie mosöa molö naa awäsebegi, udia dolö nefolalo amolia, ga madela sisila beaha nefolalo.

² Dolö domalo gagalula nafadei afädë Yesuie odagi gaalu ami sulo.

³ Dolö amo bealahilä, Yesuea mala säla negei amo oleleloge, Felesi dolöge sefolalo amolima nabahalea, Segeyo Sabada gafegi wahilasimolöda dofeale, ma, dofea madelela nabi.

⁴ Amala nabasebegi, ilia made säla obögëi. Amasebegi, ea dolö amo neawela wahilahilä, e mosaloi.

⁵ Amala hamolahilä, ea ilima nabahalea, Dili sebe gogi afädëie malö galëge, sugua gao galëge, segeyo Sabada gafegi ödä dögöigi digaseda, fodolofali dusugala nimolölela nabi.

⁶ Amala nabasebegi, ilia säla obögëmolöi made meli.

Nagadaiala namolöie säi

⁷ Yesuea beahamelebe, dolö odoa molö naa misi mumusogi digafiai amolia, filo hedabidaiamu fimolö memesebegi, ea ilima ado besu afädë gowe säla i.

⁸ Dolö afädëa udia neahalea, molö molö misialola säsegi awäseda, filo hedabidaiamu fimabio. Di gadoi made, ilia dolö ëi sälo memelei neebe amoge misialaloea.

⁹ Amala misialai galëda, dige, dolö ëi sälo amoge welo amohi maalahilä, dima säla iahalea, Filo di sebegoda, dolö gowegali imola säsegi, di nafadela hewalahilä, baagidofali fila digamolömelë.

¹⁰ Amo gadola made, dolö afädëa di misialola wesegi awäseda, dida baagido samialo. Dia amala

hamoseda, dolö di welo amohi maalahilä dima sähalea, Ne damelë-e, di filo hedabidaia guwi fimolö misiëla sämolömelë. Ea amala säse ameadä, udia dolö molö naha sefolalebe amoli sulubade-laie siigi, di ilibialasimolömelë.

¹¹ Udia dolö hili ili ilibialo amoli sulubadela neala nagadaialasisalea, amase, afädë hi e nagadaialo neebe amoda, ilibialasimolömelëla säi.

Udia dolö dabe imolöi made neebe amolima mala hamomolö dialea

¹² Amala sälahilä, Yesuea dolö molö molö misialola e wei amoma sähalea, Dia esoa galëge, deadi galëge, molö afädë giaseda, di damelëge, didooge, di sosogoge, amase, muni gaui dibalä sebe amolige, molö molö misialola wemabio. Hobeala, amo dabe ilia dili molö molö misialola säloea. Dabe amala säse ameadä, dia hamoi amoie bidi nii aguimelë.

¹³ Hä, dia molö afädë giaseda, dolö busadäoi sefolalebe amolige, domalo nafadei sefolalebe amolige, emo nafadei sefolalebe amolige, amase, si golai sefolalebe amolige, molö molö misialola weseda,

¹⁴ dia obeägisa namolömelë. Dolö amoli gadoi nefolalebe amoliada, dia molö gila i amo dabe made ia obëgemolö gaso, hobeala Godea udia dolö hedabi hamolo baagoi amoli nowelasisolo amo gala, bidi imolömelëla säi.

*Ado besula molö edefade giaila säi
(Madiu 22.1-10)*

¹⁵ Yesubalä molö naha sefolalo amoligi, afädëa ado amo nabalähilä, Yesuma sähalea, Udia dolö Godea Beaha Maadela Sigi Neebea ami

nogila digala, molö naha samolö amoliada, obeägimolömelëla säi.

¹⁶ Amala säsebegi, Yesuea säla obëgësalea, Dolö afädëa molö edefade giamolöla helësëlahilä, molö amo molö, ea udia dolö yafie misialola hobe säi.

¹⁷ Hä, dolö amea molö molö segeyo daiai amo besela galasebegi, ea ië hamoi hamolasilo amoma, dolö dafidi hobe säi amoli bea mosalolahilä, dia ilima gomalä sämalö. Nelebo sulubadela daiai dibe ameada, dili misiëla sämalola säi.

¹⁸ Amala säsebegi, udia dolö amoli sulubade-laia, Niläda made moholö gabumelëla säi. Afädëa sähalea, Neda sagai nofela nii dibe amo beaha namolö dibe ameada, asigii gabu, ne made moholömelëla säila sämaloi.

¹⁹ Elöea sähalea, Neda sugua gao nabülasi waliomu nealahilä, ne amo oodo beala beaha namolö awäse weada, asigii gabu, ne made moholömelëla säila sämaloi.

²⁰ Amase, elöea sähalea, Neda, hä, walio wäla udia nii ameada, ne moholö uli gabiola säi.

²¹ Amala säla obëgësebegi, hamoi hamolasilo amo obëgëlahilä, ea ado amoli ië dafidilo amoma säla i. Amala säla iasebegi, ië dafidilo amea ado amo nabala, mihalälahilä, ië hamoi hamolasilo amoma sähalea, Di fodolofali awäla, gaamugi aulo idi edefade dibe amoligige, amase, idi holöfaligi aulo dibe amoligige awälahilä, dolö busadäoi sefolalebe amolige, domalo nafadei sefolalebe amolige, emo nafadei sefolalebe amolige, amase, si golai sefolalebe amolige, dia sigi maala, nïe mosöa nogila digamolö misialola säi.

²² Amala säsebegi, hamoi hamolasilo amo

fodolofali awāla, obëgëlahilä sähalea, Dafidilo-o, dia säi amo gadola hamosa maadei gaso, mosö, aso, fu dibemelëla säi.

²³ Amala säsebegi, dafidilo amea hamoi hamolasilo amoma sähalea, Nïe mosö nobamäiaïe, di gaamu dīgila segea awāla, aulo idi edefade dibe amoligige, sagai mosöa aulo idi holöfali amoligige awālahilä, udia dolö amolima misiëla gelola sāmälola säi.

²⁴ Na dilima säla ïahago. Na dafidi hobe säi dolö amoligi, nïe molö daiai amogi, afädëa diigila, molö made gabumelëla säila Yesuea säi.

*Udia dolöea dafidi hedabola helësëlahilä, Yesu bëgëla moholö dialea
(Madiu 10.37-38)*

²⁵ Segeyo afädëgi, udia dolö yafie Yesu bëgëla maaha dibegi, ea ïlima besuia imogolahilä sähalea,

²⁶ Afädë ne neebee maase amea, ïe eedole emelemage, ïe udia malölalimage, ïe edoole elefilemage, amase, hïle namolöfali amomage, made habobaseda, eda nïe bëgëla aulo namolöi mademelë.

²⁷ Amase, afädëa hïle i fügäi neala gaula, ne awäsewe gadola bëgëla made maasege, nïe bëgëla aulo namolöi mademelë.*

²⁸ Amaimo, dili nebegogi, afädëa sagai idihë namolöie mosö, holöbö ilibia ulimolö helësësedä, na mosö olala agumolöie muni dofea dialealedula helësëlahilä, mosö we muni gowe gadolaeada ulimolö gabula dafididale helësëmolö madele.

* **14:27:** Madiu 10.38gi säi dibe amo bimalo.

²⁹ Ea dafidi amala made helësëla, mosö igau sagala, sedade olase amo made aguseda, udia dolö amo bease amoli sulubadelaea, e gadiabola

³⁰ sähalea, Dolö gowea mosö oledelä mi gäwi gaso, agumolöi made gabula sämolömelë.

³¹ Amase, beaha aligilo gini afädëa, gini elöbalä nudula moholö neëda, ea dafidi salea helësësalea, nïe ami dausini nabülasi afädëada, gini elö amoïe ami dausini nabülasi äudä sigi maase amolibalä nudula gaalumolöiledula helësëmolö madele.

³² Helësëla beahamelële, dofea made gabula helësëseda, aso, wagadi made maaha neëgi, nudula made, fisila dalumolöïe, dolö odoaea aeala ado sämolö mosalala sälomelë.

³³ Amo gadola, dili neebe gogi, afädëa ïe nelebo dibe amoli sulubadela made fisisa maadeseda, nïe bögëla aulo namolöi mademelëla säi.

*Yesuea ado besula ëbï hëdä maade, nafadeïe säi
(Madiu 5.13; Maga 9.50)*

³⁴ Yesuea ado aso, sähamu nea sähalea, Ëbïda hedabi galea. Gaso, ëbï hëdälo amo hogosa heleseda, edoea bu hëdälasimolöi gabu.

³⁵ Ëbï amo gadoiada, molö sagai hedabola fedamäia, ugila negemolöi mademelë. Amase, nilia sagaia ami sugua gao gaisa gedola negemolöi made. Fisimolö dialea.

Afädëa gëhea nabolöi galëda, hä, nabualola säi.

15

*Ado besula sugua sibi dabadigila säi
(Madiu 18.12-14)*

¹ Segeyo afädëgi, dagisi muni neloge, nafade hamologe, Yesu neebee ga madela nea, ea ado säse amo nabalö misi.

² Gaso, Felesi dolöle mala dawadigi dolölea, habobala sädäwala sähalea, Dolö egoweada nafade hamolo neebe amolibalä damelë hamologe, ilibalä molö naha aligiloge, neamelëla säi.

³ Amala säsebegi, Yesuea ilima ado besu gowe säla i.

⁴ Dili afädëa sugua sibi hädali afädë foi nelo amoligi, afädë dabadigi galëda, eada sugua sibi nabülasi sëgëlasiië odoai sëgëlasii amolida, giisi naha namiäia ifosilahilä, afädë dabadigi amo bimolöila, awäla hogosa nea, giso, beagolelo madele.

⁵ Ea hä, beagolelahilä, obeägila, hi sogobala gädädaia gaula

⁶ mosöa obëgëlo. Obëgëlahilä, e damelëla ilige, ea mosö ga mamadela sefolalebe amolige, wela gegedolahilä sähalea, Nie sugua sibi afädë dabadigi amo, hä, beagolei amogi, obeägisa neawe. Nihilägila gaalu obeägidila sälomelë.

⁷ Amo gadola hamolo amoie, na dilima säla iahago. Udia dolö nabülasi sëgëlasiië odoai sëgëlasii asigi mogoi neebe amoli, bu asigi besumolö made neëgi, afädëa nafade hamosa nelo amo asigi besuseda, selesaia mosöa hido elöla obeägimolömelëla säla i.

Ado besula muni dabadigila säi

⁸ Yesuea ado aso, sähamu nea sähalea, Udia afädëa muni giwi nabülasi gaula nea, giwi afädë mosöa ami dabadigiseda, ea hä, gele wala gaulahilä, bimolöila mosöa gëgelë doala, geleä hedabola hogosa nea, giso, beagolelo madele.

⁹ Ea muni amo beagolelahilä, e damelëla ilige, ea mosö ga mamadela sefolalebe amolige, wela gegedolahilä sähalea, Nie muni giwi afädë dabadigi amo, hä, beagolei amogi, obeägisa neawe. Nihiligila gaalu obeägidila sälomelë.

¹⁰ Amo gadola hamolo amoie, na dilima säla iahago. Afädëa nafade hamosa nelo amo asigi besuseda, Godeie selesaia fii neebe amolia obeägilomelëla säla i.

Ado besula dolö afädëie malö äudä sulola säi

¹¹ Yesuea ado aso, sähamu nea sähalea, Dolö afädëie dolö malö äudä sulo.

¹² Amala salea, malö üfi amea eedoma sähalea, Naado, munige, nelebo odoage, nedoo halima mogela imolö dibe gogi, nie amo nihima mogela imola säi. Amala säsebegi, eedo amea sulubadela helema mogela i.

¹³ Amala hamola, segeyo ede made nelolahilä, üfi amea, ie nelegei amo odoama bidi neaha nelo-lahilä, muni amo gaula, sege wagadi made, gädili elögi namolö bahila asi. Segea ami nea, nelebo galone hamomolöi made amo hamosalea, ea muni gauia amo waeasesa maadei.

¹⁴ Amalahilä, muni gaui amo maadei amoleda, segea ami sidë i edefade gelola besela galai. Amo gala, malö amea nelebo afädë made gaui nelo.

¹⁵ Amala nebegi, segea ami fii dolö afädëa, ie hamoi hamomolöie, yala isogi dia nie sugua sigi namialai.

¹⁶ Amala sigi nea, sugua amolia falaga mai gafodo dibe amo beala hamelahilä, bolemäia neala nuduläla helësëi. Gaso, afädëa e molö made i.

¹⁷ Amalahilä, hobeala asigi negela obëgësebegi, ea sähalea, Nie naadoie hamoi hamolo nefolalebe amolida, molö yafie naha diëgi, ne molö made naala wi nea, hä, dofä baagomolö gabu.

¹⁸ Gamelä, neda naado neebee obëgëla awäla, gomälä sämolö. Naado-o, na Gode selesaia mosöa neebe alima, nafade hamoimelë.

¹⁹ Hä, walio neda hedabi made. Ne die malöla sämolöi made neawe. Die hamoi hamolo amolima hamosa neebe go gadola, nemage hamomalola sämolöla säi.

²⁰ Amala sälahilä, e nowela eedo neebee awäha nelo.

E aso, eedo neebee made besela galala, holöbö wagadi made maaha nebegi, eedoea e beala, ie iso asigia bobasëlahilä, baluluia awäla, neawela mimi.

²¹ Amala hamosebegi, efegë amea sähalea, Naado-o, na Gode selesaia mosöa neebe amo alima, nafade hamoimelë. Hä, walio neda hedabi made. Ne die malöla sämolöi made neawemelëla säi.

²² Amala säsebegi, gaso eedoea ie hamoi hamolasilo amolima sähalea, Dilia nie fagulo didiga salugalo hedabifalä amo, fodolofalä nea awälahilä, egali gäsimalo. Amalahilä, ie naabo sesafogi, ulini salugasila, emo usililoge salugasimalo.

²³ Amalahilä, sugua gao üdili säfei neebe amo, dilia sigi gaula maala, nufualo. Nili, hä, molö naala obeägidi.

²⁴ Mida, nie malö go baagoi gaso, walio namolö bu obëgëla misi neebe amogige, e dabadigi gaso, nilia beagolei amogigela säi. Amala säsebegi, ilia obeägila molö edefademälä giala mai.

²⁵ Amo giala nase amo gaalu, malö abulümi

amoda sagaia nelo. Hobeala, e mosöa obëgësalea, mosö ga madela nea nabelebe, mosöa ami udia dolöea ilibo gaula digi, gisali gaula, sigola digisalea, goba fedase amo nabi.

²⁶ Amala hamosebe amo nabala, ea hamoi hamolasilo amoligi, afädë welahilä nabahalea, Ilia goda edo hamosebela nabi.

²⁷ Hamoi hamolasilo amea säla obëgësalea, Di-doo amo, hä, obëgëla misi amogi, diadoea, sugua gao üdili säfei nelo amo nufualai. Mida, ie malö amo, made baagola, obëgëla misi amogi.

²⁸ Amo nabala, malö abulümi amea mihalälahilä, e mosöa nogila digamolö helësëi made nelo. Amala hamosebegi, eedo e segea doadigila fedalahilä, abulümi amo nogila digamäia, ema aeai ado odoa säla i.

²⁹ Gaso, ea eedoma säla obëgësalea, Ne gäheo i yafie dibalä nea, dië hamoi baagi sëi, memalä galabaia hamoi gadoi hamolasisa nea, dië ado neadigila made nelo. Amai gaso, dia segeyo afädëgi, na ne damelë neebe amolibalä obeägimäia, sugua meme üdili afädë made ilo amo, dihi helësëmo.

³⁰ Dië malö go idigi nawela susugu hamolo udia amoligali, dië muni iala waeasesa maadei amo obëgëla maasebegi, dia sugua gao üdili säfei nelo amo, nufuda negei gabio.

³¹ Amala säsebegi, ie eedo amea säla obëgësalea, Nïe malö-o, dida segeyo sulubadelagi haligila nelo. Nelebo nïe dibe amo sulubadela, dië dilo amoda.

³² Gaso, dië didoo amo baagoi gaso, walio namolö bu obëgëla misi neebe amogige, e dabadigi gaso, nilia beagolei amogige, walioda, nilile iso

asigia, hïdo elöla haeafula obeägïmolö dialeala säi.

16

Ado besula sigi aligiloea bidi negei hamogïe säi

¹ Yesuea ïe bëgëla aulo amolima sähalea, Nelegei yafie negelo dafidilo dolö afädë nelo. Dolö afädëa dafidilo amoïe nelegei amoli sigi nebegi, dolö odoa dafidilo neebee ami maalahilä, ïe nelebo sigi aligilo amea nafade hamoïmelëla sämolöïe, dafidiloma sähalea, Dïe nelebo sigi aligilo amea, dïe muni amoda, waeasese melïmelëla säla ï.

² Amala säla ï amo nabalahlä, nelegei yafie negelo dafidilo amea, ïe nelebo sigi aligilo amo misialola welahlä, ema nabahalea, Dïe sedalu afädë na nabi amoda, abilia hamoi. Nïe nelebo dia sigi neebe amoli hedabola nidelahilä, dëdëla negesa maademolö mosalo. Dida nïe nelebo sigi aligilo namolö mademelëla säi.

³ Amala säsebegi, nelebo sigi aligilo amea hïdo sähalea, Nïe dafidilo ameadä, ïe nelebo sigi nelo amo digïla mosalola, hä, säi amo gabu. Amai na edo hamomolödu. Na odoaïe hamoi hamolasila, naga dagabomolö amoge, geloi maade gabu. Amase, odoama muni ëdëgëmolö amoge, ne hewai gabu.

⁴ Wae! Na hamomolö amo helësësawe. Nïe dafidilo neebe amea, na nelebo beaha neebewe haila fisiseda, na gowe gadoi hamomolöla helësësewe hamoseda, ne damelë neebe amolia, neda ilia mosöa misiëla sämolöla helësësala säi.

⁵ Amala helësëlahilä, ea ïe dafidilo amoma bidi negelo dolö amoli, hïdo hïdola wela mofiamalolahilä, dafidi misi amomadale nabahalea, Dia nie busa dolöbalä bidi aboläia negei dialeala nabi.

⁶ Ea säla obëgësalea, Olibe gägäie weli ödä i edefadegi usi hädali afädë bidi negei neamelëla säi. Amala säsebegi, sigi aligilo amea dolö amoma sähalea, Dia bidi negei amoïe beba amoda gomele. Dia beba go nealahilä, hä, fodolofali fia idogola salea, nabülasi bia dëdëmola säi.

⁷ Amala sälahilä, ea dolö elö amoma nabahalea, Dia bidi aboläia negei dialeala nabi. Amala nabasebegi, elö amea säla obëgësalea, Eladi gadoi widi sali adu dausini afädë bidi negeimelëla säi. Amala säsebegi, sigi aligilo amea ema sähalea, Dia bidi negei amoïe beba amoda gomele. Dia beba go nealahilä, hä, hädali gödölasi dëdëmola säi.

⁸ Hobeala, dafidilo amea sigi aligilo mogoi made, asigi halowei amoma sähalea, Dia hobeala edo hamomolö amo hedabola helësëla, amala hamoi goda, hedabola hamoi gabumelëla säi. Nagadaia namolöïe malö amolia, yo digaloïe malö amolia hamolo amo gadoi made, baagila awäla, odoa hili ili gadoi helësëla hamolo amoda, hedabola helësëla hamolomelë.

⁹ Na dilima säla ïahago. Nagadaiaïe muni dibe ameada, udia dolö odoa neebe amoli damele hamomalo. Amala hamosa neëgi, munia hamoi hamolo amo wagasolo amo gala, Godea namolöi

namolö dibeami, namolö misiëla sämolömelë.*

¹⁰ Afädëa nelebo holöfalï dibe amo, hedabola sigi aligiseda, nelebo edefade dibe amoge, hedabola sigi namolömelë. Amase, afädëa nelebo holöfalï dibe amo, mala mogola made sigi aligiseda, nelebo edefade dibe amoge, mala mogola made sigi namolömelë.

¹¹ Amai gabugi, asigi falagasei made nea, nagadaiaïe muni amo, hedabola made sigi aligiseda, amai nelebo dofä hedabi dibe amo, dilia sigi namiäia, nowëa dilile naabogi gausimolödu.

¹² Amaimo, dilia odoäïe nelegei dibe amo asigi falagasei made nea, hedabola made sigi aligiseda, amai dilile nelegeida, nowëa ïmolödu.

¹³ Hamoi hamolasilo afädëa, dafidilo äudäïe galabaia hamoi gadoi hamolasimolö ulïmelë. Ea elö amoma bimolö habobahalea, elö amo boba hamomolömelë. Ma, elö amo hedabola ugila negesaleada, oböla, elö amo memalä gabula helësëmolömelë. Dilia Godeïege, muniïege, helegelaïe galabaia hamoi gadoi hamolasimolö ulïmelëla Yesuea säla ï.

Ado säla negei amoïege, Godea Beaha Maadela Sigi Neebe amoïege Yesuea säi

¹⁴ Felesi dolö muni boba hamolo amolia, Yesuea ado säi amo sulubadela nabalahlä, e gadiabola säha dilo.

* **16:9:** Ado goïe mida, fädäla ulufai made. Yesuea säi egoweïe, dawadigi dolö odoaea helësësaleada, udia dolö odoa nelegei maade nefolalo amoligali, ugila negela muni ïaseda, hobealada, ilia nili sigi awäla, ilibalä gedola Hebeni neada, obeägïmolö gabula helësëi.

¹⁵ Amalebegi, Yesuea ilima sähalea, Diliada udia dolö odoa neebe amolia, dili asigi mogoi neebela helësëmäiala hamelo neago gaso, dilile iso asigida, Godea dawa nea. Udia dolöea nelebo hedabi edefade gabula helësëlo amoda, Godeie sidaia nafadefali nafade dialeamelë.

¹⁶ Mosese nebegi, Ado säla negei dibe amoge, bea sälo ilia ado säla negei dibe amoge, säla iaha neloa amila maala, Yone neebela besela galai. Amase, Yone misia amila mi gäwilahilä, Godea Beaha Maadela Sigi Neebe amoie, Ado Mala Hedabi säla iaha nea. Udia dolö sulubadelaea gelolahilä, ami digaha neamelë.

¹⁷ Amaimo, muge, naga föige, hogosa helemolöi dialea gaso, Mosese nebegi, Ado säla negei dibe amogi, bea sälo ilia ado säla negei dibe amogige, ado holöfaliië dudumu afädë, made hogosa helemolömelëla säi.

Yesuea udia nii fisiloie säi

(Madiu 5.31-32; 19.9; Maga 10.11-12)

¹⁸ Yesuea ado aso, sähamu nea sähalea, Dolö afädëa ië udia nii amo fisila, udia elö neaseda, ea udia amo fa nimolömelë. Amase, dolö afädëa udia nii fisi amo neaseda, amoge ea fa nimolömelëla säi.

Nelegei yafie negelo dafidilo dolöle Elasalusilele ado säi

¹⁹ Yesuea ado aso, sähamu nea sähalea, Nelegei yafie negelo dafidilo dolö afädë sulo. Dolö amea fagulo hogale uii didiga salugaloge, fagulo hedabi hido elöi muni edefadea nii amoge, salugalo neada, segeyo sulubadelagi obeägila molö hedabifali amomu naha nelo.

²⁰ Amase, busadäoi dolö afädäge sulo. Amoie ëida Elasalusi. Ìe domalo sulubadela äyomu aligisa maadei sulo. Odoaea e sogobala gaula, nelegei yafie negelo dafidilo dolö amoie mosö idi galo mia ami, ifosisa aligilo.

²¹ Busadäoi ameada, nelegei negelo dolö amea molö nahalea, auli hawa dao digase amo molöila gelola helësësa filo. Ügülo amoli maala, ìe domalogi äyo aligi amoli nobaha aligilo.

²² Hobeala, busadäoi amo baagosebegi, selesaia fii ilia e gaula awäla, Abalahama neebee ami ifosi. Nelegei yafie negelo dafidilo dolö amoge baagosebegi, ilia e dögöla negei.

²³ Eda heli segea ami së edefademalä naha nea, sida adogola beahamelebe, Abalahama mia made neebe, amobalä Elasalusige neebe meli.

²⁴ Amala neebe amo bealahilä, ea uuala säia adogosalea, Naado Abalahama-o, ne nulo gobeia wi nea, së edefade naha neebe weada, dia ne bobasëla, Elasalusiie naabo sögö ödägi gelahilä, nie eli hisulasila diigila misialala sämola säi.

²⁵ Amala säsebegi, Abalahamaea säla obëgësalea, Nìe malö-o, di made baagola nea, dida nelebo sulubadela hedabigimu nelo. Elasalusi eda nelebo sulubadela nafadegimu nelo amo, helësëmo. Gaso, walio sege wegi neada, e bobasëla aealasisa nebegida, dida hä, së edefade naha nebegi.

²⁶ Amase elöda, odoaea nili neebee wila, dili neebee idogoi digadeläla hamese amoli digamolö ulimäia, nili mogogi nofe geloi edefade negei dialeamelë. Amo gadola, dili neebee amilage, nili

neebea wi fedamolö uli neamelëla säi.

²⁷ Amala säsebegi, dolö amea säla obëgësalea, Hä, amai galëda, naado Abalahama-o. Na dima gelola afädë nabahago. Dia Elasalusi e naadoea mosöa fisiga idogomo.

²⁸ Mida, nïe nedoolali bia nea. Amolige së nûlo dibe wi asiala muloea, ea ilima gelola säla ïmalamalola säi.

²⁹ Amala säsebegi, Abalahamaea säla obëgësalea, Ilida Mosesea ado säi dëdëla negei dibe amoge, bea sälo ilia ado säi dëdëla negei dibe amoge, galea. Ilida ilile ado amo nabuäiala säi.

³⁰ Amala säsebegi, dolö amea sähalea, Ai, Naado Abalahama-o. Afädë baagoia amila nowela, ili neebee awäsedä, ili asigi besumolömelëla säi.

³¹ Abalahamaea sähalea, Ilia Mosesea Ado säi dëdëla negei dibe amoge, bea sälo ilia ado säi dëdëla negei dibe amoge, made nabaseda, afädë baagoia amila nowela awäla säse amo nabalage, dofäla made helësëmolöla säimelëla Yesuea säi.

17

Neala nafadelasilöie säi

(Madiu 18.6-7, 21-22; Maga 9.42)

¹ Yesuea ïe bëgëla aulo amolima sähalea, Udia dolöea asiala hamomäia, ili neala digalasimolö nelebo elö elöla, dofä moholö gaso, nelebo amoli misiäia, dolö dogä negelo amoda, asigii gabu.

² Dolö amea malö holöbö gowe gadoi nefolalebe goweligi, afädë neala digalasiseda, ëfëa igi ede-fademalägi begela, bidi näiadoea ïe muugia begelalahilä, ödä duhulugi sadia idogosedä, ïe hed-abida amomelë.

³ Amala hamoloea, dihili dili hedabola idihē namialo.

Die didoo afädēa nafade hamoseda, nemomalo. Amogi, e bu asigi besuseda, nafade hamoi amo sāla made, fisimalo.

⁴ Amaimo, segeyo afädē amogimu, dima gifalādalāla nafade hamolahilā, gifalādalāla asigi besula, di neebee maalahilā, na dima nafade hamoimelēla sāsedā, ea nafade hamoi amo, dia sāla made, fisimalo.

Yesuea asigi afädē negeloie sāi

⁵ Abosolo dolō ilia Dafidilo Geloima sähalea, Nilia asigi afädē negei neebewe, dia neala edelasimalola sāi.

⁶ Amala sāsebegi, Dafidilo Geloia ilima sāla obēgēsalea, Dilia asigi afädē negeigo, masada gägā holōfalī amo gadoi negei nea galēda, dilia hä, i neebe gowema sähalea, Dihī soomo aala gaula awāla, ödā duhulu dibeā ami sagala namiēla sāsedā, dia sāse amo nabala hamomolōmelēla sāi.

Yesuea hamoi hamolasiloie sāi

⁷ Yesuea ado aso, sāhamu nea sähalea, Dili nebegogi afädēa, ie hamoi hamolasilo neebe amea sagai sagamolōie naga dagabosa nelo galēge, sugua sibi sigi nelo galēge, e mosōa obēgēla maaha neēgi wāla, ea sähalea, Di fodolofalī maalahilā, molō molōie samiēla sāmōlōle.

⁸ Amala made. Ea hamoi hamolasilo amoma sähalea, Nie molō giala daiamalo. Amalahilā, di fagulo afädē neala bulula, ne molō molō amo deala gaula maala, na molō ödāle nase amo gaalu, dia sigi beaha namialo. Amala hamolahilā, hobealada, dihīdi mualola sālo madele.

⁹ Oböla, hamoi hamolasilo amea säi amo gadola hamosa maadeseda, ie dafidilo amea ema nesege, hedabola hamoi gabula sämolöle. Ai, amala made.

¹⁰ Dihili dilige amo gadoi wäla neebela helësëla, dilia hamomalola säi amo gadola hamosa maade-lahilä, gomalä sämalö. Nilida hamoi hamolasilo dofea mademelë. Nilia hamomolö dibe amomu hamoimelëla sämolö dialeala, Yesuea säi.

Yesuea dolö gudubu hamoi nabülası wahılası

¹¹ Yesu e Yalusaleme moholö awähalea, Disiligi Samelia Galilile mogogi ami awäha nelo.

¹² E gaamu afädë dibeami awäla besela galaha nebegi, dolö gudubu hamoi nabülası idiafa holöbö wagadi madela nea,

¹³ gelola uuala sähalea, Dafidilo Yesu-o, dia nili bobasëmola säi.

¹⁴ Amala säsebegi, Yesuea ili bealahilä sähalea, Dili gobela ilo amoli neebea awäla, dilile domalo go olemolö mosalola säi. Amo nabala, ili idiafa awäha dibegi, ilile gudubu hamoi amo wahisa maadei.

¹⁵ Iligi dolö afädëa beahamelebe, ema gudubu hamoi dilo amo wahi amo bealahilä, gelola uuala Godeie ei gauia adogola, bu obëgëi.

¹⁶ Obëgëlahilä, ea Yesu mia, gumusula dia di-galahilä nesegei. Eda Samelia dolö.

¹⁷ Yesuea dolö amo bealahilä sähalea, Dolö nabülası amoli hulu wahisa maadei madele. Amaı, sëgëlası amolida, abilisio.

¹⁸ Dolö odoa obëgëla maalahilä, Godeie ei gauia adala made, dolö fii elö goweamu, amala hamos-alela nabi.

¹⁹ Amala nabalahilä, dolö amoma sähalea, Di, hä, nowela mosö. Dihï asigi afädë negei amea di hä, wahigomelëla säi.

Dolöie Malö ulufadigila moholö amoie säi
(Madiu 24.23-28, 37-41)

²⁰ Segeyo afädëgi, Felesi dolö nefolalo amolia Yesuma nabahalea, Godea Beaha Maadela Sigi Neebe amoda, abola moholö gabula nabi. Amala nabasebegi, Yesuea ilima säla obëgësalea, Godea Beaha Maadela Sigi Neebe amo, nofe elöi siia melemolöibaläda, made moholömelë.

²¹ Afädëa sähalea, Bimo, gui neebe, ma, gagowei neebela sämolöi mademelë. Nabuö. Mida, Godea Beaha Maadela Sigi Neebe amoda, hä, dili neebaa gui misi dialeamelëla säi.*

²² Amala sälahilä, ie bëgëla aulo amolima sähalea, Segeyo afädë besela galamolö amogi, dilia Dolöie Malö amoie segeyo afädë gelola bimolöila helësëmolö gaso, made bimolömelë.

²³ Odoaea dilima sähalea, Bimo, gagowei neebela säsege, ma, bimo, gui neebela säsege, dilia ili bëgëla, bea mosabio.

²⁴ Mida, sege yabagelesegi, mu giwi sulubadelagi yo digaha maadelo amo gadolada, Dolöie Malö amo, ie segeyogi amo gadoi wäla maala namolömelë.

²⁵ Amamolö gaso, e dafidi edefademalä së elö elöla nasegi, udia dolö walio segeyo nefolalebe welia, e baagi imolö dialeamelë.

* **17:21:** Dolö odoaea ado gowe besusaleada, Mida, Godea Beaha Maadela Sigi Neebe amoda, hä, dilile isogi dialeamelëla besui.

²⁶ Noaïe segeyogi hamoi amo gadola, Dolöïe Malö amoïe segeyogige, amo gadola wäla hamomolömelë.

²⁷ Udia dolö nefolalo amolia, molö ödä nadigi, udia neadigi, dolö fila awäla digisa nebegi, Noa eda ödä sibi isogi fila fedamolö segeyo amo besela galaimelë. Amala hamosa nebegi, ödä bëi edefade maalahlä, udia dolö sulubadela ödäea naha maadei.

²⁸ Amase, Olodeïe segeyogige, amo gadola wäla hamosa nelo. Udia dolö nefolalo amolia, molö ödä nadigi, nelebo neadigi, odoaea nimäia nelebo negela digi, sagai sagala digi, mosö oladigisa nelo.

²⁹ Olode e Sodomogaamu amo dīgila awäsolo segeyo amo gala, mudaiala nulo söabalä, igi gadoi abüai, ëida saloba, neëi amola sadia idogoi amea, ili sulubadela nafadesa maadei.

³⁰ Dolöïe Malö ulufadigimolö segeyo amogige, amo gadola wäla hamosa namolömelë.

³¹ Segeyo amo gala, dolö mosö daiowa sebe amea, ïe nelegei mumusogi dibe amo nea digamabio. Amo gadola wäla, dolö sagaia neebe ameage, nelebo afädë hï mosöa nea obëgëmabio.

³² Dilia Olodeïe udia amo helësëla obëgëmalo. *Mi Gäwi 19.26*

³³ Afädëa hïle namolö amo gaula fëdöla aligimolö helësëseda, ïe namolö amo hogosa helemolömelë. Gaso, afädëa hïle namolö amo fisiseda, ea ïe namolö amo gaula namolömelë.

³⁴ Na dilima säla ïahago. Amo gala, gasigi dolö äudä sogobala adi diëgi, elö amo neahalea, elö amo dīgila moholömelë.

35-36 Udia äudä heledo wahalo dailaha neëgi, elö amo neahalea, elö amo digila moholömelëla säi.*

37 Amala säi amo nabalahlä, ilia ema naba-halea, Dafidilo Geloi-e, abidi hamomolödula nabi. Amalebe, Yesuea säla obëgësalea, Baagoi domalo dibeami, haea säsalä gadoi mafula gegedomolömelëla säi.

18

Ado besula udia didalo afädëa gudi mogeloea e ugila negemäia säi

¹ Yesuea ië bëgëla aulo amolia, habola made, segeyo sulubadelagi Godema adosa namiäiaie olelesalea, ado besu afädë säla i.

² Ea sähalea, Gaamu afädëgi mogelo dolö afädë sulo ameada, Godebalä bedälo madege, udia dolö helësëlo madege sulo.

³ Aso, gaamu amogimu udia didalo afädëge sulo. Ameada, segeyo sulubadelagi, gudi mogelo neebeami awähamu nea, ema sähalea, Nïe ado nii neebeamea, ne neala yölasisa neebeamoie, dia ne ugila negela gudi hamogila mogolasimola säla afufusamu aligilo sulo.

⁴ Amala afufusamu nebegi, mogelo dolö amea segeyo yafiegi, üla made, auausa sulo. Gasoda, oböla, hobeala hïdomu sähalea, Nada Godebaläge bedälo made, udia dolöge helësëlo made amo,

⁵ udia didalo gowea segeyo sulubadelagi, nebalä nalä egesamu neebegoweada, ië yöi dibe

* **17:35-36:** Dawadigi dolö odoia ilia helësësalea, ado goweie säida, damo gowe hawa dialeala helësëi. Amoda gowe, [Dolö äudä sagaia neëgi, elö amo neahalea, elö amo digila moholömelëla säi.] Madiu 24.40gi dibe amo bimalo.

amo na fädäla beala, hä, mogola hamogilasidelä. Ea segeyo sulubadelagi ne neebee maahamu nea, ne neala yölasilasiloea sähala säi.

⁶ Dafidilo Geloia ado aso, sähamu nea sähalea, Mogelo dolö mogoi made amea, ado säi amo nabualo.

⁷ Amaimo, Godea ie udia dolö hi memelei nefolalebe amolia, eso sulubadelagige, gasi sulubadelagige, ema uuala sähamu aligise amolima, mogola mogelasimäia, ea made ugila negemolöle. Ma, asomelëla sämolöle.

⁸ Na dilima säla iahago. Ea ili aabela mogola mogelasimäia, ugila negemolömelë. Amamolö gaso, Dolöie Malö maalahilä, nagadaia wi udia dolö asigi afädë negei nefolalebe bimolölela nabi.

Ado besula Felesi dolölea dagisi muni nelo dolölea Godema adoila säi

⁹ Udia dolö odoaea helësésalea, nilida asigi mogoi nea, odoa nefolalebe amoli sulubadelada, holöbö gidogola helësëlo amolima, Yesuea ado besula gowe säla i.

¹⁰ Dolö äudä Godeie mosöa Godema adomolö asi. Elö amoda, Felesi dolö, amase, elö amoda, dagisi muni nelo dolö.

¹¹ Felesi dolö amea nowela nea, asigiamu Godema adosalea, Gode, neda odoa ili gadoi made, fa neloge, mala nafade hamologe, udia susugu neloge, amase, dagisi muni nelo dolö wagadi neebe gowe gadoige made ameada, dima nesegesa.

¹² Na salele afädëie segeyo äudägi, molö made naala aligilo. Amase, nelebo bidi nease amo

sulubadelagida, nabülasi mogelahilä, nabü afädë neala digali ilomelëla säla Godema adoi.

¹³ Gaso, ea amala säha neebe amo gaalu, dagisi muni nelo dolö amea, wagadi made nea, Hebeni sida adogomolö made helësëla, hile bidagia nufigisa nea, Godema adosalea sähalea, Gode, neda nafade hamolo neawe. Dia ne bobasëmalola säimelëla säi.

¹⁴ Yesuea sähalea, Na dilima säla iahago. Mosöa obëgëla awäla, Godeie siigi mogola nelo amoda, Felesi dolö amo made, dagisi muni nelo dolö amomelë. Udia dolö hili ili ilibialo amoli sulubadela, Godea neala nagadaialasisalea, gaso, afädë hi e nagadaialo neebe amoda, Godea neala ilibialasi-molömelëla säi.

*Yesuea malësä e mia misiäiala säi
(Madiu 19.13-15; Maga 10.13-16)*

¹⁵ Udia dolö odoa nefolalo amolia ilile malö dubo amolige, Yesu ie naaboea diigimäia, e neebea ami sogobala gaula maasebegi, bëgëla aulo amolia amo beala, ilima halala nemola dofogai.

¹⁶ Amala nemosebegi gaso, Yesuea malësä amoli e neebea ami mofiamalolahilä sähalea, Dofogamabu. Malësä ne neebea misiäia beasimo. Mida, Godea Beaha Maadela Sigi Neebea ami, malësä gowe ili gadoi neebe amolile dialeamelë.

¹⁷ Na dilima dofä sähago. Godea Beaha Maadela Sigi Neebe amo, malësäea neala gaulo amo gadola, made neala gaulo amoda, dofä made nogila digamolömelëla säi.

*Nelegei yafie negelo dafidilo dolö afädëa Yesub-
alä adoi
(Madiu 19.16-30; Maga 10.17-31)*

18 Beaha aligilo afädëa Yesuma nabahalea, Sälä Olelelo hedabi-e, ne namolöi namolö neala gau-molöie, abilia hamomolödula nabi.

19 Amala nabasebegi, Yesuea ema säla obögësalea, Dia nema hedabila säi amoda, mi edoie. Afädë hedabida maade. Gode emu hedabi nea.

20 Mala säla negei dibe amoda, dia dawadigi nebego.

Udia dolö susugu hamomabio.

Baagomäia nufuabio.

Nelebo fa nimabio.

Wäfalī säsälä gudimabio. Amase,

diado diemele hawala nea, elele ado nabala hamomalola

säi.

21 Amala säsebegi, dolö amea säla obögësalea, Ado amoli sulubadelada, ne malësägila hamosa maadeimelëla säi.

22 Amala säla obögëi amo nabalahilä, Yesuea ema sähalea, Afädëfalī dima maademelë. Dïe nelegei difolalebe amo, bidi neaha maademolö mosö. Neaha maadelahilä, dia muni nease amoda, dolö busadäoi nefolalebe amoligali imalo. Amala hamoseda, selesaia mosöa bidi edefade nimolömelë. Amo gadola hamolahilä, ne bögëla misialola säi.

23 Ado säi amo nabalahilä, ïe odagi augia idogola, edefademalä yöi. Mida, ïe nelegei yafie dilo amogi amai.

24 Yesuea dolö amoma siila nea sähalea, Nelegei yafie negelo dafidilo dolö neebe amolida, Godea Beaha Maadela Sigi Neebea ami nogila digamolöda, häuai galeamelë.

²⁵ Dofä. Sugua gameleda, nusi galabagi doadigila moholöda, häuai holöfalä mademelë. Gaso, nelegei yafie negelo dafidilo dolö nefolalebe amoli, Godea Beaha Maadela Sigi Neebea ami nogila digamolöda, häuai baagila asi dialeamelëla säi.

²⁶ Udia dolö nefolalo amolia, ea ado säi amo nabalahlä sähalea, Amai, damula auloda, nowëa gaula namolödula säi.

²⁷ Amala säsebegi, Yesuea säla obëgësalea, Udia dolöea hamomolöi made amoda, Godea hamomolöi neamelëla säi.

²⁸ Amala säsebegi, Fidaea sähalea, Hä, bimo. Nilä nilile nelegei sulubadela fisila, di bëgëla misimelëla säi.

²⁹ Amala säsebegi, Yesuea ilima sähalea, Na dilima dofä säla iahago. Sulubadelaëa mosöge, udiage, edooge, eedo emelege, malöge fisila, Godea Beaha Maadela Sigi Neebe amomu si gäwisi awäsedä,

³⁰ nagadaia neebe wegi nea, fisi amoli baagila awäla, edefademalä gaula namolölahilä, oböla, segeyo hobeä besela galamolö amogi, namolöi namolö dibe amo gaula namolömelëla säi.

Yesuea e baagolahilä nowemolömelëla bu osoda säi

(Madiu 20.17-19; Maga 10.32-34)

³¹ Yesuea ië bëgëla aulo giwilasi amoli sigi aliga galahlä, ilima sähalea, Nabuö. Nilä hä, Yalusaleme moholö awähamelë. Awäsedä, nelebo sulubadela dafidi bea sälo nefolalo amolia, Dolöie Malö amoie säla dëdëla negei dibe amo gausiala digaha maademolömelë.

³² Afädëa Dolöie Malö amo Yu dolö ilima made, dolö odoa nefolalebe amolima gaula iaseda, ilia e gadiabola digi, e gagadela digi, ema gofedela galala digimolömelë.

³³ Ilia e fëgälahilä, baagomäia nufulömelë. Amala hamoseda, segeyo äudä nelolahilä, osodagi, hï nowemolömelëla säla i.

³⁴ Bëgëla aulo amolia, ea säi amo sulubadela made helësëi nelo. Ilia ado säi amoie, galone made helësëmäia, musügä negela säi amea, ilia ea säi amoda, goweie säsebela, dofä dawa made nelo.

*Yesuea si golai afädë wahilasi
(Madiu 20.29-34; Maga 10.46-52)*

³⁵ Yesu e Yaligo gaamugi besela galamolö ga madesa nebegi, dolö si golai afädë idi agesua ami salea, udia dolöma muni imola ëdëgësa sulo.

³⁶ Udia dolö yafie adodola afiasebe amo nabal-ahilä, ea nabahalea, Goda edo hamosebela nabi.

³⁷ Ilia ema säla obëgësalea, Goda Nasalese fii Yesu awäsebela säi.

³⁸ Amala säsebegi, ea uuala sähalea, Debidiië malö Yesu-o, ne bobasëmola säi.

³⁹ Yesu hobeala maaha nebegi, amala uuasebegi, udia dolö dafidila afiaha dilo amolia ema nemosalea, Dia adomabu. Gameläla säi. Amala säsebegi gaso, ea gelolafalï uuahalea, Debidiië malö-o, ne bobasëmola sähamu sulo.

⁴⁰ Hä, Yesu e maala beaha nea, dolö si golai amo e nebea ami sigi misialasebegi, ilia e sigi gaula maala, Yesu nebea ami ga madela ifosi. Amalebe, Yesuea ema nabahalea,

⁴¹ Na dima abilia hamomäia hamesebela nabi. Ea säla obëgësalea, Dafidilo Geloi-e, na siia fädäla bimolö hamesebela säi.

⁴² Yesuea ema sähalea, Hä, bimo. Dihï Godema asigi afädë negei amea, di hä, wahi gomelëla säi.

⁴³ Amala säi amole, ie si golai amo hä, fodolofali wahisebegi, ea Godeïe ëi gauia adogolahilä, Yesu bëgëla asi. Udia dolö nefolalo amoli sulubade-laia, amala hamose amo bealahilä, iliage Godeïe ëi gauia adaha nefolalo.

19

Yesu e Sagiasia mosöa asi

¹ Yesu e, hä, Yaligo gaamugi besela galala baag-ila awäha nelo.

² Gaamugi amida, dolö afädë sulo. Amoïe ëida Sagiasi. Eda dagisi muni neaha aligilo nefolalebe amolile busa nea, muni yafie negei nelo.

³ Ea Yesuda, abodo gadoi walebelela bimolöla helësëi gaso, udia dolö yafie negei amea, ea Yesu bimolöi made meli. Mida, e oboba amea.

⁴ Udia dolö awäsebe amo gadola, e edale baluluia awälahilä, Yesu eda, idi gowegi maase bimolö gab-ula helësëlahilä, äfäeo i amogi fedala sulo.

⁵ Yesu e maala, Sagiasi e fedai sebea ami besela galala, sida adogola nea, Sagiasima sähalea, Sagiasi-e, neda walio dia mosöa namolö mo-holömelë. Di hä, fodolofali digamola säi.

⁶ Amala säsebegi, Sagiasi e fodolofali digala, ie iso asigia obeägilahilä, ea mosöa fimäia Yesu säla olela fu i.

⁷ Amala säsebegi, udia dolö nefolalo amolia, amala hamosebe amo bealahilä, habobala

södäwala sähalea, Dolö nafade hamolo amea mosöa söfë awäsebegola säi.

⁸ Ea mosöa awälahilä, Sagiasia nowela nea, Dafidilo Geloima sähalea, Dafidilo-o, dia nabuö. Na nelebo difolalebe amo mogogi mogelahilä, elö amo busadäoi nefolalebe amoligali imolömelë. Amalahilä, afädëie nimolö dibe amo gadola made, baagia asogola imola säla neaha nelo amoieda, na oböla, dahila neala nii amoie biyidiala ia obögëmolömelëla säi.

⁹ Amala säsebegi, Yesuea ema sähalea, Dolö gowe eege, hä, Abalahamaie malö neebe ameada, mosö gowegi sefolalebe amolia, walio hä, damula aulo neala gausagomelë.

¹⁰ Dolöie Malö ameada, udia dolö dabadigi neebe amoli, hogolahilä sigi obögëmolö misimelëla säi.

Ado besula hamoi hamolasilo nabülasia muni niie säi

(Madiu 25.14-30)

¹¹ Udia dolö nefolalo amolia, ado säse amo nabaha sefolalebegi, Yesuea aso, sähamu nea, il-ima ado besula säha nelo. Mida, e hä, Yalusaleme ga madela neëgida, ilia helësësalea, Godea Beaha Maadela Sigi Neebe amo, waliomu ulufadigimolö gabula helësëi.

¹² Amala helësësebegi, Yesuea sähalea, Dolö dafidilo ei sälo afädë nelo amea, ilia e gini neala ifosimäia, sege wagadi made awälahilä, hobeala hi segea udia dolö sigi namolö obögëmolöie, naabo negesiä asi.

¹³ E aso, awäla made nea, dafidi ie hamoi hamolasilo nabülasia welahilä, ilima muni giwi siliba

hädali afädë hïdo hïdolama sogosalea sähalea, Gowe ïase goweada, ne asibua hamoi hamolahilä, baala nea negesa namialola säsiä asi.

¹⁴ Amala asibua, hïle segeafalï udia dolö sefolalo amolia, ema bimolö habobalahilä sähalea, Dolö goweda, nilïle gini namiäia hamesa mademelëla sälahilä, odoaea e moholö awäsebea ami säla ïmolö mosalola säi.

¹⁵ Amaï gaso, ga nefolalo amolia dolö amo gini neala ifosisebegi, e obëgëi. E hä, obëgëlahilä, ïe hamoi hamolasilo amolima muni ïasila asi amolia hamoi hamolahilä, baala abilia hamoi walebelela bimolöïe, e neebea ami misialamalola säi.

¹⁶ Amala misialasebegi, dolö dafididale misi amea ema sähalea, Dafidilo-o, dia muni giwi siliba hädali afädë ï amea, na hamoi hamolahilä, muni giwi siliba dausini afädë baala nea negeimelëla säi.

¹⁷ Amala säsebegi, ea dolö amoma sähalea, Hamoi hamolasilo hedabi-e, hedabola hamoi gabu. Dia holöfalï amo asigi falagasei nea, sigi nelo gabugi, gaamu nabülasi dibe amo dia sigi namialola säi.

¹⁸ Amalahilä, dolö agedu amo maalahilä sähalea, Dafidilo-o, dia muni giwi siliba hädali afädë ï amea, na hamoi hamolahilä, muni giwi siliba hädali bia baala nea negeimelëla säi.

¹⁹ Amala säsebegi, ïe dafidilo amea dolö amoma sähalea, Gaamu bia dibe amo dia sigi namialola säi.

²⁰ Amase, dolö elö amo maalahilä sähalea, Dafidilo-o, die muni giwi siliba hädali afädë amoda gowe. Na faguloea usulala negei dilo.

²¹ Mida, di geloi bologodei amo helësëla, ne bedäi. Dolö elöea nelebo negei dibe amoda, dia

nealahilä, dia made sagaia amida, dia faila nũlo gabiola säi.

²² Amala säsebegi, ea dolö osoda amoma sähalea, Hamoi hamolasilo nafade di, dihi ado säsebe goea, na dibalä gudidelä. Dia helësësaleada, neda geloi bologodeige, nelebo odoaie dibe amoge, na nelo, amase, molö na sagai made amoge, na faila nũlolage helësëile.

²³ Dia nĩe muni amo bėgigi negesiä ami, made negei goda, abisalea amai. Amala negei galebeda, ne obėgėsegi, baai muni amola nealabio godala säi.

²⁴ Amala sälahilä, ea ami nefolalo amolima sähalea, Ea muni giwi siliba hädali afädė gaula neebe go fedela, muni giwi siliba dausini afädė gaula neebe amogali neala ĩmalola säi.

²⁵ Amala säsebegi, ilia ema säla obėgėsalea, Dafidilo, eda muni giwi siliba dausini afädė gaula neebela säi.

²⁶ Amala säsebegi, ea säla obėgėsalea, Na dilima säla ĩahago. Sulubadelaea nelebo gaula neebe amolimada, odoa baala ĩmolömelė. Gaso, afädėa made gaula neebe amomada, holöfalĩ gaula neebe amo hails nimolömelė.

²⁷ Amaimo, nebalä ado nealahilä, ne ilile gini made namiėla sälo nefolalebe amolida, dilia sigi maalahilä, nĩe odagia baagomäia nufudaha maademalola säimelėla säi.

²⁸ Yesuea amala sälahilä, e Yalusaleme aulo idigi, dafidi awäha nelo.

**Yesu e Yalusaleme besela
galalahilä, gobela ĩlo mosöa ami
udia dolöma olelesa nelo
(Ulugu 19.29-21.38)**

Yesu e gini gadoi hamola, Yalusaleme besela galai

(Madiu 21.1-11; Maga 11.1-11; Yone 12.12-19)

²⁹ Yesu e maala Bedefagige, Bedanige, ga madela nea, segebi ëi Olibebia amila, ea bægëla aulo äudä dafidi mosalolahilä, elema sähalea,

³⁰ Ali segea ago mosö nefolalebea ami awäla besela galala beahamelële, sugua dögi üdili afädë dafidi dolö afädë filo made, gide begei neë bi-molömelë. Amo fisigäla, wi sigi obëgëmalo.

³¹ Afädëa alima goda abidä fisigähala nabaseda, alia gomalä sämalö. Dafidiloea webalä hamomolö galeamelëla sämalola säi.

³² Amala säsebegi, dolö äudä dafidi mosalo amole awäla beahamelebe, ea säi amo gadolafali dibe meli.

³³ Hä, elea sugua dögi üdili gide begei amo fisigäha nebegi, amoie eedo amolia elema, Goda abilia hamodelä fisigähala nabi.

³⁴ Elea säla obëgësalea, Dafidiloea webalä hamomolö galeamelëla säi.

³⁵ Amala sälahilä, elea sugua dögi üdili amo sigi, Yesu neebea obëgëi. Amalahilä, elele fagulo daia salugalo giila, sugua dögidaia sadia idogolahilä, Yesu amodaia fila fedamäia, ugila negei.

³⁶ Amalebe, e amodaia fila awäha nebegi, udia dolöea ilile fagulo daia salugalo amo giilahilä, idi-afa föföla awäha nelo.

³⁷ E awäla Olibebia amila aliga idogomolö idi ga madesebegi, udia dolö yafie e bægëla aulo amoli sulubadela, geloi melëlo made gadoi sulubadela hamose meli amoie, edefademalä obeägilahilä, gelola uuala Godeie ëi gauia adala sähalea,

³⁸ Beaha aligilo gini Dafidilo Geloïie ëigila maa-hago, Godea e neala obeägïlasimäia.

Selesaia mosöa ami, neala dalulasilo diamiäia.
Gode ilibia neebe amoïe ëi gauia adogosawela
säsäla afiaha dilo.

³⁹ Amala säsäla afiaha dibegi, Felesi dolö odoaea
udia dolö gegedoi nefolalebea amila Yesuma
sähalea, Säla Olelelo-o, die bëgëla aulo golima
nemomola säi.

⁴⁰ Amala säsebegi, Yesuea säla obëgësalea, Na dilima
säla iahago. Ilia adola made, aumala neëda, igi
difolalebe gowe ilia gelola uuala sãmolömelëla säi.

Yesuea Yalusaleme gaamu amo beala dïi

⁴¹ Yesu e besela galamolö ga madela nea,
Yalusaleme gaamu amo bealahilä, amogi dïisa nea
sähalea,

⁴² Segeyo walio wegi, di neala dalulasilo amo
dihï helësëlabio gaso, walio hä, dia siia bimolöi
made, musügä dialeamelë.

⁴³ Hobeala segeyo afädëgi, di mia besela
galasegi, die ado nii neebe amoli maalahilä, die
yala edefade go baagido, naga gasala dadagulula
nelegela amalelahilä, die idi sulubadela gaha
maademolömelë.

⁴⁴ Ilia dihidige, die malö die mumusogi sebe
amolige, neala nagadaia sadia idogola dusula
nafademolömelë. Gode e di neebea misi amoïe
segeyo, dia dawa made nelo amea, ilia die igi
odoa daia dadagulula negei dibe goda, sulubadela
mugulula digaha maadela, igi afädë igi elödaia
made diamolömelëla säi.

Godeïe mosöa magaia negei hai

(Madiu 21.12-17; Maga 11.15-19; Yone 2.13-22)

⁴⁵ Amala sälahilä, Yesu e Godeïe mosö yala isogi nogila digalahilä beahamelebe, dolöea bidi ni-molöie, nelebo negela digisa difolalebe amoli nesila digilahilä,

⁴⁶ ilima sähalea, Ado säla dödëla negei dibe amea sähaleada, Nïe mosö amoda Godema adolo mosö di-amolömelë. Amai gaso, dilia oböla, fa nelo musügä aligilo igi äbä gadoi hamoi gabula säi.

⁴⁷ Segeyo sulubadelagi, Yesu e Godeïe mosöa ami nea, ado mala olelesa aligilo nelo. Amala olelesa neëgida, gobela ilo busa nefolalo amoliage, mala dawadigi amoliage, amase, udia dolö beaha aligilo busa nefolalo amoliage, Yesu nufulöie idi hogosa nelo.

⁴⁸ Amai gasoda, udia dolö nefolalo amoli sulubadelaea, Yesuea mala olelese amo, afädë damula fisila made, hedabola naba mafusa neebe amea, ilia Yesu nufulö fu made beagolei nelo.

20

Yesuma, dia geloi gaula nebegoda, nowëa ïla nabi

(Madiu 21.23-27; Maga 11.27-33)

¹ Segeyo afädëgi, Yesu e Godeïe mosöa nea, udia dolöma säla olelela digi, Ado Mala Hedabi säla ïadigisa nebegi, gobela ilo busa nefolalo amolige, mala dawadigi nefolalo amolige, asigi gäwi dafidilo nefolalo amolali, e neebea ami misi.

² Ilia Yesuma nabahalea, Dia nelebo hamosebego, nowëa hamomalai hamosa. Nilïa nabelä, dia säla ïmo. Go hamomäia, geloi go nowëa ïasiola nabi.

³ Amala nabasebegi, Yesuea ilima sāla obөгәsalea, Dilia nema sāla obөгәmäia, nage dilima ado afädә nabahago.

⁴ Yonea ödägi gesa nelo amoda, abidila misi. Selesaia mosöala misile, ma, dolömadila misilela nabi.

⁵ Amala nabasebegi, hilidomu didiähalea, Nilia selesaia mosöala misila säseä, ea nilima, Ema asigi afädә made negei goda, edoiela nabolö gabu.

⁶ Amase, nilia dolömadila misila säsege, udia dolö nefolalebe gowe ilia, Yone eda bea sālo afädә neala helēsēlo ameada, nili igia nufulö gabula didiäi.

⁷ Amala didiälähilä, ilia sāla obөгәsalea, Yonea geloi nii amoda, abidi niidu. Nilia dawa mademelēla sāi.

⁸ Amala säsebegi, Yesuea ilima sāla obөгәsalea, Ama galēda, na nelebo hamosebeweda, gowea hamomalai hamosa neamelēla, nage dilima made sāla imolömelēla sāi.

*Ado besula sagai oodola beaha namialola sāi
(Madiu 21.33-46; Maga 12.1-12)*

⁹ Amala sälahilä, Yesuea udia dolöma ado besu gowe sāla i. Dolö afädә i gägä negelo gelebi ēfә sagaia sagala negesiä, dolö odoaea oodola beaha namialola sälahilä, hi eda sege wagadi made, holöbö sedade namolö asi.

¹⁰ Gägä amo faimolö fu besela galasebegi, sagai eedo amea, ie hamoi hamolasilo afädәmä sähalea, Nie sagai oodola beaha nefolalebe amolima, gägä odoa faila imola sämolö mosalola sāi. Amala sāi amo nabala, ea sämolö awäsebegi, oodola beaha nefolalo amolia, hamoi hamolasilo amo nufudala ialalelahilä, nelebo afädә made gaui, fisiga gai.

¹¹ Amala hamoi gabugi, sagai eedo amea, ïe hamoi hamolasilo elö amo bu mosaloi. Gaso, amoge oodola beaha aligilo amolia, hïdo elöla ga-diabola nufudala ialalelahilä, nelebo afädë made gau, e badumu fisiga gai.

¹² Amalamu hamosebegi, sagai eedo amea ïe hamoi hamolasilo osodama oböla, bu mosaloi. Awäsebegi, sagai oodola beaha aligilo amolia, e nufudala afisilahilä, yala baagido sogobala sadia gai.

¹³ Amalamu hamosebegi, sagai eedo amea sähalea, Amai na abilia hamomolödu. Hä, nïe malö, nihï boba hamoi neebe wema mosöla sämolö. Iliä e hawala nea, mogola hamomolöla helësësala säi.

¹⁴ Amai gaso, malö amo awäsebegi, oodola beaha aligilo amolia e bealahilä, hilido didiähalea, Sagai eedo amoïe nalä negei nimolö amoda, hä, go gabugo. ïe nelegei dibe goda, niligali nedelä, eda baagomäia nufidedila sälahilä,

¹⁵ sagai yala baagido sogobala sadia galahilä, baagomäia nufimelëla säi.

Amala sälahilä, Yesuea ilima sähalea, Amala hamoi amo, sagai eedo amea dolö amolima abilia hamomolödu.

¹⁶ E maala, oodola beaha aligilo amoli nufudaha maadelahilä, sagai amoda, odoaea oodola beaha namiäia ïmolömelëla säi. Amala säsebegi, udia dolö sefolalo amolia, ado amo nabalahilä, Amala hamomolöi mademelëla säi.

¹⁷ Amala säsebegi, Yesuea sebe amoli sidawewela bealahilä sähalea, Amai galëda, Godeïe bebagi ado gowe säla dëdëla negei dibe goweda, mi edoïe säla negei dialea. Amea sähaleada,

Mosö olelo amolia, igi galone hamomolöi made gabula memelela fisi amoda, galone geloi dafidilo besela galai neamelëla

säla dëdëla negei dialea.

¹⁸ Udia dolö sulubadela igi amodaia digase amolida, dusudasimolömelë. Amase, igi amea dolö afädëdaia daala negeseda, eegela fisimolöi fisimolömelëla säi.

¹⁹ Mala dawadigi nefolalo amoliage, gobela ilo busa nefolalo amoliage, Yesuea ado besula säi amoda, nili helësëla säsebela helësëlahilä, segeyo amo galamu e gaudelä hamoi gaso, udia dolö nefolalebe amolibalä bedäi.

*Dagisi muni ïmolö dialeale, ma, maadelela nabi
(Madiu 22.15-22; Maga 12.13-17)*

²⁰ Iliä Yesu gaumolöie hedabola idihë nea, dolö odoaea hado desega mosäia fisiga galahilä, ilima sähalea, Dilia ea säse amo wäfalä asigi falagasei nea, nabulöi gadoi hamola, fädäla nabulö mosalola säi. Ea ado asiala säse amo nabalahlilä, ado amohi, e gaumolöie mi hogosa nelo. Amalahilä, Olomoie gabena neebe amoie naabogi gausimolöla helësësa nefolalo.

²¹ Mosaloi amoli awälahilä, Yesuma nabahalea, Säla Olelelo-o, niliada, dia ado säsebegoge, mala säla olelesebegoge, udia dolöma mogolafali sähala helësësamelë. Amase, udia dolö sulubadela memelela made, afädëdilamu, Godeie idigi aulo mala amo, ilima säla olelese amoda, mogolafalimu säla olelelommelëla helësësamelë.

²² Hä, beaha aligilo Gini Sisa neebe amogali, nilia dagisi muni ïmolöda, dofeale, ma, dofea madelela nabi.

²³ Amala nabasebegi, Yesuea, e fedogola nabasebe amo helësëlahilä, ilima sähalea,

²⁴ Muni giwi afädë nema olemola säi. Iliä ema olesebegi, ea ilima nabahalea, Muni giwi gogi, dolö busa dibe goge, ëi dibe goge, nowëie gab-ula nabi. Amala nabasebegi, ilia säla obëgësalea, Sisaïela säi.

²⁵ Amala säsebegi, ea ilima säla obëgësalea, Amai galëda, nelebo Sisaïeda, Sisa hïma ïmalö. Godeïeda, Gode hïma ïmalola säi.

²⁶ Amala säsebegi, dolö amolia udia dolö nefolalo amolile sidaia ami, Yesuea ado säi amea, e gaumolö uli nelo. Ea säla obëgëi amogi, ili fudugilahilä, adola made, aumala nefolalo.

Sadiusi ilia baagoi nowemolö amoïe Yesuma nabi

(Madiu 22.23-33; Maga 12.18-27)

²⁷ Sadiusi dolö iliada, udia dolö baagoi amolida, made nowela galamolöla sälo amoligi, odoaea Yesuma nabulöie, e neebee misi.

²⁸ Iliä nabahalea, Säla Olelelo-o, Mosesea, nilia hamomäia, ado afädë dëdëla negei dibe amea sähaleada, Dolö afädëie edooea udia neala salea, malö made sogobala baagosedä, udia didalo amo edoo elö amea nealahilä, baagoi amoïe ëigila malö sogobamolö dialeala säla dëdëla negei dialea.

²⁹ Amaimo, edoolali gifalädalïa sulo. Abulümi amea udia afädë neala nea, malö made sogobala baagoi.

³⁰ Baagosebegi, edoo agedu ameage,

³¹ amase, edoo osoda ameage, udia amo neasebegi, amalamu hahamola awäha neamu, dolö

gifalädalĩa amolia, malö made sogobala neamu, baagosa maadei.

³² Amala baagosa maadeibua, hobeafalĩ, udia amoge baagoi.

³³ Amala hamoi amo, dolö gifalädalĩa amolia udia afädë amomu neala sulo amo, hobe baagoi amoli nowela galasolo amo gala, udia amoda abodoweie udia samolödula nabi.

³⁴ Amala nabasebegi, Yesuea säla obëgësalea, Udia neadigi, dolö fila awäla digise amoda, walio nagadaia wi nea amahamelë.

³⁵ Amaha gaso, Godea udia dolö baagoiala nowela galala, hobeala namolö dibe a ami namolö dofeala helësëi amoliada, udia made neadigi, dolö made fila awäla digimolömelë.

³⁶ Ilida, selesaia fii amoli gadoi namolö amead a, bu elö baagomolö uli namolömelë. Baagoia amila nowela ifosi amea, ilida Godeie malölali namolömelë.

³⁷ Amaimo, Moseseage, i holöfaligi nulo söa fedai amoie dëdëla negei amead a, udia dolö baagoi amoli nowemolö amo ulufala olei. Mida, beba amogila, ea Dafidilo Geloima sähalea, Abalahamaie Gode, Aisagaie Gode, amase, Yeigabaie Godemelëla säi amea olei.

Sigi Obëgëi 3.6

³⁸ Gode eda baagoi amolile made, eda udia dolö nefolalebe amolile Gode neamelë. Mida, udia dolö amoli sulubadelada, ie siigi nefolaleamelëla säla obëgëi.

³⁹ Amala säla obëgësebegi, mala dawadigi odoa nefolalo amolia säla obëgësalea, Säla Olelelo-o, hedabola säimelëla säi.

⁴⁰ Ili bedähalea, afädëa ema ado bu elö made nabi.

Godea Afädë Memelei amoïe Yesuea udia dolöma nabi

(Madiu 22.41-46; Maga 12.35-37)

⁴¹ Yesuea udia dolö amolima nabahalea, Afädë Memelei amo eda, Debidüe malöla sälo amoda, abeahäla sälođu.

⁴²⁻⁴³ Debidü hï Gë Udälo bebagi säla negei dibe amogi sähalea, Dafidilo Geloia nïe Dafidilo Geloima sähalea, Na dïe ado nii nefolalebe amoli, di hawala ifosimäia, dida nïe naabo dafädimadi awäla salea, beaha samialola säimelë. *Gë Udälo 110.1*

⁴⁴ Debidia hïma, Dafidilo Geloila säi amoda, e oböla, Debidüe malöda abeahäladula nabi.

Mala dawadigi nefolalo amolia mala nafadela hamoi

(Madiu 23.1-36; Maga 12.38-40; Ulugu 11.37-54)

⁴⁵ Udia dolö nefolalo amoli sulubadelaëa, ea ado säsebe amo nabaha sefolalebegi, Yesuea ië bögëla aulo amolima sähalea,

⁴⁶ Mala dawadigi nefolalebe amoli idihë namialo. Iliä fagulo sedade salugalahilä nawesalea, magaia gaamugi awälahilä, udia dolöëa ili beala, di go gabiola sämäia hameloge, gedolo mosöa dafidilo filo dibeä amimu fimolö hameloge, amase, udia dolö yafie gegedola molö nasebeä ami, dolö busa amolile filodaia amimu samolö hameloge, neamelë.

⁴⁷ Amase, iliada udia didalo sebe amoli dahila neala, ilile mosöa nelegei dibe amo fa neala gaula aulo nea. Ilile asigi musügä negesilahilä, adoeamu Godema sedadela adolo neamelë. Dolö

amala hamose amolida, sē edefade muäia, baala
ïmolömelëla säi.

21

*Udia didalo afädëa Godegali muni negei
(Maga 12.41-44)*

¹ Amala sälahilä, Yesuea bea gahamelebe,
nelegei yafie negelo dafidilo dolö nefolalo amolia,
Godeïe mosöa muni negelo i amogi, muni ïmolö
gaui amo negese meli.

² Amala beaha nebegi, udia didalo busadäoi
afädëa muni giwi holöfali äudä muni salelo bogosi
i amogi salase meli.

³ Amo bealahilä Yesuea sähalea, Na dilima
dofä sähago. Udia didalo busadäoi gowea negei
ameada, odoa ili sulubadelaea negei amo baagila
asimelë.

⁴ Udia dolö egowe ili sulubadelaea muni yafie
dilo amogi i. Gaso, udia goweada, muni made
gaui, hï molö nimolö muni gaui amo, hulu negesa
maadesiola säi.

*Godeïe mosö hila fisimolömelëla Yesuea säi
(Madiu 24.1-2; Maga 13.1-2)*

⁵ Odoaea Godeïe mosö neebe amo beala sähalea,
Igi boboga hedabi hïdo elöi ameage, udia dolö
ilia Godegali galu i ameage, mosö go hedabola
momadoi gabula säsebegi, Yesuea sähalea,

⁶ Dilia walio nelebo bease goïe segeyo
afädë maasolo amo gala, igi afädë igi elödaia
made negela, sulubadela mugulula digaha
maademolömelëla säi.

*Yesuea yöi yafie moholömelëla säi
(Madiu 24.3-14; Maga 13.3-13)*

⁷ Amala säsebegi, ie bögëla aulo amolia nabahalea, Säla Olelelo-o, nelebo hamomolö säi amolida, abola hamomolö amoie säi. Nilia dafidi nofe abodo gadoidale hamose amo beala, nelebo besela galamolö amoli hä, ga madesa gabula helësëmolödula nabi.

⁸ Amala nabasebegi, Yesuea säla obögësalea, Odoaea dili dahila neloea, hedabola idihë nami-alo. Mida, dolö yafie maalahilä, nïe ëi säla sähalea, Neda emelëla säla, amase, Segeyo amo ga madefali dialeala sämolö moholömelë. Amala säседа, dilia ili bögëla mosabio.

⁹ Dilia hobeala nabahalea, gädili neebe amoli edefade nudusalea wabula säsege, udia dolöea ba beala, ilile gamanabalä nudusalea wabula säsege amo nabala, dilia bedäla hehealemabio. Nelebo amoli dafidi amala hamomolö dialea gasoda, segeyo fodolo aligila wagamolö mademelëla säi.

¹⁰ Amala sälahilä, ea ilima sähalea, Fii elöle elöle nudula digi, gini elöle elöle nudula digisa namolömelë.

¹¹ Fogoli edefademaläge, sïdë iige, amase, olo iige, sege elö elölägi moholömelë. Mudaia hamomolöi made gadoige, edefademalä bedämolö elöla elölage moholömelë.

¹² Nelebo amoli sulubadela, aso, made besela galala neëgida, ilia dili gaulahilä, sëlasisa namolömelë. Gedolo mosöa ami dilibalä gudi-lahilä, galabaia mosöa galabaia negemolömelë. Amase, dilia nïe ëi gaula neebe goïeda, ilia dili beaha aligilo ginile gabenale neebea ami sigi

gaula awäla, ifosimolömelë.

¹³ Amala hamoseda, ilima ado mala ulufala säla imäiaie, idi gai doga negesalea amamolömelë.

¹⁴ Amaseda, dilia dafidi ilima ado abodo säla obëgmolödula asigia säosäola made helësëmalo.

¹⁵ Mida, na dilile nafia ado negesila, asigi fala-gaselasisegi, dilibalä ado nii nefolalebe amolia ado amo haila digila, made neadigimolömelë.

¹⁶ Dilile diadole diemelege, didooge, amase, dili sosogo odoage, dili damelëge, nefolalebe amolia dili hololölahilä, ado nii neebe amoligali gaula iasegi, ilia diligi odoa baagomäia nufulömelë.

¹⁷ Amase, dili nïe ëigi nefolalebego bealahilä, sulubadelaea dilima bimolö habobamolömelë.

¹⁸ Amala hamomolö gasoda, dilile busa hilä gogi, afädë made beselala fisimolömelë.

¹⁹ Dilia aso maadela, gelola aligiseda, namolö neala gaula namolömelëla säi.

*Yalusaleme nafademolömelëla Yesuea säi
(Madiu 24.15-21; Maga 13.14-19)*

²⁰ Yesuea ado aso, sähamu nea sähalea, Dilia beahaleamelële, ami dolö yafie amoli mafula, Yalusaleme nogöla amalei beaseda, gaamu amo nafademolöda, ga madefalä gabula helësëmalo.

²¹ Segeyo amo gala, udia dolö Disiligi Yudia nefolalebe amolida, segebi dibeami fisäla baluluia afufumolö dialea. Udia dolö Yalusaleme isogi nefolalebe amolida, gaamu amo dīgila näiadodi moholö dialea. Amase, udia dolö gaamu baagido nefolalebe amolida, gaamu isogi nogila made digamolö dialea.*

* **21:21:** Yalusaleme gaamuda, Disiligi Yudia ami dilo.

²² Ado sulubadela säla dödëla negei dibe amo gadola gausiala digamäia, segeyo amogida, asiala hamoi amoie së imolöie segeyomelë.

²³ Segeyo amo gala, udia fagulo hagui sefolalebe amolige, malö dodo iaha sefolalebe amolige, asigii gabu. Mida, yoi edefade nagadaiaawi besela galala, udia dolö amoligali Godeie mihalälo söga salimolömelë.

²⁴ Ado nii neebe amoli maala, nudulo helebea ili nufudala baagomolömelë. Ilia ili nafodola gädili dibe amo sulubadelagi, sigi gaula moholömelë. Amase, fii odoa nefolalebe amolia Yalusaleme neala emesala nolealesa neamu, ilile wagamolö segeyo daiala negei amogi wagamolömelë.

*Hobeala Dolöie Malö obëgëmolöie säi
(Madiu 24.29-31; Maga 13.24-27)*

²⁵ Yesuea ado aso, sähamu nea sähalea, Segeyo amo gala, esogige, aubegige, gasumiligige, nofe elöi hamomolömelë. Amala hamose amo gaalu, nagadaia wi duhulu aidagula maase amogige, goba nabase amogige, fifi asi amoli edefademalä hehealela bedäla, asigia säosäosa namolömelë.

²⁶ Udia dolöea nelebo hamose amoli beahalea, nagadaia abilia hamomolödula helësëla bedähalea, si dädäbëlela digamolömelë. Mida, muugi nelebo geloi hido elöi amo neala fogolasimolö amea.

²⁷ Segeyo amo gala, Dolöie Malö amoda, geloi edefade amole, yo digalo hido elöi amolebalä, mu baidilidaia maala neë, ilia bimolömelë.

²⁸ Nelebo säi amo gadola hamola ulufadigimolöie mi gäwiseda, dilia nowela nea, busa fädägägia adogola namialo. Mida, Godea dili

fisigäla fisigisimolö segeyo hä, ga makesagomelëla säi.

*Yesuea äfäeoie ado säi
(Madiu 24.32-35; Maga 13.28-31)*

²⁹ Amala sälahilä, Yesuea ilima ado besula gowe säla i. Dilia äfäeoie, i odoa nefolalebe amoli sulubadelage, bimalo.

³⁰ I bäu gähe bobagiseda, hä, sege esomolö ga made gabula, dihili amala helësëlomelë.

³¹ Amo gadola, dilia nelebo säi amoli hamose beaseda, Godea Beaha Maadela Sigi Neebe amo moholöda, ga made gabula helësëmalo.

³² Na dilima dofä sähago. Udia dolö walio nefolalebego baagola made, nefolalegi wäla, nelebo säi amoli sulubadela hamosa maademolömelë.

³³ Mu giwige, naga föige, hogosa helemolö gaso, nie adoda, dofä made hogosa helemolömelëla säi.

Idihë nea beaha namialoi

³⁴ Yesuea ado aso, sähamu nea sähalea, Gagao-molöie gagaolo ödä naala, gagaola dädäbëleloge, amase, nagadaia namolöie säosäola helësëloge, dilile iso asigigi yöia idogola nea, segeyo amo dili mia aabela besela galala,

³⁵ gei dibeä ami hogoi awäsegi, fädälo amo gadola fädäloea, hedabola idihë namialo. Mida, segeyo amo sege föi sulubadelagi, udia dolö sulubadela nefolalebe amolima moholö ameada.

³⁶ Segeyo sulubadelagi idihë nea, nelebo hamomolö amo sulubadela dilia sisigala awäla yomäiaiege, amase, Dolöie Malö amoie siigi namiäiaiege, geloi imäia, Godema adosamu namialo.

³⁷ Segeyo sulubadelagi, Yesuea udia dolö amolima Godeïe mosöa ami säla olelesa nelolahilä, deadiseda, gaamugi amila doadigila awäla, segebi ëi Olibebia ami midilö afufusa nelo.

³⁸ Udia dolö sulubadelaea yosefali nowela, Yesuea säse amo nabolöie, Godeïe mosöa amimu maaha nelo.

Yesu e së naala baagolahilä, bu nowei

22

(Ulugu 22-24)

Yesu nufuäia Yudasaea busa dolö amolibalä ado afädë negei

(Madiu 26.1-5, 14-16; Maga 14.1-2, 10-11; Yone 11.45-53)

¹ Segeyo amo gala, Segeyo Edefadegi beledi edelo yidila made gobela molö amoïe segeyoda, ga made dilo. Ëi elöda, Baagila Asi Segeyolage sälo.

² Gobela ilo busa nefolalo amoliage, mala dawadigi amoliage, udia dolö nefolalebe amolibalä bedälo ameada, ilia Yesu nifulöie idi hogosa nelo.

³ Giwilasi amoligi, afädë Yudasa emada, ilia Isagaliadala sälo amoma, hä, Saidani fedai.

⁴ Yudasa e gobela ilo busa amolige, Godeïe mosö beaha aligilo amolile busa amolige neebee ami awälahilä, ilibalä säla didiähalea, ea Yesu abeahäla hamola hololömolödula didiäi.

⁵ Amala didiäsebegi, dolö amolia obeägilahilä, egali muni imolömelëla säla negei.

⁶ Ilia säi amo nabala Yudasaea ülähilä, Yesu e udia dolö yafie gegedoi diëgi made, hido nafolai neëgi, ilile naabogi e gausimolöie fu hogosa nelo.

Bëgëla aulo äüdäea molö daiai

(Madiu 26.17-25; Maga 14.12-21; Yone 13.21-30)

⁷ Beledi yidila made gobelo Segeyo Edefade amo besela galai. Segeyo amo gala, Baagila Asi Segeyo amoie sugua sibi malö nufulö dilo.

⁸ Amamolö gabugi, Yesuea Fidale Yonelema sähalea, Baagila Asi Segeyo amoie nili molö molöie, alia daiamolö mosalola säi.

⁹ Amalebe, elea naba obëgësalea, Amai, diada alia abidi daiamäia hamesebela nabi.

¹⁰ Amala nabasebegi, ea elema säla obëgësalea, Ali gaamugi awäla besela galasegi, dolö afädë ödä iigi usi gaui maaha neebe amea ali gausiala digamolömelë. E awäse amo gadola bëgëla awälahilä, mosö e nogila digase amogi, alige nogila digala,

¹¹ mosö eedo amoma gomalä sämalö. Säla Oleleloea dima nabahalea, Ne, nie bëgëla aulo nefolalebe amolibalä Baagila Asi Segeyo amoie molö molöie, mosö hogolida abidi dialeala nabila sämalö.

¹² Ea alima mosö daia hogoli edefade afädë, nelebo negesa maadei dibe amo olemolömelë. Ami molö molöie daiamalola säla i.

¹³ Amala sälebe ele hä, awälahilä, nelebo ea säi amo gadolafali gausiala digasebegi, elea Baagila Asi Segeyo amoie molö molö ami daiai.

Yesuea beledile wani ödäle ie bëgëla aulo amoli-gali i

(Madiu 26.26-30; Maga 14.22-26; Age Golidi 11.23-25)

¹⁴ Segeyo amogi, molö molö fu besela galasebegi, Yesula abosolo dolö amolali molö molöie auli amo amalela fifigi.

¹⁵ Amala sefolalea, ea ilima sähalea, Ne aso, së made naala neebewegi wäla, Baagila Asi Segeyo amoie molö dilibalä gedola molöila dofä hame-samu nelomelë.

¹⁶ Amoie mida, na dilima säla iahago. Na nasewe gadola made naala nea, Godea Beaha Maadela Sigi Neebea ami molö amoie mi fädäla ulufala negei diëgi, bu molömelëla säi.

¹⁷ Amala sälahilä, ea gaabogi usi neala gaula nea, Godema nesegelahilä sähalea, Gowe nealahilä, gobe dadagabola mualo.

¹⁸ Amoie mida, na dilima säla iahago. Na wani ödä walio nasewe gadola, made naala nea, Godea Beaha Maadela Sigi Neebe amo besela galala neëgi, molömelëla säi.

¹⁹ Amala sälahilä, ea beledi afädë gaula nea, Godema nesegelahilä, dagabodasila iligali i. Iahalea, ea ilima sähalea, Egoweda nie domalomelë. [Dili ugila negela iahago. Nahalea, ne helësëla mualo.

²⁰ Amo naha maadelahilä, amo gadola wäla, ea gaabogi usi amo gaula nea sähalea, Gaabogi usi goweda, asialo made ado gähe elöi nie healea säla negesebe amoda gomele. Dili ugila negela, nie heale besigahawe.]*

²¹ Gaso, Bimo! Dolö ne hololömolö amoda, nebalä aulidaia negela, molö naha saleamelë.

* **22:20:** Dawadigi dolö odoä ilia helësësalea, ado [gomalä] holela negeigoda, Uluguea dädëi made. Goda elöea hobeala dädëila helësëi.

²² Ìe, ado sàla negei dibe amo gadola, Dolöie Malö amo bégèla moholö gaso, e hololöla odoaie naabogi gausise dolö amo, asigii gabula säi.

²³ Amala säsebegi, ilia hilimu elöea elöma nabala, elöea elöma nabalalahilä, Nowëa amala hamo-molödula sàla didiäha sefolalo.

Ìe bégèla aulo amolia hilimu dafidilo namolöda nowëla sàla gégèi

²⁴ Amala sàlahilä, odoaea niligi goweda baag-ila asi neebela helësesebe amoda, nowëdula sàla gégësa dilo.

²⁵ Amala gégësa dibegi, Yesuea ilima sähalea, Udia dolö fii odoaie beaha aligilo gini neebe amoliada, gelola beaha aligilo nea, amase, ilile èi sàlo amolia gelola sigi aligila, hili ili helësèla sähaleada, Udia dolö ugila negelola sàlo nea.

²⁶ Gaso, dilida amo gadoi namolöi mademelë. Dili neebe gogi afädë dafidilo nea galëda, bu üfi hamola obëgëmolö galea. Amase, diligi beaha aligilo neebe ameadada, oböla, hamoi hamolasilo gadoi hamola obëgëmolö galea.

²⁷ Dafidilo neebe amoda, nowë. Afädë fia idogola salea, aulidaia negela, molö naha sebe amole, ma, e molö muäia deala gaula mafusa neebe amole. Afädë fia idogola salea, aulidaia negela, molö naha sebe amo dafidilo nea madele. Amai gaso, ne dilibalä neada, hamoi hamolasiloea aligilo amo gadola neebewemelë.

²⁸ Ne mia yöi odoa besela galasebegi, dilia ne dīgila made awäla nelomelë.

²⁹ Nìe Naadoea Beaha Maadela Sigi Neebe amo negali ì amo gadoi wäla, nage diligali ìahago.

³⁰ Nïe Beaha Maadela Sigi Neebea amida, dilia nïe aulidaia negela, molöle ödäle naha sefolamiäiage, amase, dili beaha aligilo filodaia salea, Isilale sosogo giwilasi amoli sigi namiäiage, ïahagomelëla säi.

*Yesuea Fidama, dia ne dawa madela
sämölömelëla säi*

(Madiu 26.31-35; Maga 14.27-31; Yone 13.36-38)

³¹ Saimono-o, Saimono-o, nabuö. Eladi gadoi widi dobi amoïe isole düle gasala sadia adogola mogelo amo gadola, dilima amala hamomäiaïe, mugabe Saidania fu ïmola Godema nabimelë.

³² Gaso, dia asigi afädë negeigo made digamäia, na dië Godema adolasimelë. Di hä, besula obëgëla maalahilä, didoolali neebe amoli, gelolasisa nami-alola säi.

³³ Amala säsebegi, Fidaea säla obëgësalea, Dafidilo-o, di galabaia mosöa awäsege, di baagosege, neda dibalä moholöïe daiai neawela säi.

³⁴ Amala säsebegi, Yesuea säla obëgësalea, Fida-o, na dima sähago. Walio gasigi haea gagalugo gawalia made gäla neëgi, dia nafi bu ohodoala, ne dawa madela sämolömelëla säi.

*Yesuea ïe bëgëla aulo amolia muni saleloge,
aduge, nudulo helebege, gaumalola säi*

³⁵ Yesuea ïe bëgëla aulo amolima nabahalea, Nïe hamoi hamola mosäia, na dili fisiga gahalea, muni saleloge, aduge, amase, emo usililoge, dilia gaula mosabiola säsebegi awäsolo amo gala, dilida nelebo gumusui afädë nelolela nabi. Iliä säla obëgësalea, Ai, amala made hamoila säi.

³⁶ Amalebe ea ilima sähalea, Amai gaso, walio dolö afädëa muni salelo galea galëge, adu galea galëge, hä, nimolö dialea. Amase, afädë e nudulo helebe maade galëda, fagulo daia gäi amo giila muni nealahilä, nudulo helebe nimalo.

³⁷ Amoie na dilima säla iahago. Godeie bebagi ado säi dibe amoda, nema gausiala digamolö dialea. Ado amea sähalea, Udia dolöea eda ado säla negei neadigilo dolö amolibalä neala helësëmolömelëla säla dëdëla negei dialea. Mida, ne helësëla ado säla dëdëla negei dibe amo gadola, hä, walio gausiala digasebegomelëla säi.

³⁸ Amala säsebegi, ilia ema sähalea, Dafidilo-o, bimo. Nilia nudulo helebe äudä wi dialeamelëla säi. Amalebe, ea ilima, amo dofeala säla obëgëi.

*Yesuea Olibebia Godema adoi
(Madiu 26.36-46; Maga 14.32-42)*

³⁹ Yesu e gaamua amila, hi dafidi aulo amo gadola, Olibebia moholö awäsebegi, ie bëgëla aulo amolige ebalä asi.

⁴⁰ Ili segea ami besela galalahilä, ea ilima sähalea, Nafadea dili fedogola beasegi digaloea, Godema adosa namialola säi.

⁴¹ Amala sälahilä, ili digila e holöbö wagadi made, igia nidi habisia amo gadoia awälahilä, emo gumu sasagala salea, Godema adosalea,

⁴² Naado-o, gaabogi usi na molö gaulubewe, neala gaula moholö helësësedä, neala gaula mosalo. Amamäia gaso, na hamese we gadola made, dia hamese amo gadola hamomalola säi.

⁴³ [Amala säha sebegi, selesaia fii afädë Hebenila maala ulufalahilä, e gelolasi.

44 Yesu e asigigi yöia idogola edefademalä säosäolahilä, Godema gelola adosebegi, ie filimo amoda, oböla, heale gadoi besela galala nagadaia dögi.]*

45 Godema adola wagalahilä, e nowela, ie bögëla aulo sefolalebea ami bu obögësamelebe, ili adidi difolalebe meli. Mida, ilile asigigi edefademalä yöi amea.

46 Bealahilä ea ilima sähalea, Abilia hamosalea adidi difolalea. Dili adidi dibego nowelahilä, Godema adomalo. Nafadea dili fedogola beasegi digaloeala säi.

*Yudasaea Yesu ado nii amolile naabogi gausi
(Madiu 26.47-56; Maga 14.43-50; Yone 18.3-11)*

47 Yesuea ilibalä ado amo säha nebegi, dolö yafie e neebee ami misi. Giwilasi amoligi dolö ëi Yudasaea ili sigi gaula misi. E Yesu mia maala, Yesu gaula mimi.

48 Gaso Yesuea ema nabahalea, Yudasa-o, dia Dolöie Malö amo gaula mimila hololösalela nabi.

49 Yesu hibalä nefolalo amolia gomalä hamodelä hamosebela bealahilä, ema nabahalea, Dafidilo, nilia ili nudulo helebe wea nufidedulela nabi.

50 Amala nabalahlä, iligi afädëa gobela ilo busa edefadeie hamoi hamolasilo amo nufudalahilä, ie gëhe dafädimadi amo dagala salisi.

51 Amala hamosebegi, Yesuea sähalea, Mala go gadola hamomabio. Fisimalola säi. Amala sälahilä, ie naaboea gëhe amogi diigisebegi, gëhe amo bu hedabola obögëi.

* **22:44:** Dawadigi dolö odoa ilia helësësalea, ado [gomalä] holela negeigoda, Uluguea dëdëi made. Goda elöea hobeala dëdëila helësëi.

⁵² Amala hamolahilä, gobela ilo busa amoliage, Godeie mosö idihë aligilo amolile busa amoliage, amase, asigi gäwi dafidilo nefolalo amoliage, Yesu gaumolöie misi amolima ea sähalea, Dilia helebege, baialage, gagaula mofiaigoda, fa nelo dolö gaulo amo gadola gaumolöie mofiaile.

⁵³ Segeyo sulubadelagi, ne dilibalä Godeie mosöa aligilo amogida, dilia ne made gaui. Gaso, walio gasimi sagaloea beaha aligisebe goeada, hä, dilile segeyomelëla säi.

*Fidaea Yesu dawa madela säi
(Madiu 26.57-58, 69-75; Maga 14.53-54, 66-72;
Yone 18.12-18, 25-27)*

⁵⁴ Amala säsebegi, ilia Yesu gaulahilä, gobela ilo busa edefade amoie mosöa ami e, hä, sigi asi. Amalebe, Fida eda, holöbö hobeala, ili awäse amo bögëla awäha nelo.

⁵⁵ Mosö amoie yala isogi, ili nulo gobela sefolalebegi, Fidage ilibalä ami sulo.

⁵⁶ Nulo gobei söa fedasebea ami e sebe amo bealahilä, hamoi hamolasilo dolisä afädëa ema siila nea, Dolö sebe gowege ebalä nelomelëla säi.

⁵⁷ Amala säsebegi, Fidaea sähalea, Udia, nada e dawa mademelëla säi.

⁵⁸ Oböla, holöfalä nelolahilä, hobeala dolö elö amea e bealahilä sähalea, Dige dolö amoli sosogo amogimelëla säi. Amala säsebegi, Fidaea sähalea, Dolö, go ne mademelëla säi.

⁵⁹ Amala säla aoa afädë gadoi nelolahilä, dolö elöea gelola sähalea, Dolö goweda, dofä ebalä nelo. Mida, eege Galili dolömelëla säi.

⁶⁰ Amala säsebegi, Fidaea sähalea, Wa! Dolö! Dia säsebegoda, na dofä dawa mademelëla säi. Amala säi amole, haea gagalugoea gäi.

⁶¹ Gagalugo gäse amo gaalu, Dafidilo Geloia besuia imogola Fidama siila nelo. Amala siila nebegi, Fidaea helësëla obëgësalea, Dafidilo Geloia ema sähalea, Walio gasigi haea gagalugo gawalia made gäla neëgi, dia nafi bu ohodoala, ne dawa mada sāmōlōmelëla säi amo helësëi.

⁶² Amala helësëlahilä, e segea doadigila awäla, gäia gūsäla dīisa nelo.

*Ilia Yesu gagadela digi, nufuda digisa nelo
(Madiu 26.67-68; Maga 14.65)*

⁶³ Yesu sigi nelo dolö amolia e gadiabola digi, nufuda digisa nelo.

⁶⁴ Faguloea ïe si usulalahilä, ema nabahalea, Dolö di nufudase egoweda, nowëa gabu. Dihï bea säla sāmōla säha nelo.

⁶⁵ Amala sälahilä, ilia e gagadela ado nafadela yafie säha nelo.

*Ilia Yesu e galisölö dolöbalä gudi nabi
(Madiu 26.59-66; Maga 14.55-64; Yone 18.19-24)*

⁶⁶ Yosefali, eso si besela galase amo gaalu, Yu udia dolö ilile asigi gäwi dafidilo galisölö dolö hulu gegedoi nelo. Amoligida, gobela ïlo busa amolige, mala dawadigi amolige nelo. Ili gegedoi dibeami Yesu sigi maalahilä,

⁶⁷ ilia ema sähalea, Afädë Memelei amo di galëda, nilima sāmōla säi. Ea säla obëgësalea, Na dilima säla ïaseda, dilia na dofä säsebelä made helësēmōlōmelë.

⁶⁸ Amase, na dilima ado afädë nabasege, dilia made säla obëgēmōlō gabu.

⁶⁹ Segeyo walio wila nofela, Dolöie Malö amoda, Gode Geloi Edefade Neebe amoie naabo dafädimadi awäla samolömelëla säi.

⁷⁰ Amala säsebegi, ili sulubadelaëa ema nabahalea, Amai dida Godeie malö nealela nabi. Ea ilima säla obëgesalea, Neda dihili säsebe gomelëla säi.

⁷¹ Amala säsebegi, ilia sähalea, Ea hamoi amoie mi edoie odoama nalï hogomolö. Hile nafigila säse, nilia nabi amomelëla, säi.

23

Ilia Yesu Bailadi neeëa sigi afiai

(Madiu 27.1-2, 11-14; Maga 15.1-5; Yone 18.28-38)

¹ Busa dolö amoli sulubadela nowela, Yesu Bailadi neeëa sigi afiai.

² Ilia ebalä gudimolö nea, mi gäwila sähalea, Dolö goea ado halowela säla, Yu udia dolöëa asiala hamomäia dusugaha neë, nilia melëlomelë. Amase, nilia Sisama dagisi muni negelo amoge, ea negemabiola sälahilä, Afädë Memelei beaha aligilo ginida, emelëla säsiö.

³ Ilia amala säsebegi, Bailadia Yesuma nabahalea, Dida Yu udia dolöie ginilela nabi. Amala nabasebegi, Yesuea säla obëgesalea, Dihï säse gomelëla säi.

⁴ Amala säsebegi, Bailadia gobela ilo busa amolimage, udia dolö gegedoi nefolalo amolimage sähalea, Dolö gowea asiala hamoi afädë na made beasebemelëla säi.

⁵ Amala säsebegi, ilia gelolafalï sähalea, Dolö goea Yudia sege sulubadelamadi nawesa nea, ea

ado olelese amea, udia dolö neebe amoli subadela gëgëlasilo nea. Dafidi Galilimadi mi gäwila hamosa nelo amo, walioda, hä, wi maala hamosa neagomelëla säi.

Ilia Yesu Heledo neebee sigi awäla gudi

⁶ Ilia säi amo nabalahilä, Bailadia ilima nabahalea, Dolö goda amai, Galili dolölela nabi.

⁷ Bailadia helësësalea, Yesu e sege Heledoea sigi neloamadila misi gabula helësëlahilä, e Heledo neebee fisiga gai. Segeyo amo galada, Heledo e Yalusaleme ami misi nelo.

⁸ Heledoea segeyo sedade dafidi nelo amogi, Yesu bimolöila helësësamu nelo amea, ilia e sigi maasebegi, Heledoea edefademalä obeägi. Yesuea hamolo mala säla i amo ea nabala nelo ameada, Yesuea dolöea hamomolöi made gadoi hamose amo bimolöila hamesa nelo.

⁹ Amalahilä, ea Yesuma ado odoa yafie nabi. Gaso, Yesuea ema ado afädë made säla obëgëi.

¹⁰ Gobela ilo busa ami nefolalo amoliage, mala dawadigi dolö ami nefolalo amoliage, gelola gudilahilä, ea nafade yafie hamoimelëla säha nelo.

¹¹ Amasebegi, Heledoeage, ie ami dolö nefolalo amoliage, Yesu gagadela gadiaboi. Amalahilä, fagulo sedade hedabi hido elöi afädë salugasilahilä, Bailadi neebee sigi obëgëmalola säi.

¹² Dafidi Heledo Bailadileda, ado neala gasi gogoi nelo gaso, segeyo amogi, ele oböla, damele hamoi.

Bailadia Yesu i fägägi baala negemalola säi

(Madiu 27.15-26; Maga 15.6-15; Yone 18.38-19.16)

¹³ Bailadia gobela ilo busa nefolalo amolimage, beaha aligilo dolö nefolalo amolimage, amase, udia dolö amolimage, wela gegedomalolahilä,

¹⁴ ilima sähalea, Dilia dolö gowe ne neebee sigi maalahilä, nema sähalea, Ea udia dolöea ba bimäia ado neasilo neamelëla säi amo, na e dilile si mogogi ifosiä, ea nafade edo hamoi walebelela, ema nabala hogosamu nelo. Gaso, dilia ea nafade gowe ili hamoimelëla säi amoligida, asiai afädë na made melimelë.

¹⁵ Heledoeage, we gadola wäla bealahilä, nili neebee sigi obëgëmaloi gabumelë. Hä, nabuö. Ea hamoi amoie e baagomäia nufulöda, mi maade gabu.

¹⁶⁻¹⁷ Ameada, na e fëgämalola sälahilä, fisiga gamola sämolömelëla säi.*

¹⁸ Bailadia amala säsebegi, udia dolö sulubadelaea gelolafali gaalu uuala sähalea, Dolö goda nufudala baagomäia. Balabasada, nihiläma fisigämalola uuala didigai.

¹⁹ Balabasa eada, gaamu isogi ami gamanebalä nudui amoiege, dolö nufudala baagoi amoiege, ilia e galabaia negei nelo.

²⁰ Bailadia Yesu bahila mosöla sämolöie, ea ilima bu nabasebegi

²¹ gaso, ilia gelola uuala säla didigahalea, Eda nufualo. Nufualo. I fügäigi baala negemalola uuala säla didigahamu nelo.

* **23:16-17:** Dawadigi dolö odoä ilia helësësalea, ado goweie säida, damo gowe hawa dialeala helësëi. Amoda gowe. [Segeyo Ede amoie molö nulo amo galada, Bailadia galabaia negei afädë hilima fisigäha aligilo dilo.] Madiu 27.15ge, Maga 15.6ge dibe amole bimalo.

²² Amala säsebegi, Bailadia ilima bu osoda sähalea, Mi edogi. Eada nafade edo hamosio. E baagomäia nufulöie ea nafade hamoida, na made melimelë. Amoëda, na dolö odoama e fëgämalalahilä, mosalahawela säi.

²³ Amala säi gasoda, ilia i fügäigi baala negemalola gelolafali uuala säla didigase amea, Bailadiie ado hado gai.

²⁴ Amala säsebegi, Bailadia ilia hamomalola egedigisebegi amo gadola hamomalai.

²⁵ Gamane dolöbalä nudui amoëge, dolö nufi amoëge galabaia negei dolö amoda, ilia Bailadia fisigämäia hamei amo fisigäi. Amalahilä, Yesu hili helësëse amo gadola hamomäia, ami dolö amolile naabogi gausi.

Ilia Yesu i fügäigi baala negei

(Madiu 27.32-44; Maga 15.21-32; Yone 19.17-27)

²⁶ Ami dolö amolia Yesu sigi awäha nebegi, gaamu Sailini fii dolö afädë, ëida Saimono, mosö gägäwila asi dibeä amila, Yalusaleme besela galamolö maaha nebegi, idiafa gausiala digai. Ilia e gaula, Yesuie i fügäi ie gädädaia negesilahilä, Yesu awäse amo gadola gaula hobeala misialai.

²⁷ Yafie gegedoi amoli Yesu awäse amo gadola afiahalea, iligi udia odoage gualö afiahalea, eegi asigiila didigaola aligi afiaha dilo.

²⁸ Amasebegi, Yesuea besuia imogola nea, il-ima sähalea, Yalusalemeie idiwilali-e, ne helësëla diimabu. Dihili diligige, dilile malögige helësëla diimalo.

²⁹ Nabuö. Hobeala segeyo moholö amogida, ilia sähalea, Udia fagulo made hagula, hua, malö

sogobamolöi made, malö dodo dofä made ilo sefo-
lalebe amolia obeägisa saleamelëla sämolömelë.

³⁰ Segeyo amo gala

ilia segebi dibe amolima säia adahalea, Dili
dagabola digala, nili dabemalola sälahilä,
gau dibe amolima säia gahalea, Nili
hagumalola

sämolömelë.

Hosea 10.8

³¹ Mida, ilia walio i ödäla neebe amoma mala
egowe gadola hamosa galëda, amai i bausoi neebe
amomada, mala abodo gadoi hamomolödula säi.

³² Ami dolö amolia dolö äudä mala nafade
hamolo amolege, Yesubalä gaalu nufulöie sigi asi.

³³ Ili afiala sege ëi Busa Giwi dibeami besela
galala, ilia Yesu i fügäigi ami baala negelahilä,
nafade hamolo dolö äudä amolege, elö ie naabo
dafädimadi, elö ie naabo fefeädimadila i fügäigi
baala negei.

³⁴ Amala hamosebegi, Yesuea sähalea, Naado-
o, ilia gowe hamosala helësëla made hamose
ameada, dia egowelile nafade hëla fisimalola säi.
Amase, ami dolö amolia ie fagulo gii amo nowëa
nimabelela, sadu dahilahilä, ie fagulo amo mogei.

³⁵ Udia dolö nefolalo amolia sisila nefolale-
begi, busa dolö nefolalo amoliage Yesu gadiabola
sähalea, Ea udia dolö odoa ugila negelo. Eda
Geleso, Godea Afädë Memelei amo nea galëda,
amo gadola, ea hi e ugila negemäiala säi.

³⁶ Ami dolö amoliage e dibe amo ga madela
maala aligilahilä, e gadiaboi. Wani ödä gamogai
amo muäia, ie nafia disilahilä

³⁷ sähalea, Di Yu udia dolö ilile gini nea galëda,
dia dihimu ugila negemola säi.

³⁸ Ilia i fügäigi ie busa daia bidigi adomoi, ado afädë dëdëla negesalea,

EGOWEDA, YU UDIA DOLÖÖe BEAHA ALIGILO GINila säla dëdëlahilä, baala negesi.

³⁹ Nafade hamolo äudä baala negei amolegi, afädëa Yesu gagadela sähalea, Dida Afädë Memelei amo madele. Dia dihidi ugila negesalea, alige ugila negemola säi.

⁴⁰ Amala säsebegi, dolö elö amea elö amoma nemosalea, Diage dolö egowea së nasego gadola nase gogi, dia Godebalä made bedäsebele.

⁴¹ Alia nafade hamoi amoie së molö dibe amo gadola, ilia alima hamosebe weda, mogola hamosebe. Be, dolö goweada, nafade made hamoimelëla säi.

⁴² Amala sälahilä, ea Yesuma sähalea, Yesu-o, di beaha aligilo gini hamola maasolo amo gala, dia ne helësëmalola säi.

⁴³ Amala säsebegi, Yesuea ema sähalea, Na dima dofä sähago. Walio dida, hä, nebalä Hebeni namolömelëla säi.

Yesu hame doala asi

(Madiu 27.45-56; Maga 15.33-41; Yone 19.28-30)

⁴⁴ Eso si mogogila, eso si osoda amo gadola, sege sulubadela gasilasimu dilo.

⁴⁵ Mida, eso neëla made, usi amea. Gobela ilo mosöa fagulo edefade gosai dilo amoge, mogogi gadelala digalahilä, elö eamu eamula negesi.

⁴⁶ Amase, Yesuea gelolafalä uuala sähalea, Naado-o, nie gesami die naabogi gausisagola säi. Amala sälahilä, hame doala asi.

⁴⁷ Ami beaha aligilo busa amea, amo beala, Godeïe ëi gauia adogolahilä, sähalea, Dolö goda, dofä asigi mogoi gabula säi.

⁴⁸ Amase, udia dolö amo bea gegedoi amolia, amala hamosebe amo bealahilä, hilile bidagia nufuda, hili mosöa obëgëi.

⁴⁹ Gaso, Yesu e sosogo amoli sulubadela amola, udiafalä Galilila e bëgëla mofiai amolalida, holöbö mia made nea, amo hamose amo beaha nefolalo.

Ilia Yesu igi äbägi baui

(Madiu 27.57-61; Maga 15.42-47; Yone 19.38-42)

⁵⁰ Dolö asigi mogoi hedabi afädë, ëi Yosebe nelo. Eda galisolö dolö amoligi nelo.

⁵¹ Galisolö dolö ilia daiala negese amo gadolage, hamose amo gadolage, eada üla made säi. Eda Yudiamadi gaamu afädëïe ëi Alimadia dolö nelo. Eada Godea Beaha Maadela Sigi Neebe amo misiäia beaha nelo.

⁵² Dolö amea Bailadi neebee awälahilä, Yesuïe domalo nedulela nabi.

⁵³ Amalebe, ea Yesuïe domalo gaula digala, fagulo hedabia usulalahilä, igi äbä dolö afädë baui made, gähe duwi dilo amogi bausi.

⁵⁴ Segeyo amoda, Sabada segeyoïe nelebo daialo segeyo dilo. Segeyo Sabada amoda, hä, ga made dilo.

⁵⁵ Udiafalä Galilila Yesu bëgëla mofiai amolia, Yosebe bëgëla awälahilä, igi äbä amoge, ea Yesuïe domalo bause amoge meli.

⁵⁶ Ili hili mosöa obëgëlahilä, i heale gegoai odoage, weli gafisigäi hedabi odoage daiai. Amalahilä, Sabada segeyogi mala säla negei dibe amo gadola, ili hele sulo.

24

Yesu nowei

(Madiu 28.1-10; Maga 16.1-8; Yone 20.1-10)

¹ Saleleie mi gäwi segeyogi, yosefali, udiafali amolia nelebo gafisigäi daiala negei dilo amo neala gaula, Yesu bauia ami afiai.*

² Ili awäla beahamelebe, igia bauli idi gai amo bauia amila, bebugula asi dibe meli.

³ Amo bealahilä, ili nogila digala beahamelebe, Dafidilo Geloi Yesuie domaloda, maade meli.

⁴ Domalo maade gabugi, ili asigia säosäosa nefolalebegi, dolö fagulo falei si dädägila digamolöi gai äudä, ili mia fodolofali maala ulufadigila nelo.

⁵ Ele beala, udiafali amoli bedäla, busa fu-fuäla nefolalebegi, dolö amolea ilima sähalea, Dolö neebe amoie, oböla, baagoia gui hogosegoda, edoie.

⁶ Eda wi maade. E nowela asimelë. Dafidi Galili nea, ea dilima säi amo helësëla obëgemalo.

⁷ Ea sähalea, Odoaea Dolöie Malö amo nafade hamolo dolö neebe amolile naabogi gausisegi, ilia e i fügäigi baala negeseda, segeyo äudä nelolahilä, osodagi e nowemolömelë. Amala hamomolö dileamelëla Yesuea säi amomelëla säi.

⁸ Amala säsebegi, ea dafidi säi amo ilia helësëla obëgei.

⁹ Amalahilä, ili bauia amila obëgëla awäla, bëgëla aulo gidälasi amolimage, udia dolö odoa ili sulubadelamage, nelebo hamoi amo sulubadela säla iaha maadei.

* **24:1:** Saleleie mi gäwi segeyoda, salele ede. Edolo niliada, gifalädalüla sälo.

¹⁰ Magadala udia Meliage, Yoanaeage, Yameseie eme Meliage, amase, udiafali odoa ilibalä nelo amoliage, ado amo gaula awäla abosolo ilima säla i.

¹¹ Amala säla i gaso, abosolo ilia udiafaliä ado säi amoda, memalä ado gadoi gabula helësëlahilä, dofä gabula made helësëi.

¹² [Amai gaso, Fida e bauia ami baluluia awäla, dosogägila fia idogola salea, aga beahamelebe, isogi ami fagulo amomu dibe meli. Amo bealahilä, hi asigia helësësalea, amo edo hamoidula fudugila hehelësëla obëgëi.]*

*Dolö äudäea Yesu Emeasa idiafa meli
(Maga 16.12-13)*

¹³ Segeyo amo galamu, bëgëla aulo amoligi, äudä sege ei Emeasa moholö asi. Sege amoda Yalusaleme amila, gilomida gädälasä gadoi dilo.

¹⁴ Ele idiafa awäha nea, nelebo sulubadela hamoi amoie säsäla awäha nelo.

¹⁵ Elea amala säsäla awäha nebegi, Yesu hi eege maala baalahilä, ele awäse amo gadola, hiligila awäha nelo.

¹⁶ Gaso, elea e gabula bimolö uli nelo.

¹⁷ Awäha nea, ea elema nabahalea, Ali awähalea, edo säsäla awäha neala nabi. Ea amala nabasebegi, elele odagi yöia idogolahilä, olobola nelo.

¹⁸ Amalebe, afädëie ëida Giliobasa, ea ema säla obëgësalea, Udia dolö yafie Yalusaleme mafula gegedoi amoligi, salele walio wegi nelebo ami

* **24:12:** Dawadigi dolö odoa ilia helësësalea, ado [gomalä] hولة negeigoda, Uluguea dëdëi made. Goda elöea hobeala dëdëila helësëi.

hamoi amo, di afädë diamu made dawa nealela nabi.

¹⁹ Amala nabasebegi, ea elema nabahalea, Nelebo goda edola nabi. Elea ema säla obëgësalea, Nasalese fii Yesuie sähamelë. Eda bea sälo nea, Godeie siigige, udia dolö sulubadelaie siigige, ea hamoi hamoi amoge, ado säi amoge, hedabola gelola hamoimelë.

²⁰ Gobela ilo busa nefolalo amoliage, nilile busa nefolalo amoliage, gamane ilia ebalä gudilahilä, baagomolö dialeala sämäia, ilile naabogi gausisebegi, ilia e i fügäigi baala negei.

²¹ Amala hamoi gaso, nilia dafidi helësësaleada, afädëa Isilale udia dolö fisigäla sigi obëgëmolö amoda, e gabula sisiläfüla helësëi. Gaso, nelebo amala hamoi amo, segeyo walio neebeweda, osodamelë.

²² Amase, nilibalä aligilo udia odoaea nili fudugilasio. Walio yosefali, ilia e bauia bea awähamelebe,

²³ ie domalo made melimelëla säσιο. Made beala obëgëla maalahilä sähalea, Sosoäla awäla melëlo amo gadola, nilia selesaia fii melimelëla säσιο. Amolea nilima säla iahaleada, Eda nowela neamelëla säimelëla sämolö obëgëmalasio.

²⁴ Amala säla iasebegi, nilibalä aligilo odoaeage, bauia ami bea awähamelebe, udiäfali amolia säi amo gadola wäla bealahilä, iliage e made melimelëla säi.

²⁵ Amala säsebegi, ea elema sähalea, Ali asigi maade gabu. Bea sälo nefolalo amolia ado säla negei dibe amo sulubadela, iso asigia dofäla aabelä made helësëi gabu.

26 Afädē Memelei amea, iē ēi ilibia eleloi hīdo elōi dibe amo salugamolōie, dafidi e nelebo amoie sē molō dilo madelela sāi.

27 Amala sālahilā, Mosesea Ado sāla negei dibea amila mi gāwilahilā, bea sālo nefolalo amoli su-lubadelaēa ado sāla dēdēla negei dibe amo su-lubadelagi, iēla sāi dibe amo elema awala sāla iāha maadei.

28 Ili afiala sege ele samolōia ami moholō ga madela nea, Yesu eda hā, baagila moholōi awāsebegi,

29 elea adoea dofogala sāhalea, Eso digala sē gāmolo ga madesebe, di walio alībalā wi diahadula sāi. Amala sāsebegi, elebalā mosōa ami digala sulo.

30 Elebalā molō molōie, ea beledi gaula nea, Godema nesegeilahilā, dagabola elegali i.

31 Amala hamosebegi, elele si dogā negesi. Amalebegi, elea eda Yesu gabula helēsēse amo gaalu, e ami wāla hogosa helei.

32 Amalebe, elea heledo sāhalea, Idiafa alībalā adodola maahalea, ea ado sāla dēdēla negei dibe amoli alīma dogā negela sāsebegi, alīle isogi nulo wilo wāla wilasisio madelela sāha sulo.

33 Amalahilā, ele fodolofali nowela, Yalusaleme obēgēi. Elea ami beahamelebe, bēgēla aulo gīdālasi ilige, odoā ilībalā nefolalo amolige, gedola sefo-lalebe meli.

34 Ami sefolalo amolia sāhalea, Dofā! Dafidilo Geloida, nowei nea. Saimonoma ulufaimelēla sāi.

35 Amase, eleage idiafa nelebo ele mia besela galai amo ilima awala sāla iālahilā, ea beledi dagaboia gasebegi, alīa e gabula helēsēimelēla sāi.

*Yesu e ìe bēgēla aulo sefolalebea ulufadigi
(Madiu 28.16-20; Maga 16.14-18; Yone 20.19-23)*

³⁶ Ilia ado amo, aso, sāha dibegi, Yesu hī e ili mogogi ami maala nelo. [Ea ilima sāhalea, Dalulo dilibalā diamiāiala sāi.]*

³⁷ E maala nebegi, baagoi gesami beahala helēsēla, ili edefademalā fudugila bedāi.

³⁸ Amaha dibegi, ea ilima sāhalea, Edogi yōia idogola sāosōsa dialea. Dilile iso asigigi asigi āudā negei dibegoda edoē.

³⁹ Weda nihīne gabula helēsēmāiaē, nīe naabo emo bimo. Dilia ne hūge giwige galebe amo beaha nea, baagoi gesamida, amo gadola aligilo made ameada, ne diigila bimola sāi.

⁴⁰ [Amala sālāhilā, ìe naabo emole ilima olei.]*

⁴¹ Amasebegi, ilia obeāgīla digi, fudugila bedāla digisa nelo amea, amo dofā gabula made helēsēi nelo. Amalebegi, ea ilima nabahalea, Dilia molō odoa gui dibeleda nabi.

⁴² Amalebe, ilia seme gobei dagaboi amo egali iasebegi,

⁴³ ea amo neala, ilile siigi nea mai.

⁴⁴ Hobeala, ea ilima sāhalea, Ne dilibalā dafidi nelo amogi nea, na dilima gomālā sāla ī amoda gowemelē. Mosese nebegi, Ado sāla dēdēla negei dibe amogige, bea sālo nefolalo amolia dēdēla negei dibe amogige, Gē Udālo bebāgi dēdēla negei

* **24:36:** Dawadigi dolō odoa ilia helēsēsalea, ado [gomālā] holela negeigoda, Uluguea dēdēi made. Goda elōea hobeala dēdēila helēsēi. * **24:40:** Dawadigi dolō odoa ilia helēsēsalea, ado [gomālā] holela negeigoda, Uluguea dēdēi made. Goda elōea hobeala dēdēila helēsēi.

dibe amogige, nïela säla dëdëla negei amo sulubadela gausiala digamolö dialeala säla ìmelëla säi.

⁴⁵ Amalahilä, ea Godeïe bebagi ado säla dëdëla negei dibe amoli, ìlia helësëmäiaïe, ilile asigi doga negelasi.

⁴⁶ Amalahilä, ea ìlima sähalea, Ado säla dëdëla negei dibe amoda gowemelë. Afädë Memelei amea së nalahilä, segeyo osodagi baagoia amila nowela

⁴⁷ odoaea ìe ëigi nea, udia dolöea nafade hamoi amo hëmäia, asigi besumolö dibe amoïe mala amoda, Yalusalemedale mi gäwilahilä, fifi asi difolalebe sulubadelagi, säsäla moholöla säla dëdëla negei dialea.

⁴⁸ Nelebo hamola besela galai amo, dilia säla ulufaha namialo.

⁴⁹ Nabuö. Naadoea diligali ìmolömelëla säla negei amo, na dilima fisiga ìdogomolömelë. Ilibiala geloi amo dilia neala salugamolöïe, gaamua wimu beaha namialola säi.

Yesu Hebeni fedai

(Maga 16.19-20; Abosolo 1.9-12)

⁵⁰ Yesuea ìli sigi sege Bedanimadi awälahilä, ìe naabo gauia adogola nea, Godea ìli neala obeägïlasimäiamelëla säi.

⁵¹ Ea ìli, aso, obeägïlasila säha nea, Godea e Hebeni gaula fedasebegi, ea ìli dïgïla asi.

⁵² Amala hamosebegi, ìlia ìe ëi gauia adogola, ìlima edefademalä obeägïmolö nobala, Yalusaleme obëgëi.

⁵³ ìlia segeyo sulubadelagi, Godeïe mosöa awälahilä, Godeïe ëi gauia adahamu aligilo.

Hä amo.

Edolo Bible
Ruth and the New Testament in the Edolo Language of
Papua New Guinea
Sampela hap Buk Baibel long tokples Edolo long
Niugini

copyright © 2010-2022 Wycliffe Bible Translators, Inc.

Language: Edolo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-27

PDF generated using Haiola and XeLaTeX on 27 Nov 2025 from source files dated 27 Nov 2025

688323a7-0b01-555d-b52f-07c624ea681b